




Early European Books, Copyright © 2009 ProQuest LLC.  
Images reproduced by courtesy of the Royal Library, Copenhagen.  
LN 1375 4° copy 4







Early European Books, Copyright © 2009 ProQuest LLC.  
Images reproduced by courtesy of the Royal Library, Copenhagen.  
LN 1375 4<sup>o</sup> copy 4





Early European Books, Copyright © 2009 ProQuest LLC.  
Images reproduced by courtesy of the Royal Library, Copenhagen.  
LN 1375 4° copy 4



Early European Books, Copyright © 2009 ProQuest LLC.  
Images reproduced by courtesy of the Royal Library, Copenhagen.  
LN 1375 4° copy 4



9-328  
48

# Unser von Gottes

gnaden Friederichen des andern zu Den-  
marcken / Norwegen / der Wenden vnd Gotten Kö-  
nig / Vnd von denselben gnaden / Johanssen des El-  
tern / vnd Adolffen Erben zu Norwegen / aller Her-  
zogen zu Schlesweig Holstein Stormarn vnd der  
Dithmarschen / Grauen zu Oldenburg vnd Del-  
menhorst / Geuettern vnd Gebrüderen / Landtge-  
richts Ordnung / zu befürderunge der ordentlichen  
Justitien vnd Rethrens in vnsern Fürstenthüm-  
ben Schlesweig Holstein vnd Stormarn /  
verfasset vnd Publiciret.

## Deuteron. 1.

Verhöret ewer Brüder / vnd richtet recht zwischen jeder-  
manne vnd seinem Bruder / vnd dem fremdbeling: Kei-  
ne Person solt jr im Gerichte ansehen / sonder solt den klei-  
nen hören / wie den grossen / vnd euch für niemands Perso-  
ne scheüwen / Denn das Gerichtamt ist Gottes.


Gedruckt zu Hamburg / durch  
Nicolaum Wegener.

M. D. LXXIII.

LN 1034

ex 3





**H**erzog  
und der  
Delmen  
bieten all  
terschaff  
jedern ein  
weig und  
denelben  
Allmecht  
beulich d  
bigenegh  
lichen geb  
ordnung  
nen / orde  
gehalten  
irung vn  
ligkeit en  
dan die g  
schlechts  
halten n



King Høegs Samling  
1970.



**W**ir Friederich der ander von  
Gottes gnaden / zu Dennemarck  
Norwegen der Venden vnd Got-  
ten König / Vnd von desselben gna-  
den wir Johannis der Elter vnd  
Adolff / Erben zu Norwegen / alle

Herzogen zu Schlesiweig Holstein / Stormarn  
vnd der Dithmarschen / Graffe zu Oldenburg vnd  
Delmenhorst / Beuettern vnd Gebrüdere. Ent-  
bieten allen vnd jeden Prelaten / denen von der Rit-  
terschaft / Stedten / *Communen* vnd sonst allen vnd  
jedern eingewesenen vnser Fürstenthumb Schlesi-  
weig vnd Holstein etc. vnser gnade / Vnd füegen  
denselben hiemit zuwissen. Nachdem Gott der  
Allmechtige eine jeder Obrigkeit / irem stande vnd  
beuelich darumb fürnemblich fürgesetzt / das diesel-  
bige negst handthabung der ersten Tafel der Göt-  
lichen gebodt daran sein / vnd die verfassung vnd an-  
ordnung thun sollen / das zwischen den Vndertha-  
nen / ordentliche *Iustitia* vnd ein gleichmessig Recht  
gehalten / vnd ein ieder mit den andern fürfallender  
irrung vnd gebrechen halber / nach gebür / vnd bil-  
ligkeit entschieden werden mügen / Ohne welchs  
dan die gemeinschaft vnd *societät* Menschlichs ge-  
schlechts / vnd friedtfertig Politisch wesen nicht er-  
halten werden kan / Vnd wir bey vnserer tragen

A ij

den



den Landts Fürstlichen Regierung / so vns von dem  
Allmechtigen Gott beuolen vnd auffgelegt / so viel  
befunden / das einer gewissen beschriebenen Landts  
gerichts Ordnung / in beiden vnserer Fürstenthum-  
ben Schlesweig vnd Holstein / vnd insonderheit  
was des Fürstenthumbs Holstein / vnd demselben  
einuerleibten Lande / so dem heiligen Römischen  
Reich vnterworffen / betreffen thut / zum höchsten  
von nöten / das der Proceß in Rechtengigen sa-  
chen / des heiligen Reichs Ordnung vnd höchster  
*Iustitien* , *conformiret* werde / damit nicht alleine die  
*nulliteten* gesprochener vorthail verhütet / Sondern  
auch die streittige Parteien / ir Recht ohne geserde  
vnd nachtheil zusuchen vnd zuerlangen wissen mü-  
gen. Das wir demnach dem Allmechtigen zu  
ehren / vnd vnsern Landen vnd Leuten zu gnaden/  
nuß vnd gutem / mit zeitigem wolbedachtigem  
rath / durch die Erbare Hochgelarte vnser Stadt-  
halter / Rethen / vnd lieben getreuen / Als nemlich  
von vnsern König Friederichs wegen / Heinrich  
Ranzow / seligen Ern Johans Sohn / Doctor  
Erasmus Kirstein / vnd wegen vnser Herzog Jo-  
hansen des Eltern / Syuerdt Ranzow zum Nyen-  
hause / vnd Doctor Hieronimus Olgardt Canz-  
lern / vnd vnseren Herzogen Adolffen halber / Be-  
nedictus von Alfeldt zu Haseldorff / vnd Doctor  
Adam



Adam Trakigern Canklern/ eine gewisse bestendi-  
ge Landtgerichts Ordnung/ aus beschriebnem ge-  
meinem / auch Sachssischem Rechte / mit fleis zu-  
sammen ziehen vnd verfertigen / dieselben auch vn-  
ser ganzen getreüwen Landtschafft fürhalten/ vnd  
ir bedencken darauff erfördern lassen / Welche vor-  
ordnung von inen bewilligt vnd angenommen / die  
wir euch allen sampt vnd besonder / auch allen den  
jenigen / so für vnserm verordneten Landtgericht/  
im Recht zuthunde haben / auch künfftiglich zu-  
thunde haben werden/ hiemit *Publiciren* vnd verkün-  
digen. Vnd gebieten darauff ernstlich allen vn-  
sern Rethen / verordneten *officirern* / auch allen vnd  
jeden/ die für solchem vnserm Landtgerichte zuthun-  
de haben / oder künfftiglich zuthunde haben wer-  
den / das sie sich dieser vnserer verordnung durch-  
aus gemes erzeigen / sich darnach richten vnd hal-  
ten / alles bey vermeidung vnserer vngnade vnd  
straffe / nach vnserm ermessen / Denen so diese vn-  
sere Landtgerichts Ordnung obertretten werden/  
auffzulegen. Doch sollen bis auff diese vnser  
*Publication* den Parteien die *fatalien* ihrer Rechtthens-  
gigen sachen nicht verfließen / noch einig theil an  
seinem Rechten sich verschweigen mügen / Son-  
dern sollen alle Proces / ohne der Parteien gefehr  
oder nachtheil mitlerweile *suspendiret* vnd aufge-  
schoben

A iii



schoben sein / Wornach ein jeder sich habe zu  
richten. Geben vnter vnseren Königlichen vnd  
Fürstlichen Secreten / Montags nach *Quasimodo-*  
*geniti*, im Jare nach Christi vnseres Herren vnd  
Seligmachers geburdt / Fünffzehn  
hundert vnd im drei vnd sieben  
zigsten.

Privat

**B**  
Bü  
stein  
ren

**S**  
Und von  
Adolf /  
Schlesien  
marschen  
herst /  
len vnd  
sichtigen  
guttacht  
willigum  
liche beset  
gen / vnd  
also in de  
ben getre  
zu Ham  
uerhuet



**Privilegium / Dem**  
Buchtrucker gegeben / das diese Hol-  
steinische Landgerichts Ordnung in zehen Jas-  
ren nicht sol nachgetruckt / noch in diesen Für-  
stenthumben feill gehabt werden.

**W**ir Friedrich der ander von  
Gotts gnaden / zu Dennemarck / Nor-  
wegen der Benden vnd Gotten König /  
Vnd von desselben gnaden / Wir Johannis vnd  
Adolff / Erben zu Norwegen / alle Herzogen zu  
Schlesßweig Holstein / Stormarn vnd der Dith-  
marschen / Brauen zu Oldenburg vnd Delmen-  
horst / Beuetter vnd Gebrüdere. Entbieten als  
len vnd jedern dieses vnsers offenen beuelichs an-  
sichtigern. Nach deme wir auff bedencken vnd  
guttachten vnserer Rethe / auch vorwissen vnd be-  
willigung vnserer getrewen Landschafft eine form-  
liche beschriebene Landgerichts Ordnung vorferti-  
gen / vnd in druck ausgehen lassen / dieselbige auch  
also in druck zubringen / Dem Ersamen vnserm lie-  
ben getrewen Nicolaus Wegenern / Buchtruckern  
zu Hamburg beuolen vnd aufferlegt / Vnd aber zu  
uerhütung ermeltes Buchtruckers nachtheil vnd  
schaden /



schaden die notturfft zu sein bedacht vnd angese-  
hen / inen mit vnserer besondern begnadigung vnd  
freiheit zuuersehen / damit andere solche Landtge-  
richts Ordnung nicht nach zutrucken vnd in vnsern  
Fürstenthumben / vnd gebieten zuuorkauffen sich  
vnderstehen. Demnach gebieten vnd beuelen wir  
hiemit ernstlich / vnd wollen das in zehen Taren/  
den negstfolgenden / keiner sich vnderstehen solle / ei-  
nig ander Exemplar / Als die gemelter / Nicolaus  
Wegener gedrucket / in vnserm Fürstenthumb vnd  
gebieten zubringen / feil zuhaben vnd zuuorhand-  
len / Alles bey vormeidung vnser vngnad / vnd ei-  
ner Geldtstraff / Nemblich hundert Taler / so oft  
hiewieder gehandelt wirt / neben vorlust aller Ex-  
emplaria vns zum halben theile / vnd den vbrigen  
halben theil / ihme gedachten Nicolaus Wegener  
vnnachlessig zubekalen / Darnach hab ein jeder  
sich zurichten. Gegeben vnter vnsern Könige-

*Quasimodogeniti* , im Tare nach Christi vnser  
Seligmachers geburdt / Fünffzehun-  
dert vnd im drei vnd siebenzig-  
sten / etc.

Regio



Register der Titulen eines jbern Theils/  
dieser Landtgerichts Ordnung.

Tit: Des ersten Theils.

1. Von den vntergerichten / vnd wie es hinfuro  
mit denselben gehalten werden soll.
2. Von den Vntergerichten der Empter.
3. Von den Vntergerichten / der Prelaten/ vnd  
deren vom Adel.
4. Von den Vntergerichten in Stetten.
5. Von dem Reichrechte.

Des andern Theils.

1. Von der regierung vnd dem Landtrechten.
2. Von den Landtrechstagen im Herzogthumb  
Schlesßweigk.
3. Von dem Landtrechten im Fürstenthumb  
Holstein.
4. Von den Notarien des Landtgerichts.
5. Von den Aduocaten.
6. Von den Procuratorn.
7. Von Kriegischen Vormündern / *Curatores ad  
litern* genendt.
8. Von den Berichtsbotten.

B

Eidt



9. Eidt der Gerichts Notarien.
10. Der *Curator ad litem*, oder Kriegischen Vormünder Eidt.
11. Der Gerichtsbotten Eidt.
12. Von den Armen Parteien vnd derselbigen Eide.

### Des dritten Theils.

1. Von den sachen/die durch Appellation an vnser Landtgericht erwachsen.
2. Von Ladungen *Compulsoriale* Mandaten vnd andern processen.
3. Von *Sequestration* vnd arresten.
4. Von Pfandungen vnd gefangenen.
5. Von der Klage.
6. Von der Kriegesbeuestigung vnd dem Eide für gefehrde *Calumnia* genennet.
7. Form des Eides für gefehrde.
8. Form des Eides bössheit zuuermeiden.
9. Von *Contumacien* vnd vnghehorsamb.
10. Von *Reconuention* vnd Zegenklagen.
11. Von den zerstörlichen auskügen / *peremptoria exceptiones* genennet / vnd Form der Eide *dandorum* vnd *respondendorum*.
12. Von beweisung durch zeügen.

Von



13. Von Fragestücken.  
14. Von der Zeügeneidt.  
15. Welcher gestaldt / nach beeidigung der Zeü-  
gen das *Examen* fürgenommen werden/  
vnd geschehen sol.  
16. Von den Zeügen die außserhalb vnseres Für-  
stenthumbs geseßen.  
17. Von zeit der Zeügen verhörung.  
18. Von gezeügnus / die *ad perpetuam rei memoriam*  
auffgenommen wirt.  
19. Von beweisunge durch Brieffliche vrfunde.  
20. Von beweisung durch augenschein.  
21. Von dem Eide *in supplementum* so zu ergänzung  
vorgeleister kundtschafft geschworen wirt.  
22. Von dem Eide *decisorium litis* genennet / das  
durch die ganze sache entscheiden vnd auff  
gehoben wirt.  
23. Von eröffnung der Zeügen aussage / vnd was  
darnach zuhandlen.  
24. Von *Publication* vnd eröffnung der endurtheil.  
25. Von *Expensen* vnd Gerichts kosten.  
26. Von *Execution* vnd vollstreckung / an vnserem  
Landtgerichte gesprochener vrtheile.



## Des vierdten Theils.

1. Von welchen vrtheilen / an vnserm Landtgerichte ergangen / Appellirt werden sol.
2. Form des Eides / welchen der Appellant zuschweren schuldig.
3. Von handthabung dieser vnser Landtgerichts Ordnung.
4. *Constitution* von wegen der Frewlichen gerechtigkeit so der Haubenbandt genennet.
5. Priuilegium der Stette des Fürstenthumbs Holstein.
6. Priuilegium Keiser Maximiliani des andern / die Appellationes vom Holsteinschen Landtgerichte an das Kay: Cammergericht betreffendt.
7. *Confirmation* Keiser Maximiliani / auff das Priuilegium Keiser Friederichen / des dritten / das in erster Instanz keiner aus dem Fürstenthumb Holstein / für frembde vnd auslendische Gerichte sol gezogen werden / welcher *Confirmation* der wortliche inhalt desselben Priuilegij *Originalis inserit* ist.

Das



# Das erste theil.

Von den vntergerichtten / vnd wie es  
hinsuro mit denselben gehalten  
werden soll.

## TITVLVS PRIMVS.

**E**S hat es bis anhero die erfaren-  
heit ausgeweiset / das in den vntergerich-  
ten manigfaltige mangel vnd gebrechen / zu  
nachtheill der streitigen Parteien durch hinleßigkeit /  
auch bisweilen Parteiligkeit vnd sonderbaren affe-  
ctionen der Gerichtsuertwaller in den vntergerichtten  
sich zugetragen / Demnach wir / als die von Gott  
verordente Obrigkeit vnd Landesfürsten vns schül-  
dig erkennen / derwegen gebürlich einsehen zuthun /  
das niemands das ordentlich Recht / versagt / oder  
verzogen / oder sonst in andere wege an seinem Rech-  
ten jemandts verfürzt / vnd benachtheilt werden mü-  
ge / Haben demnach solche mangel vnd seümbnus  
hinsuro zuuorkommen vnd zuersetzen folgende ver-  
ordnung gethan.

B ij

Von



Von den Vntergerichten der  
Embter.

TITVLVS SECVNDVS.

**A**s in den vntergerichten vnser Em-  
bter in beiden Fürstenthumben Schlesweig  
vnd Holstein es hinfuro nach alten gewön-  
lichen Landtrechten sol gehalten werden/ dergestalt  
das von den Vnterthanen keiner / wieder den an-  
dern mit der that sich vergreiffe/ Sondern inen vor  
dem dinge vnd Rechten darunter derjenige den er  
zubeklagen vermeinet / geseßen ist / mit recht furne-  
men / vnd besprechen sol / Zu der behuff sollen vnse-  
re Ambtleüt vnd derenselben vntergesetzte beuelich-  
habere / daran sein / das sie als oft solchs immer  
gesehehen kan / ding vnd Recht halten / vnd einem  
jdem / vnuerzüglich vnd vnparteilich recht wieder-  
faren lassen / Auch die vernehmung thun / das in den  
Vntergerichten des Herzogthumbs Schlesweig  
keinem theil auff sein ansuchen gewöhnliche dings-  
winde versagt werden. Im Fürstenthumb Holstein  
aber / sol der Ambtschreiber oder eine andere / durch  
den Ambtman darzu deputirte taugliche Person  
klag vnd antwort verständig auffschreiben / auch  
richtig verzeichnen / womit klegler sein klage vnd der  
beklagte seine antwort vnd auszug beweisen wolle.

Was



Was auch ein ider theil gegen des andern theils be-  
weisung für einrede gehat / vnd was auff solches  
alles die Berichtsleute gefunden vnd erkandt ha-  
ben / Begebe es sich den / das ein theil / Klegler oder  
Beklagte sich an solcher scheidung vnd findunge  
beschweren / vnd nicht benügen lassen wolte / So  
sol demselbigen frey stehen / die vrtheil nach alter  
Landes gewonheit zuschelten. Im Herzogthumb  
Schleswig nach altem gebrauch vnd verordenun-  
ge des Lobuchs / vnd im Fürstenthumb Holstein  
nach Landes gewonheit / bis auff einen vnsers mit-  
tels deme dasselbige Ampt darinne die sache erslich  
verhöret / vnd entscheiden worden ist / zubehörig/  
vnd sol also dem langen gebrauch vnd herkommen/  
eines idern orts des Fürstenthumbs Holstein vnter  
den Embtern die Appellation nach sonderbarn ges-  
brauch eines idern orts / Als in der Marsch für die  
Wilster / vnd Steinburg / vnd volgendts für die  
zwelff sichere Menner / Vnd auff der Geist / wie es  
jedes orts bisanhero gebreüchlich gewesen / zugelas-  
sen sein / vnd daran nichts verendert werden. Zooch  
wollen wir / das mit fleissiger verzeichnis was die  
Parteien für einem idern Bericht für vnd einbrin-  
gen / gleich wie in dem ersten ding vnd Recht / gute  
richtigkeit gehalten / vnd solches alles mit fleis auff  
geschrieben werde.

Was



Was auch belanget die Burgschafft die von  
altenshero der Appellant für berürten Vnterge-  
richten bestellen müssen / demselben sol hiemit auch  
nichts benommen sein. Wan nun die sachen erdent-  
lich vor den Vnterlandtgerichten gerechtfertiget/  
sol die letzte Appellation an denen vnser<sup>s</sup> mittels/  
deme / wie obstehet / das Ambt zub. / geschehen  
m<sup>ö</sup>gen / Darauff wollen wir dem Appellanten  
*Citation* an den Appellaten mittheilen lassen / auch  
einen Zwangbrieff an die Vntergericht dem Ap-  
pellanten die verzeichnis / was in den Vntergerich-  
ten für vnd eingebracht / volgen zulassen / Vnd wol-  
len den zu vnserer gelegenheit / solche sachen / neben  
vnsern Rethen verhören / oder verhören lassen / vnd  
darin erkennen / was recht / dabey es dann entlich  
bleiben sol.

Truge es sich auch zu / das einer vnserer Ambts  
Vnterthanen sich gegen vns beklagen würde / das  
jme durch vnserm Ambtman oder andere darzu in  
sonderheit befehligte beambten rechtens nicht ver-  
holffen würde / Vollen wir desselben Ambts Erbo-  
herr / an denselbigen vnsern Ambtman *promotoriales*  
ergehn lassen / solchem vnserm Ambts vnterthanen  
gegen seinen widerert<sup>el</sup> dinge vnd Recht / zulegen /  
vnd was nicht zulassen / auff masse wie obste-  
het.

Würde



Würde nun solches nicht geschehen / wollen wir  
des Ampts Erbherr / solchs vorsagens oder verzo-  
genen Rechtens halben / die sachen für deuoluit an-  
nehmen / dem Kleger ladunge wieder den jegentheill  
mittheilen / die sachen verhören / vnd darinnen ge-  
schehen vnd ergehen lassen was recht sein wirt / Da-  
mit also die armen Vnderthanen sich keines vnbilli-  
gen auffzuges in iren wolbesügten Rechten zubekla-  
gen haben mügen / Vnd soll solche verenderung der  
verschung des Lobuchs im Fürstenthumb Schlesi-  
weig in alle wege vnuerfenglich sein.

Von den Vntergerichten der Pre-  
laten vnd deren vom Adel.

TITVLVS TERTIVS.

**W**Als aber die Vntergerichte der Pre-  
laten vnd deren vom Adel belangen thut / se-  
hen vnd ordnen wir / das damit folgende be-  
scheidenheit vnd vnterscheidt gehalten werden soll/  
Nach dem im Fürstenthumb Schlesiweig mehrern  
theil der Prelaten vnd deren vom Adel Leüte / vnter  
den gewöhnlichen dingen der Embter zu Recht gehen/  
vnd sunst viel ihr eigen Recht haben / Soll es dar-  
bey gelassen werden / vnd einem idern theil das sich  
beschwert



beschwerdt befindet / die Appellation oder Schots-  
mal nach altem gebrauch vnd herkommen / ermels-  
tes Fürstenthumbs Schlesweig frey stehen / alles  
nach ausweisung des Landtgebrauchs vnd Lo-  
buchs / Were es aber sache / das ein Prelat oder ei-  
ner vom Adel von einem Bunden oder Lansten be-  
klagt würde / sollen nach inhalt der Priuilegien die  
Bunden vnd Lansten vber denselbigen Prelaten/  
oder den vom Adel nicht zurichten haben / sondern  
es sol die sache ohne mittel für vns / vnd vnserer ver-  
ordenten sambtlichen Regierunge fürgenommen/  
vnd anhengig gemacht werden / Wolte aber der  
Prelat / oder vom Adel einen Bunden oder Lansten  
mit Rechte besprechen / das sol er thun vor dem ge-  
wöntlichen Landtgedinge / des Ambtes darunter  
der Beklagte gefessen / Welch theil dan an der vr-  
theil sich nicht benügen lassen wolte / es sey den der  
Kleger oder Beklagte / dem soll frey stehen / sein  
Schotsmal zuschießen / vnd die vrtheil zuschei-  
ten / nach altem Landtsgebrauch vnd dem Lobuch/  
Vnd darauff volgendts das jenige so geklagt vnd  
geandtwortet / auch von beiden theilen für beweis/  
fürgebracht gewöhnliche Dingeswinde innehaben  
vnd einzubringen / Darauff wollen wir die sachen  
annemen / dem Appellanten *Citation* wieder sein je-  
gentheil mittheilen / vnd was recht ist / endlich  
spres



sprechen vnd erkennen lassen / darbey es dann / als  
bey den höchsten ausgehenden Rechten bleiben  
sol.

Im Fürstenthumb Holstein sol es auch also  
werden gehalten / das der Prelaten vnd deren vom  
Adel Leute / für irer Herrschafft gewöhnlichem Din-  
ge vnd Rechte ein ander zu Recht fürdern / vnd  
rechtlichen entschiedts gewarten / Der dan an sol-  
chen entscheidet vnd findunge nicht begnüget sein  
wolte / sol nach altem Landtsgebrauch appelliren  
mögen / Vnd derjenige dem die findunge nicht an-  
nehmlich dem alten gebrauch nach / die vrtheil fer-  
ner zuschelten haben.

Wer dan nu dieselbige vrtheil an dem letzten vn-  
tergerichte gesprochen zu straffen vermeinet / Dem  
sol frey stehen / an vns vnd vnserer sembtliche veror-  
dente Regierung / die vrtheil zuschelten / idoch das  
alle zeit derjenige / welcher die vrtheil schelten wil /  
sich vorbürgen sol / wie von altershero sittlich vnd  
gewöhnlich gewesen / Auff solche Appellation sollen  
dem Appellanten Ladung jegen sein widertheil /  
auch *Compulsoria* was in den vntergerichten beuorn  
gehandelt / werden mitgetheilt / Vorauff dan die  
sache auff dem negsten Landt Rechtstage für vns  
vnd vnserer verordenten Regierung verhöret / vnd  
was recht ist gesprochen vnd erkannt werden sol /

§ ii

dar



darbey es auch ohne ferner Appellation sol bleiben  
vnd gelassen werden.

Gleicher gestalt sol es auch gehalten werden/  
da einer vom Adel oder ein Prelat eines andern  
Prelaten oder vom Adel vnderthanen / mit Recht  
zubespochen / Das sol er thun / von desselben Pre-  
latten oder Zuckern dinge vnd Recht / darunter der  
Beklagter gefessen / Vnd sol derjenige der sich der  
scheidunge beschwert empfindet / dauon nach alter  
gewonheit / sich zuberuffen haben / Aber das aus-  
gehende Recht / soll sein an vns vnd vnser sembt-  
liche verordente Regierung / Darauff sollen auch  
*Citation* vnd *Compulsoriales* , auch wo es nötig / Inhi-  
bition dem Appellanten werden mitgetheilt / die  
sache verhöret / vnd was recht erkennet / dar bey es  
auch entlich bleiben sol / Hette auch ein Ambtman  
wegen seines Herren / ein Prelat oder einer vom  
Adel einen Ambts vnderthanen oder seiner eigenen  
Leute mit Rechte zubespochen / Den sol er mit ge-  
waltsamer tadt nicht beschweren / sondern ihme  
Ding vnd Recht legen / Vnd soll jeder von beiden  
theilen der sich der vrtheil beschweren thut / von  
demselbigen ding / nach alter gewonheit / vnd wie  
obberürt / sich zuberuffen haben / Vnd von derselbi-  
gen findunge sol den Parten die Appellation / wo  
fern der Beklagte ein Ambts vnderthan ist / an den  
Herrn



Herrn vnfers mittels / dem das Ambt zugehörig/  
Vnd aber / wo der Beklagte eines Prelaten oder  
Edelmans vnderthan ist / an vns / vnd vnser  
sambtliche verordente Regierung frey stehen / vnd  
fürter mit ausbringung der ladunge vnd *Compulso-*  
*rialn* gehalten werden / wie vor berürt. Was dan  
darauff vor vns vnd vnser verordente Regierung  
zu Recht erkennet / vnd ausgesprochen wirt / dar-  
bey sol es auch ohne weitere Appellation gelassen  
werden.

So viel aber Prelaten / die Ritterschafft vnd  
Stedte belangen thut / do einer vnfers mittels vn-  
ter denen jemandts zubespochen / das soll er mit  
Recht fürnehmen / vnd ausführen / vermüge der Pri-  
uilegien / In gleichen es gehalten werden soll / do  
jemandt von Prelaten Ritterschafft vnd Stedten/  
einen vnfers mittels mit Recht besprechen wollen/  
vnd ob die sache ein Ambtsache were / Soll der  
Ambtman desselben Ambts / von dessen vnfers mit-  
tels Herrn wegen / dem das Ambt zugehöret / *Citirt.*  
vnd der Proces vermüge dieser Landtgerichts  
Ordnung fürgenommen vnd aus-  
geführt werden.

§ iij

Aber



Von den Vntergerichten in  
Stedten.

TITVLVS QVARTVS.

**A**ber in den Stedten / sol es mit den  
Vntergerichten dergestalt gehalten werden/  
das die Vntergerichte wol bestellet / vnd die  
vöri gen mengel vnd gebrechen abgeschafft werden/  
nach ausweisung vnser Anno 62. den Stedten ge-  
gebner Ordnunge vnd bestettigunge dauon Copi-  
zu ende dieser vnser Landtgerichts Ordnung zube-  
finden / mit der Appellation an die drey Stedte  
von der vierdten / also Kiel / Tzehoe / Kendesburg  
vnd Oldeschlo / Sol es solcher vnser begnadunge  
auch gleichförmig werden gehalten / Doch das all-  
wege die vierdte Stadt / in welcher die vrtheil / da-  
von Appellirt / gesprochen / dazu nicht gezogen wer-  
de / sondern der verhör vnd des Rathschlages sich  
enteußern sol / Wir wollen auch hiemit ernewert  
vnd bestetigt haben / vnser vörige begnadigunge  
auff die Appellationes die in ehlichen bescheiden-  
lichen fellen / in angeregter vnser begnadunge specifi-  
ciret / nicht zugelassen werden sollen / in gleichen  
es darben bleiben sol was wir in zuleffigen Appel-  
lation sachen / muthwillige gefehrliche auffschube  
des



des rechtens zuuorhüten / auch von wegen der vorsicherung auff die Refusion / der Expensen vorordnet / Vnd sol hernacher mit den Untergerichten in den Stetten also werden gehalten / do ein Prelat oder vom Adel oder auch Bürgerlichs oder Bauern standts Personen / einen Bürger oder Einwohner einer Stadt worumb zubeklagen / sol er / solche klage nach gewonheit derselben Stadt vnd vörligem altem gehaltenen gebrauch für dem Nidrigstem Stadtgerichte / oder ohne mittel für Bürgermeister vnd Rath derselbigen Stadt fürbringen / vnd nach Ordnung solchs gebrauchs vnd oblichen Stadtrechtens verfahren / Vnd sol / wie es an eßlichen örten hieueorn gehalten worden / so durch unsere sakinge vnd verordnung nicht auffgehoben / nachmals vnd hinfuro auch gehalten werden.

Würden aber Bürgermeister vnd Rath in den Stedten befinden / die sachen der wichtigkeit zu sein / das die Parteien gegen einander Schriftlich billig vorsehen solten / Sollen Bürgermeister vnd Rath in den Stedten auff befundene wichtigkeit der sachen / inen den Parteien schriftlich iegen einander zuhandlen auffzulegen macht haben / Zdoch das solchs *summarie de simplici & plano* ohne alle weithleüfftigkeit des Processus geschehe / Welchs wir denne / der Richter *discretion* vnd bescheidenheit



heit hiemit wollen beuolen haben/doch sollen gleichwol die *substantialia* vnd wesentliche stücke des Processus gehalten werden/ Nemblich klage antwort beweiß vnd gegenbeweiß / vnd das ein ider theil nach gefürtem beweiß alle seine rechtliche notturfft in zweien Sakschriefften einbrenge/ vnd damit zum vrtheil beschliesse.

Es werden auch der sachen Richtere / in den Zeugsachen mit fürstellung auffnemunge vnd vereidunge der gezeugen/ In gleichen auch auffnemunge Briefflicher vorkunden / wie sich das von Rechetwegen gebüret / damit keine nullitet begangen werde / sich zuuerhalten wissen / Was nun auff solch beider theil rechtlich einbringen vnd darauff eruolgten beschlus erkennet wirt / dadurch der eine oder ander theil sich beschwert zu sein vermeinet/ dauon sol ime in den fellen / darin durch vnser vörige begnadunge die Appellation zugelassen/ Doch auff masse/ wie des *Iuramenti calumnia*. auch des furstandts halben darbey berürt/ an vns vnseres Mittelherrn dem das Ambt / in welchem solche Statt gelegen / zustendig ist / sich zuberuffen frey stehen/ Derselbige Appellant sol auch schuldig sein / bey Peen der desertion solche seine Appellation in den negst folgenden sechs Wochen anhengig zu machen / Darauff sollen dem Appellanten gebürliche

Proces  
fers mit  
massen  
aus den  
vnser  
verhören  
lassen.  
Wär  
kenntnisse  
gelassen se  
dente sem  
res aus zub  
meinen Lan  
sequen /  
nach zukom  
Necht dar  
wirt/ die g  
Beg  
Bürger ein  
ein Bürger  
so sollen die  
Richtere se  
Rathman  
noch sitzen  
stehen / al  
wort gebe



Proces werden mitgetheilt / Vnd wil ein nder vn-  
fers mittels auff zeit in der *Citation* bestimmet / In  
massen wir dann solchs in den Appellation sachen  
aus den Embtern halten wollen / selbs oder durch  
unsere Kethe in den Fürstenthumben die sachen  
verhören / vnd ferner erkentnus darinnen ergehn  
lassen.

Würde den der eine oder ander theil solcher er-  
kentnisse sich auch beschweren / Dem sol hiemit zu-  
gelassen sein / für vns vnd vnsern gemeinen veror-  
dente sempliche Regierunge zu Appelliren / Pro-  
ces aus zubringen / vnd auff den negstfolgenden ge-  
meinen Landrechts tag seine Appellation zu Pro-  
sequiren / Deme er auch ben verlust der sachen also  
nach zukommen schuldig sein sol / Vnd sol ime das  
Recht darauff eröffnet / vnd wie hernach folgen  
wirt / die gebür verhoffen werden.

Begebe sichs aber das in einer Stadt ein  
Bürger einen seiner gemelten Obrigkeit / Es were  
ein Bürgermeister oder Rathman zubeklagen het /  
so sollen die andern Personen des Raths der sachen  
Richtere sein / vnd der beklagte Bürgermeister oder  
Rathman in seiner eignen sachen nicht mit richten  
noch sitzen / Sondern aufstehen / vnd für Bericht  
stehen / als Beklagter auff die Klage rede vnd ant-  
wort geben / vnd die sachen zu des Raths / so sitzen  
bleibt /



bleibt / erkenntnus stellen / Er sol sich auch wan die  
sache berathschlaget wirt / als eine Partey solches  
rathschlages eüßern vnd abtreten / Weren auch  
noch etwan in dem Rath etliche Personen die dem  
Klegere naher Blutuerwandtnus halben / oder  
aus andern erheblichen rechtmessigen vrsachen ver-  
dechtig / do dieselben aus eigener bewegnus nicht  
auffstehen / vnd abtreten würden / hat der Kleger  
oder Beklagter die vrsachen seines verdachts anzu-  
ziehen / vnd zu der andern des Raths erkenntnus zu-  
setzen / Ob solche vrsachen gnugsam / worumb sol-  
che ihme verdecktliche Rathspersonen in solcher sa-  
chen / der gerichtlichen erkenntnisse / sich billig ent-  
halten sollen / wan nun auff vorgehendt der sachen  
verhörung der Kleger oder Beklagter an der aus-  
gesprochenen vrtheil keinen benügen haben wolt /  
sol ihme die Appellation frey stehen / in dergestalt /  
wie hiebei vorn / auff den fall ein Bürger in einer  
Stadt beklaget wirt / der Appellation halben ver-  
ordnet / Würde es aber fürfallen / das imandts  
Bürgermeister Rath oder ganz *Commun* einer Stat  
beklagen wolte / Oder aber ein Bürger oder Ein-  
woner einer Stadt / den Rath derselben Stadt  
zubeklagen vermeint / Derselbige Kleger sol in er-  
ster Instanz seine sachen anhengig machen / für  
dem Herrn vnser mittels / welchem das Ambt zu-  
stendig



stendig ist / darinne die beklagte Stadt belegen/  
oder deren Stadt Bürgermeister oder Rath be-  
klagt würden/daselbst die sache sol werden rechtlich  
ausgeführt/vnd darauff ein enturtheil gesprochen/  
Vnd sol ferner/ wie obstehet/ vermüge der Priuile-  
gien gehalten werden. Würde sich dan der Kleger  
oder Beklagter der gesprochenen vrtheil vermeinen  
beschwert zu sein / sol er macht haben / an vns vnd  
vnsere verordente samptliche Regierung zu Appello-  
lire / vnd seine Appellation innerhalb sechs wochs  
en den negsten anhengig zu machen/ Vnd sol in dies-  
sen vnd andern fellen / in mündtlichen Processen/  
der jennige/ welcher durch die vrtheil sich beschwert  
zu sein vermeint / in *continenti* vnd stehendes fusses/  
seine Appellation thun / mit kurzen vnd gemeinen  
worten / das er sich durch die vrtheil beschwerdt  
empfinde / vnd demnach Appellire / Die vrsachen  
aber solcher beschwerunge darff er als denn nicht  
specificiren / vnd hat alleine seine Appellation an-  
hengig zu machen vnd zu verfolgen. In Schrift-  
lichen Processen aber/ mag gleicher gestaltd der be-  
schwerte theil nach gesprochenem vrtheil in *continenti*  
mündtlich Appelliren ohne specification der vrs-  
sachen seiner beschwerung die er den volgents in der  
*prosecution* der sachen zu deduciren / Würde er aber  
als baldt *vina voce*, wie obstehet / sich von dem ge-  
sproch-

D ij

sproch



gesprochenem vrtheil nicht beruffen/ sondern sein Ap-  
pellation schriftlich vbergeben wollen/ Solchs sol  
er thun/ einschlislich innerhalb zehen tagen/ den  
negsten nach gesprochenem vrtheil/ Vnd sol in sol-  
chem Appellation zettel die vrsachen seiner beschwe-  
rungen vnd Appellation specificiret vnd austrüg-  
lich anzeigen/ Vnd stehet in des Appellanten gefal-  
len/ ob er seinen Appellation zettel in offenem Be-  
richt vbergeben/ oder für Notarien vnd Zeügen sol-  
che Appellation thun/ vnd darauff ein Instrument  
an statt der Testimonial Aposteln nehmen wolle/  
Doch sol er dem Richter *à quo* solche Appellation  
innerhalb dreissig tagen zu *notificiren* vnd zuuorkün-  
digen/ auch wie obberürt sein Appellation mit aus-  
bringunge nottürfftiger Proces zu prosequiren vnd  
anhangig zumachen/ schuldig sein. Wen auch dem  
Richter erster Instants/ die Appellation zukümpt  
vnd verkündigt wirt/ Sel er der ersten Instanz  
Richter/ in der sachen nicht verfahren/ sondern ime  
dadurch die hende geschlossen sein/ bis zu der Appel-  
lation sachen rechtliche ausfürunge vnd entschafft/  
Vnd wir vnd vnser verordente Regierung sollen  
vnd wollen/ dem Appellanten auff sein gebürlich  
ansuchen wieder den Appellaten ladunge/ vnd wie-  
der den Richter *à quo inhibition* vnd *Compulsoria* mit-  
theilen lassen/ vnd auff vörgehende Proces vnd der  
Appel-



Appellation sachen rechtliche *deduction* sprechen vnd  
ergehn lassen/ was recht ist.

Ob nun die Stadt oder der Rath so in lite ist/  
vnter dem Herzogthumb Schlesweig begriffen/  
Nach dem die worte der Priuilegien König Chris-  
tian des ersten / Anno 1460. Mitwochens nach  
Innocent zu Ripen datirt also lautend. Vñ  
schölen wy nemandt vñ düssen Landen vorgeschre-  
uen in saken/ de Lyff edder guds andrenen / vor vns  
laden tho Rechte / Men ein izlich schal in sodanen  
saken syn Recht söken binnen Landes / alse sich ge-  
böret/ Sol solche erkentnus das ausgehende Recht  
sein / vñ die sache so wenig als in erster Instanz  
*simplicis querela*. Also auch in volgender Instanz  
durch Appellation Supplication / oder andere  
mittel aus dem Fürstenthumb Schlesweig an an-  
dere örter vñ für andere Berichte nicht gezogen  
werden/ Sondern in den Fürstenthumben werden  
exequirt/ wie hernacher im dritten theil dieser Landt  
gerichts Ordnung vnter dem Titel von Execution  
gesprochener endturtheil verordent vñ gesetzt ist.

Wer aber die Stadt oder derselben Rath in  
dem bezirck der Fürstenthumb Holstein vñ Stor-  
marn begriffen/ Solches falles sol die Appellation  
an das Keyserlich Cammergericht anderer gestalt  
nicht sein zugelassen/ den auff gestalt vñ mass des

D iii

Key:



Key: Priuilegij/ dauon glaubwirdige Copel dieser  
vnser Landtgerichts Ordnung zu endt angefügt/  
Vnd wie solches ferner in dem dritten theil der  
Landtgerichts Ordnung vnter dem Titel von den  
Appellation sachen / *disponirt* vnd verordnet ist/  
Zdoch sol in erster Instanz die sache aus dem Fürs-  
stenthumb Holstein vnd Stormarn vnter ander  
Gericht vnd Oberkeiten nicht werden gezogen / in-  
halts Key: Friederichs des dritten gegebenen Pri-  
uilegij / Vnd darauff der izt regierenden Key:  
Mayt: erlangter *Confirmation* vnd bestettigung/ des-  
ren laut vnd inhalt zu ende dieser Landtgerichts  
Ordnung auch zubefinden. Was aber sonst  
ausserhalb des exercitij des ordentlichen rechtens  
vnd der *Iustitien* die Stedte der Fürstenthumbe  
Schleszweig vnd Holstein belangen thut / Sol ei-  
nem idern Herren / vnser mittels in dessen Ambt  
eine idere Stadt gelegen / die inspection vnd auff-  
sicht Policen ordnung/ Reformation vnd was de-  
me allem anhengig ist / vnd sonst alle althero ge-  
brachte gerechtigkeit vber solche Stadt alleine sein  
fürbehalten/ In solchem allen gebürliche masse vnd  
ordnung zu geben / worin demselben Herren durch  
die andere beide vnser mittels nicht fürgegriffen/  
noch einige vorhinderunge oder eintragf zugefügt  
werden sol / Wan sichs auch begeben / das in einer  
Stadt



Stadt der Rath ersuchet würde / vber einen ihres  
Rathsuervanten / oder Bürger / oder Einwohner /  
Recht zuuerhelffen / Demselbigen aber das Recht  
kündlich versagt oder gefährlich vorzogen würde /  
so hat er sueg den Herrn / des Ambt die Stadt vn-  
terworffen / derwegen zuersuchen vnd vmb Promo-  
toriales zubitten / die ihme auch wie hieueorn da-  
von disponirt gefolgt werden sollen. Würde ihme  
aber darauff in der bestimbt en zeit das Recht nicht  
eröffnet / sol die sache *pro deuoluta* angenommen / vnd  
dem kleger ordentlichs rechtens verholffen werden.

Trüge sich auch also die gelegenheit zu / das der  
Beklagte eine grosse freuentschaft oder grossen an-  
hang von der gemeinde hette / oder der Rath im als  
so zugethan vnd dem Kleger zuwider were / das der  
Kleger sicher vñ one gefahr seines Leibs sein recht da-  
selbst nicht kunte ausfüre / In gleichem auch da dem  
beklagten solche widerwertigkeit vñ gefahr fürstün-  
de / sollē kleger oder beklagter die sich also beschwert  
befinden / *ratione loci non tuti* macht haben den Herrn  
vnser mittels vnter des Ambt die Stadt begriffen /  
zuersuchen / solcher seiner beschwerung zuberichten /  
vnd vmb ein rechtmessig einsehen zubitten / darauff  
wollen wir / der Her welcher also ersucht wirt / nach  
befundenen vmbstenden vnd gelegenheiten / auff vn-  
ser billig ermessen die sachen ohne mittel annemen /  
oder



oder aber den beschwerten theil durch vnser gleit vnd  
gebott in sicherheit stellen/ oder da befunden das der  
selbige Kleger oder Beklagter sich muthwillig vnd  
ohne grundt der vnicherheit halben beschweren thet-  
ten/ Die sachen an vöriger Instantz Richter remit-  
tiren vnd vorweisen.

## Vom Teichrechte in den Marsch Landen.

### TITVLVS QVINTVS.

**E**s ist meniglich den dieser vnser Für-  
stenthumben eingesehenen wissentlich/ Was  
treffentlich gefahr allen benachbarten darauff  
stiche/ wem die Teiche für den Marschlanden in irem  
beständigen wesen/ nicht erhalten werden/ Worumb  
es den von altershero nach löblicher Landts gewon-  
heit also gehalten worden/ Das die Teichrechte mit  
Teichgreuern vnd geschwornen ihre besondere ver-  
ordnung gehabt/ dergestalt was durch dieselben er-  
fandt worden/ das solches allewege *executionem para-*  
*tam* gehabt/ Vnd ohne einige Appellation oder an-  
dern auffschub vollzogen werden müssen/ Welche  
gewonheit aus den vernunfftigen begreifflichen ver-  
sachen her geflossen/ vnd bis auff diese zeit also er-  
uolgt



uolgt werden / die weil das gewisser Wetter vnd  
Windt auff niemandts wartet / Vnd dadurch die  
Appellation einiges theils die versertigung des  
Zeichs nachbleiben solte / das vnter des durch  
Sturm vnd vngewitter / das Wasser den Zeich  
durchbreche / daher alles Landt so vnter demselben  
Zeichsbande gelegen / oberlauffen / Leüte vnd Bihe  
ertrencken / die Heüser hinweg nemen / vnd das  
Landt gencklich verderben vnd wüst machen würde /  
Wie man dessen leider viel Exempel für sich hat.

Nun befinden wir aber gleichwol / vnd kom-  
men in glaubwürdige erfahrung / das etliche vnserer  
Vnderthanen bißweilen vnter dem schein ires Ap-  
pellirens die Zeiche vngemacht ligen lassen / Wor-  
umb alle benachbarte in mercklichen sorgen vnd ge-  
fahr stehen müssen / vnd das alte gewöhnliche Zeich  
recht nicht wenig dadurch geschwecht vnd verrü-  
cket wirt / Die weil aber solches / neben deme es höch-  
ste gefahr auff sich tregt / auch vnbillig vnd wider  
recht / Sezen vnd ordnen wir / das hinfuro / wie  
von altershero geschehen / ein ider auff der Zeich-  
greuen vnd geschwornen erkantnis / seinen Zeich  
fertigen vnd bessern solle / Doch sol allen Siegel  
vnd Briuen Contracten vnd vordregen hiermit  
nichts benommen sein / bey alter gewöpnlicher straff  
des Zeichrechts / vnd sol an solchem mit keiner  
recht



rechtfertigung/ Appellation/ Supplication/ oder  
vnter was schein solchs sonst geschehen möchte/ sich  
entschuldigen vnd auffenthalten / Zdoch ob sich ei-  
ner durch die Teichgreuen vnd geschwornen / oder  
sunst andere beschwerdt empfünde/ mag er wol sein  
Recht durch klag an gebürenden örten suchen/ oder  
so fern ime das Recht solchs zulest / an den negsten  
Oberrichter Appelliren / auch sein Proces verfol-  
gen / Es sol aber nichts desto weniger derselbige  
schuldig sein / nach erkantnus des Teichrechtens  
seine Teiche zu machen/ vnd zuhalten in iren besten-  
digen wesen / bis zu austrag des ordentlichen rech-  
tens/ Vnd ob zwischen den Parteien/ die irer Teiche  
halben streitig/ vnd von dem einen oder andern theil  
die Teichgreuen vnd geschwornen semplich oder  
zum theil verdecktig angezogen / werden wolten/  
Sollen aus andern Marschlanden andere vnpar-  
teiliche vthkeges oder auslendische Leüt / die in den  
Marschlanden vnter dem streitigen Teich belegen/  
nicht gefessen/ noch dem einen oder andern theil ver-  
wandt sein / dazu genommen / Vnd was dieselbi-  
gen nach besichtigung des mangelhafftigen Teich-  
es vnd gehörten aller theile bericht/ solchs streitigen  
Teichs halben sprechen vnd erkennen werden/ dem-  
selben sol ohn alle mittel volge geschehen / Vnd der  
jenige / dem solchs aufferlegt wirt / so lange in be-  
stendis

standig  
bis das  
anders  
werden  
Teichgre  
Teich v  
Sol ihm  
zeit vber  
weislich  
gerichtlic  
zunemen  
stet in be  
Vnd sol  
wornen er  
erkent he  
da



stendigem wesen / den Teich zuhalten schuldig sein/  
bis das am ordentlichen ausgehenden Rechten ein  
anders erkennet / Würde dann dahin geurtheilt  
werden / das derjenige / deme zu Teichen durch die  
Teichgreuen vnd geschwornen aufferlegget / den  
Teich von rechtswegen zuhalten nicht schuldig/  
Sol ihm sein kgentheil den vnkosten / welcher die  
zeit vber / auff das Teichen gegangen / zusambt bes  
weislichen daher verursachten schaden / idoch auff  
gerichtliche messigung zuerstatten / den Teich an  
zunemen / vnd hinfürder auff seinen eigenen vnko  
sten in beständigem wesen zuhalten / schuldig sein/  
Vnd sol sonst / so viel der Teichgreuen vnd gesch  
wornen erkentnisse anlangen mag / ob sie vnrecht  
erkent hetten / mit der straff nach altem gebrauch  
der Marschlande an einem idern ort  
gehalten werden.

E ii

Das



# Das ander theil.

## Von der Regierung vnd dem Landtrechten.

### TITVLVS PRIMVS.

**N**ach dem wir den Stenden / vn-  
serer Fürstenthumb als vnsern getreü-  
wen Vnderthanen zu gnadt vnd gutem/  
damit ein jder bey Ruhe vnd frieden ge-  
handthabt würde / vorschinen 1564. Jares den  
26. Monats tag Octobris zu Flenszburg der Lan-  
des Fürstlichen Regierung halben in vnsern Her-  
zogthumben Schlesiweig vnd Holstein / wie die vol-  
gender zeit bestellet vnd gehalten werden solten / vns  
freündtlich Vetterlich vnd Brüderlich mit einander  
vereiniget / Seidt wir bey solcher verglicheunge nach-  
mals zubeharren / vnd solche Regierung / wie die  
angefangen / vnd durch ierliche vmbwechselunge her-  
gebracht / nachmals continuiren vnd zuerfolgen ge-  
meinnet / Idoch auff masse vnd gestalt als solchs hie-  
beuorn von den Vntergerichten zu erklerunge ange-  
regter Regierungs Ordnung *in specie* gesetzet ist / vnd  
sol



heil.  
vnd den  
RINVS  
in Stenden  
als vñ  
u. grade vñ  
Ruhe vñ  
a 1564  
Stensburg  
alben in  
Holstein  
en werden  
iderlich mit  
er verglich  
Regierung  
vñ vñ  
vñ als  
zu erlennen  
here gescheh

sol ider zeit vnserß mittels der Herr / dem die Re-  
gierunge irer ordnung nach / erreicht / sich dabey  
halten vnd erzeigen / wie gedachter Glensburgi-  
scher abschiedt klerlich vnd im Buchstabe mitbrin-  
get / Ob nun wol der Justitien vnd hohen Landtge-  
richt halben in solchem abschiedt / so viel dazumal  
die zeit vnd gelegenheit leiden mögen / zimliche ver-  
sehung geschehen / Welche auch in etlichen Pun-  
eten durch sonderbare abschiede / nach gehaltenen  
Rechtstagen / zu Schleszweig vnd Rendsburg  
etwas vermehret vnd verbessert / Haben wir doch  
im werck erspüret / vnd befunden / das solche veror-  
denunge / eines mehrern zusatzes vnd eigentlicher  
richtigkeit zum höchsten von nöten / Den idermen-  
iglich so die Landt Rechtstag besuchet / augen-  
scheinlich gesehen vnd vernommen / was es für ein  
vnordnung verursacht / das die sachen aus dem  
Herzogthumb Schleszwig vnd dem Fürstenthumb  
Holstein vnter einander vermengt / gerichtlich für-  
gebracht / das auch die Schleszwigischen sachen /  
durch die Holsteinischen Proces darin mehrers  
theils Schriftlich verfahren / die Parteien auch  
weiln die sachen zu einer grossen anzahl sich auffge-  
heüffet / meriglich vorzügert vnd auffgehalten / et-  
wan mit schweren vnkosten vnd verseimnisse des  
ihren / eine geraume zeit zur stette ligen vnd auff-

E iij

war-



warten müssen / Doch die ganze zeit vber von wes-  
gen der sachen mennige / vnd vielfeltigkeit nicht für-  
kommen mügen / vnd also zu entschafft des Rechts-  
tages vnbeschaffener dinge dauon gezogen sein.

Zu dem auch befunden wirdt / das in den  
Schriftlichen Holsteinischen Processen / Ob wol  
in den vörigen abschieden / derwegen Ordnung vnd  
masse gegeben / die Parteien doch zu ihrem selbs et-  
genen schaden vnd nachtheil einander auffhalten /  
vnd die Producirung ihrer sakschriften dergestalt /  
wie es die vörigen abschiede mitbringen / nicht erfol-  
gen / neben viel mehr andern mengeln vnd gebreche-  
en / welche abzuschaffen / vnd den Process in gute  
vnstreffliche richtigkeit zubringen / die hohe not-  
turfft vnd gemeiner nuß erfördern thut.

Als wir nun zu volge dero von Gott dem All-  
mechtigen vnd befohlenen Obrigkeit auch sonderli-  
cher gnedigster gnediger vnd Beterlicher neigun-  
ge / die wir zu vnser getreuwten Landtschafft vnd  
Vnderthanen tragen / vns schuldig erkennen vnd  
geneigt sein / die Justitien zu handthaben / vnd was  
für mangeln daran sein möchten / zuserzen / vnd  
in vnstreffliche Ordnunge vnd richtigkeit zu brin-  
gen / Seint wir entschlossen / vormüge der Priuile-  
gien vnserer Fürstenthumb vnd obberürtes Flens-  
burgischen abschiedes hinfuro ides Jahres zwen  
Landts



Landtgerichte zuhalten / eines im Herzogthumb  
Schleszweig / das andere im Fürstenthumb Hol-  
stein / Vnd sol der erste im Herzogthumb Schlesz-  
weig achte tage nach Michaelis / vnd der ander im  
Fürstenthumb Holstein acht tage nach Ostern ge-  
halten / Vnd also hinfure ider zeit ombgewechselt  
werden / Doch mit dem vnterschiedt / das auff dem  
Landt Rechtstage im Herzogthumb Schleszweig  
keine Holsteinische / Sondern alleine Schleszwigi-  
sche sachen verhöret / vnd mit vrtheil vnd recht ent-  
scheiden werden sollen / Also sollen auch auff vol-  
gendem Landt Rechtstage zum Kall im Landt zu  
Holstein / keine Schleszwigische sachen / sondern al-  
lein die sachen / die sich im Fürstenthumb Holstein  
vnd Stormarn erhalten / in rechliche verhör ge-  
nommen vnd durch vrtheil vnd recht erörtert wer-  
den / damit also die sachen aus dem Herzogthumb  
Schleszweig mit den Holsteinischen Gerichtshen-  
del nicht vermengeset / vnd daher vnrichtigkeit vnd  
verzugs verursacht werde / Zu der behueff es her-  
nacher auch also gehalten werden sol / do ein Rechts-  
tag im Fürstenthumb Holstein einen Herren er-  
reichen würde / das derselbige solchen Rechtstag  
in einer seiner stette im Fürstenthumb Holstein /  
Vnd aber der Schleszwigischen sachen halben /  
wan die ordnung an einen vnser mittels gelang-  
gen



gen würde / in einer seiner Stedte des Fürstenthumbs Schlesiweig seinem ermessenn vnd vorfallenden gelegenheit nach / gehalten werden sollen / Vnd sollen solche Landt Rechtstage nach altem gebrauch vnd gewonheit / beider Fürstenthumbe eine geraume zeit zuuorn / den Vnderthanen verkündiget vnd ausgeschrieben werden / Damit ein jeder des wissenschafft haben vnd sich darnach richten möge.

Wenn auch also einer vnsers mittels einen Rechtstag halten wirt / Sollen wir die beiden andern unsere vom Adell vnd Rechtsgelarte Rethen darzu schicken / wie es hiebemorn gehalten worden ist / den Rechtstag mit zusitzen / vnd dem vnsers mittels / so den Rechtstag wirt halten / in der fürgebrachten sachen rechtlicher erörterung rathlich zu sein / beueligen.

Von den Landt Rechtstagen im  
Herzogthumb Schlesiweig.

TITVLVS SECVNDVS.

**W**ir ordnen vnd wollen zuuolge des  
altherkommenen gebrauches / das die Schleswigischen sachen die iders Rechtstages  
im



im Fürstenthumb Schleßweig fürkommen/ Ein-  
temal man sich keiner Appellation befahren darff/  
mündtlich fürgebracht / vnd *summarie de simplici &*  
*plano* darin gehandelt werden sol/ Also das der Kles-  
ger seine klage mündtlich fürbringe/oder aber auffß  
fürkte verfasst / in einer Supplication Schrifft  
obergebe / darauff sol der Beklagte mündtlich ant-  
worten / Würde er aber seinen Zegenbericht / auch  
in einer Supplication Schrifft obergeben wollen/  
das sol ihm sein zugelassen / Ob aber de Part wei-  
ter etwas fürtragen wolten / das sol mündtlich ge-  
schehen/ vnd fernere Schrifften zuobergeben/ inen  
nicht gestattet werden / Es were den das wir vnd  
die beysitzenden Rethen von wegen der sachen weit-  
leüfftigkeit vnd perplexitet/ notturfftiger informa-  
tion vnd der sachen richtigen verstandts halben/  
solchs nötig zu sein/erachten würden.

Wan nun beide theile also schleüning gegen ein-  
ander ihre rechtliche notturfft fürgebracht/ vnd ein  
theil dem andern seines fürbringens nicht gestendig  
sein wolte / Sol beiden theilen / oder dem einen al-  
lein / die sich auff beweis beruffen / seine beweisun-  
ge folgender gestalt zuführen / zugelassen sein / Wo-  
er dieselbige durch Sigel vnd Briue / Dingswin-  
de vnde andere vrfunden führen wolte / Sol er als  
S baldt



baldt vnd in *continenti* zu sterckunge seines fürbrin-  
gens/ dieselbige im Gericht vorleggen.

Was nun der jegentheil / wan er dieselben les-  
sen hören vnd Gopia dauon bekommen/ für einrede  
da wieder zu haben vermeint / Es sey denn / das er  
solche Brieffliche vrkunden straffen vnd wieder leg-  
gen/ oder durch andere Sigel vnd Briue getödtet  
vnd cassirt zu sein erweisen wolte/ oder was er sunst  
dajegen für zuwenden / Das soll er / ohne weitere  
dilation / den negstuolgenden tag hernach / wan  
Gericht gehalten wirt/ mündtlich fürbringen/ vnd  
ob er seines theils / auch Brieffliche vrkunden für-  
zulegen / das sol als baldt darneben auch gesche-  
hen/ Welche vorlesen/ vnd dem andern theil dauon  
Abschrift geuolget werden sol/ Vnd ein idern theil  
bis auff den negsten tag / wan das Gericht gehal-  
ten wirt/ bedenkfrist geben werden / solchs als dan  
auch mündtlich fürzutragen / Vnd sollen darauff  
beide theil ohne einig schriftlich eindringen / durch  
zwo oder auffss meiste drey wechselrede beschliessen/  
vnd die sachen zu rechtlicher erkentnus stellen.

Wo aber die Parteien ihre beweisunge durch  
lebendige Zeügen führen wolten/ sol ihnen auff vol-  
gende mas vnd bescheidenheit sein nach gegeben/  
Ob die Zeügen gegenwertig weren / mag sie der  
Zeügen



Zeugenführer als baldt im Gerichte fürstellen / dar  
auff sol eßlichen aus dem mittel vnserer beßsigen  
den Kethe / *Committire* vnd beuohlen werden / den  
Zeügen eidt von denselbigen zunemen / vnd sie vmb  
ihre wissenschafft zu befragen / dieselbe verstandt  
lich vorzeichnen zulassen / vnd in Gericht zuuber  
geben / die soll vorlesen werden / vnd was dan der  
jegentheil wieder der Zeügen Personen / oder ihre  
aussagen für einrede vnd exceptiones einzuwenden  
hat / Das sol als baldt mündtlich geschehen / vnd  
fürgebracht werden / des Zeugenführers rechtliche  
notturfft auch darjegen gehört / Wor auff den bei  
de theil ider auffß meiste nach mit zwo Bechsellres  
den alles was sie vermeinen / ihre rechtliche not  
turfft zu sein / fürbringen / vnd damit zur vrtheil  
beschliessen sollen / Weren aber solche Zeügen nicht  
zur stette / sollen aus mittel der beßsigen Res  
gierungs Kethe / zwo Personen zu Commissari  
en ernennet / vnd denselbigen auffgelegt vnd be  
uohlen werden / die angegebene Zeügen auff geles  
gene zeit vnd Malstedt in krafft ihrer Commission  
für sich zubescheiden / den Zeügen eidt von ihnen zu  
nemen / Vnd sie auff des Zeugenführers Artickel /  
welche er zu der zeit im Gericht obergeben soll /  
zuuerhören / ihre aussage mit fleiß beschreiben  
zulassen / Welche *arrestationes* vnd zeugnüssen die

S ij

Com



Commissarien vnter iren Sigeln verschlossen / vn-  
fers mittels dem Herrn zuschicken sollen / Welcher  
den negstuolgenden Rechtstag der ordnung nach /  
im Fürstenthumb Schlezweig halten soll / solche  
zeugnisse sollen in dem negstuolgenden Schlezwi-  
gischen Landtgericht / eröffnet / den Parteien für-  
gelesen / vnd des Zeugenführers gegentheil zuge-  
lassen sein / was er wieder der zeugen Personen /  
oder ihre aussag für zubringen / darauff der Zeu-  
genführer antworten mag / Vnd sollen darauff bet-  
de theile / ides mit zwo Wechsellreden alle seine  
rechtliche notturfft / für zubringen / vnd damit zum  
vrtheil beschliessen / Do aber im mangel beweiset /  
oder sonst aus andern zulessigen vrsachen ein theil  
dem andern etwas zum eide leggen wolte / soles  
damit gehalten werden / Wie solchs das Lobuch  
vnd der alte Landtsgebrauch des Fürstenthumbs  
Schlezweig mitbringen vnd ausweisen.

Wan nun die Parteien also / wie obberürt /  
zur vrtheil beschliessen / sol dasjenige / was fürge-  
bracht / berathschlaget / vnd die vrtheil darauff  
aus disposition vnd vershung des Lobuchs vnd  
den alten gewonheiten / begriffen / vnd in offenem  
Gerichte / aus einer Schrift Publicirt vnd vor-  
lesen werden / Do nun solche erkentnisse / allein ei-  
ne beyvrtheil were / so die wirgligkeit einer endt-  
vrtheil



urtheil nicht auff sich truge / Wirt das Gericht bescheidenlich anzusehen / vnd zu ermessen wissen / ob auff die gesprochene beyurtheil in werendem demselben Rechtstage / ferner Procedirt werden müge / Vnd wirt also bey des Gerichts Consideration stehen / ob weiter zuuerfahren / oder aber die sache / in dem Stande / als sie dan gelassen wirt / bis zu dem negsten Schleswigischen Rechtstage / zuuorschiben sey.

Würde aber ein Endturtheil eröffnet / solchs fals wirt es endlich one einige Appellation Supplication / oder reduction vormüge obberürter der Lande Priuilegien dabey gelassen / Vnd mit der Execution solcher urtheil gehalten / wie hernach in dem vierdten theil dieser Landgerichts Ordnung vnter dem Titel von der Execution gesprochener urtheil / gesetzt vnd verordnet ist.

Nach dem wir auch in erfahrung gelangt / das sich viel vnter vnsern getreuen Vnderthanen im Fürstenthumb Schleswig beschwerlich beklagen / das sie in fürfallenden sachen durch der Sandtleute Neffinger Rebs vnd Eigermendt ausspruch an den grenken vnd scheiden ihrer Veldtmarcken / oder sonst an dem eigenthumb ihrer Erb vnd ander güter / wieder Recht beschwerdt / vnd vernachtheilt werden / das sie derhalben auffgehalten / vnd

§ iij

ihnen



ihnen vber die Sandtleute Neßninger Eiger vnd  
Rebsleut keine gebürliche Rechtsuorhelffunge wi-  
derfaren müge / Das sie auch das jennige was  
ihnen also an ihrem eigenthumb mit vnrecht abge-  
schworen / oder abgereiset / vormittelst rechtens  
nicht wieder erlangen können / Als haben wir für  
rathsam vnd gut angesehen / setzen vnd verordnen  
auch darauff hiemit vnsern getreüwen Vndertha-  
nen im Fürstenthumb Schleßweig zum besten/  
nach dieser zeit also zuhalten / Wan sich ein theil  
Kleger oder beklagter durch der Sandtleute Neß-  
ninger Rebs oder Eiger mendt gethanen ausspruch  
gegen Recht beschwert zu sein vermeinen wirt / das  
derselbe sich derhalben für dem Herrn vnserz mit-  
tels / bey welchem als dan die Regierung sein wirt /  
sol vnd müge zubeklagen haben / Von welchem ine-  
den ein beuehl vnd Commission an ehliche vorsten-  
dige vom Adel vnweigerlich mitgetheilt werden sol/  
die sich an die greniz vnd scheiden darüber geschwo-  
ren / begeben / Dieselbe in den Augenschein nemen/  
vnd notturfstiglich erkunden / erfaren vnd darauff  
sprechen vnd erkennen sollen / ob das jennige was zu-  
uor solcher greniz vnd scheide halben / gesprochen  
vnd beschworen / so rechtmessig geschehen / das es  
bey macht bleiben vnd bestehen solle / Vnd das sie in  
euentum dasselbe also verordnen mügen / als es  
recht



recht sein wirt / damit sich das beschwerte theil kei-  
nes weitem auffhaltens oder umbtreibens solle zu-  
beflagen haben.

Auff das aber darin auch keinem theil zu kurz  
geschehen müge / So sol der jennige so sich gegen  
Recht beschwert zu sein erachtet / schuldig sein / sei-  
nen jegentheil darauff zuuerwarnen / das er seines  
theils die halbe anzahl der vom Adel auff die ober-  
wenter beuehl vnd Commission / zurichten nomini-  
ren vnd annemen müge / Welchs ime den von dem  
Regierenden Herrn sol zugelassen vnd darauff bei-  
den Parteien solche Commission gleichs lauts mit-  
getheilt werden / Do sich aber der jegentheil auff be-  
schehene *notification*, die vom Adel seines theils in der  
Commission zubenennen vorweigern würde / so sol  
dem andern theil vnbenommen sein / dieselbe für sich  
allein zufördern / anzunemen / vnd zu notturfft sei-  
nes Rechtens zu gebrauchen / Jedoch sol in solchen  
fellen niemandts dergleichen beuehl oder Com-  
mission wiederfaren / Er habe den zuuor seinem je-  
gentheil zuentbotten / Damit er sich für seinem  
theil darin auff masse / wie obstehet / auch  
zuerklaren vnd zuerzeigen.

Von



Von dem Landtgerichte im Fürstenthumb Holstein.

TITVLVS TERTIVS.

**W**As die sachen belangen thut / so für Holsteinische Landtgericht gehörig / Soll vormüße des Slenßbürgischen abscheidts / den Parteien / wen sie für Gericht kommen / fürgehalten werden / Ob sie von beiden theilen geneigt / sich der Appellation an das Key: Cammergerichte zubegeben / vnd zu fürderlichem entscheidet der sachen / *summarie vnd de simplici & plano* zu Procediren / Do sie den von beiden theilen sich darauff der Appellation begeben würden / sollen sie verstattet werden / schleünig vnd mündtlich / wie hiebeuorn / von den Schleswigischen sachen / vorordnet / gegen einander zuuorfare / zu vrtheil zubeschliessen / vnd rechtlicher erkandtnusse gewertig sein / Ben welcher erkenntnus es den auch entlich bleiben sol / Jedoch sol die rechtliche erkandtnusse nicht / wie in den Schleswigischen sachen / auff das Lobuch / Sondern weil das Fürstenthumb Holstein kein beschriebenes Recht hat / auff den alten kundtbaren Landtsgebrauch / so der vernunft vnd billigkeit nicht zuwieder /



wieder/ Oder auch des heiligen Reichs ordnungen  
vnd Constitutionen entgegen/ gegründet werden/  
In mangel aber einer solchen beständigen rechtmess  
igen gewonheit/ sol vermüge der Landt Priuile  
gien geurtheilet werden/ nach Sechsischen Rechts  
ten/ Vere aber derselbige fall/ darauff gesprochen  
werden sol/ in Sechsischen Rechten nicht begrif  
fen/ so sol als *in casu omisso* der *disposition*, gemeiner  
beschriebenen Rechten gefolget/ vnd die vrtheil dar  
auff gegründet werden/ Würden aber beide theile/  
Kleger vnd Beklagter/ oder aber deren einer sich  
beschweren vnd vorweigeren/ der Appellation zu  
Renunciiren/ So sollen beide Parth/ auff das or  
dentliche Recht/ wie solchs in dieser vnser Landtge  
richts Ordnung gesezet vnd vorsehen/ gewiesen  
werden/ Schriftlich jegen einander zuuorfahren/  
Zu der behueff/ damit die sachen gefürdert/ vnd  
nicht von wegen blosser Interlocutorien oder be  
scheide/ auff Supplicationes vmb Compuls Com  
passbrieff/ Commission/ Publication der Bezeug  
nussen vnd andere notturffftige Proces ein ganz  
Jar/ von dem einen Holsteinischen Rechtstage bis  
zu dem andern/ zu mergflicher vnkost vnd beschwe  
runge der Parteien auffgehalten werden/ Haben  
wir vns mit einander freündtlich vorabscheidet vnd  
vorgleichen/ das der Herr vnser mittels/ an wel  
chem

3

chem



chem desselbigen Zars Regierung sein wirt / auff  
die zwey Quartal / als Montags nach Johannis  
Baptistae / vnd Montags nach Circumcisionis  
Domini / Oder ob solche tage vngelegen fürfielen /  
etlich weinig Tage zuvor oder darnach / aus den  
regierungs Rethen / von wegen jeders theils / zwey  
Personen / einem vom Adel vnd einem Rechtsge-  
lerten / zum Kiel oder Rendesburg einzukommen /  
beschreiben solle / Dieselbige sechs Rethen sollen alle  
einkommene Supplicationes / Acta vnd Actitata /  
des ordentlichen Processus Holsteinischer sachen  
ersehen / auff die Supplicationes bescheidt eröffe-  
nen / auch schlechte beyurtheil / die keiner endtur-  
theil krafft vnd wircklichkeit auff sich tragen / publi-  
ciren / in Contumacien sachen sprechen / auch Com-  
missiones / Compas vnd andere Process decerni-  
ren / zeugnissen eröffnen / Damit die sachen zwis-  
schen den ordentlichen Rechtstagen gefürdert vnd  
die Parteien / so fern als möglich / auff den Landt-  
rechtstagen / durch enturtheil entscheiden werden  
mögen.

Was aber fürfallen möchte / darauff der be-  
scheidt vnd die erkenntnis / die wircklichkeit einer  
endturtheil vnd die beschwerunge / so durch die ent-  
urtheil / nicht auffgehoben oder ersetzt werden  
möchte / in sich hielten / Darauff sol die Cognition /  
bis



bis auff das negeftuolgendt ordentlich Landtge-  
richt vorschoben werden / Damit sich solchs falles  
niemandts einiger vorkürbunge seines Rechtens  
zubefaren / oder eingefürter newrunge zubeklagen  
haben müge.

Von den Notarien des Landt-  
gerichts.

TITVLVS QVARTVS.

Nachdem bisß anhero befunden wor-  
den / das die vmblicfferung der Gerichts  
Acten / nach vmbwechselung der Regierun-  
ge / aus einer Ganklei in die andere viel vnrichtig-  
keit vorursachet / vnd auch nicht wol möglich ist /  
das bey solcher vmblicfferung vnd mannichfaltig-  
keit der Personen / denen die Acta zu ihren handen  
vntergeben werden / ein richtig Prothocol gehalten  
werden kan / Wordorch die Parteien offtermals  
gegen einander in misuorstandt geraten / als ob  
an dem einen oder andern theile / die seümbnus ge-  
wesen / der sachen Richtern / auch so viel mehr *diffi-*  
*cultes* auffgedrungen wirt / Erfürdert die notturfft /  
wie dan auch solches / in allen andern wolbestelten  
G ij Gericht



Gerichten / gebreuchlich / das ein taugliche Per-  
son / die ein Notarius / Vnd am Kay: Cammerge-  
richt immatriculirt sey / zum Notario des Holstei-  
nischen Landgerichts auffgenommen vnd bestellet  
werde / Solcher Notarius sol von allen Gericht-  
lichen handlungen / vnd Processen ein formlich  
Prothocol halten / darin er / Wan das Landge-  
richt gehalten wirt / ordentlich beschreibe vnd vor-  
zeichne / was jedes Tages in einer jeden sachen / be-  
sonder für Recess gehalten / was Supplicationes  
eingeben / vnd darauff decretirt worden / Was  
auch zusolge der Gerichtlichen bescheide / für Pro-  
cess erkandt vnd ausgegangen / was für Brieff-  
liche Urkunde oder Rotull attestatum / in den  
Zeügsachen Produciret / was Eide erkandt vnd im  
Gerichte ergangen / was Producta in wehrendem  
Rechtstage vnd zwischen den Rechtstagen einge-  
legt / Was auch in den Rechtstagen fürhen vnd  
enturtheil gegangen / was gestalt appelliret / vnd  
sonst alles vnd jedes / so dem Process der Rechts-  
sachen anhengig sein mag / dabey er allezeit / das  
Jar / Monat vnd den Tag / mit fleis vorzeichnen  
sol / Es sol auch der Notarius vnsern Rechten / die  
als obstehet / des Jar zu zweien Quartalen zusa-  
men komen sollen / auffwarten denselben alles was  
eingekommen / sich darin nach notturfft zuersehen /  
neben

neben  
vnd be  
von da  
Protho  
anden  
Acten  
lunge /  
Z  
harlich  
drehend  
Protho  
ten / auch  
von ihm  
ben / schü  
ordentlich  
oder drei  
vnsern  
Gericht  
ge / nach  
der Ger  
wirt / G  
ben / mit  
Gerichte  
tunge  
vnd jet  
Notari



neben fürlegunge seines Prothocols / exhiberen  
vnd behandigen / vnd was für decret vnd bescheidt  
von den Rethen darauff gegeben werden / in sein  
Prothocol vorzeichnen / damit man auff den vol-  
genden ordentlichen Landt Gerichtstagen der  
Acten vnd anderer gehaltenen Recess vnd hand-  
lung / ein gewiss directorium haben müge.

Vnd sol der selbige Notarius / zum Kiell be-  
harlich residiren / vnd alle gericht's Acten vnd an-  
drehendel zum Landtgericht gehörig neben seinem  
Prothocol in getreüwer guter vorwahrung hal-  
ten / auch vns vnd den Rethen ider zeit / wan solchs  
von ihme ersünderet wirt / richtigen bescheidt zuge-  
ben / schuldig sein / Wan wir auch geneigt / zu den  
ordentlichen Landtgerichts Tagen ein oder zwen /  
oder drei / so viel die gelegenheit geben wirt / aus  
vnsern Secretarien / mit vnserm Secret zu dem  
Gericht zuuorordnen / Sol der Notarius allewe-  
ge / nach geendigtem Gericht / sein Prothocol mit  
der Secretarien Prothocolen / so ein ider halten  
wirt / Conferiren / vnd sich der einformigkeit hal-  
ben / mit denselbigen vorgleichen / damit also in den  
Gericht's hendlen / jeder zeit gute gewisse nachrich-  
tunge vorhanden sein / vnd aller misgverstandt  
vnd irthumb verhütet werden müge / Vnd sol der  
Notarius / solches also getreülich vnd mit fleiss

G iij

zuuer-



zuuorfolgen / in besonder Eidt vnd pflicht genom-  
men werden / wie hernacher folgen wirt.

## Von den Aduocaten.

### TITVLVS QVINTVS.

**S**Wol in andern Landtgerichten / ge-  
breuchlich / das eine gewisse anzall der Aduo-  
caten angenommen wirt / die auch dem Bes-  
richte / ihres Amptes halber / besondere Eidt vnd  
pflicht leisten müssen / Haben wir doch gnedigst /  
vnd gnediglich bewogen / weil bis anhero / den Par-  
teien frey gestellet / ihrer gelegenheit nach / in vnd  
ausserhalb vnserer Fürstenthumben / sich vmb Ad-  
uocaten zubewerben / vnd deren Parteien ein gros-  
ser theil / nu mehr von etlichen vielen Taren hero /  
ihre sonderbare stette Aduocaten haben / die ihrer  
sachen bericht / vmbstende / vnd grundes nu mehr  
kündig / Wollen wir vnsern Vnderthanen zu bes-  
sondern gnaden nach geben / vnd zulassen / das sie  
ihrer gelegenheit nach / ihre bestelte Aduocaten be-  
halten / auch ihres gudtachtens in vnd ausserhalb  
vnser Fürstenthumb / dieselben nachmals bestellen /  
annemen vnd gebrauchen mügen / Wollen auch  
dieselben / mit gewöhnlichen Aduocaten eidt gnedigst  
vnd gnediglich vorschonen / Doch sol vermüge de-  
ren



ren / auff vörigen Rechtstagen Publicirten ab-  
schieden / die Aduocaten mit eigener handt / Tauff  
vnd zunamen / den Producten sich zu vnterschrei-  
ben / schuldig sein.

## Von den Procuratoren.

### TITVLVS SEXTVS.

**N**achdeme der Parteien notturfft erfordert /  
das sie verstendige Procuratores haben  
mögen / die ire Producta / vnd was Gerichts-  
lich zuübergeben / einbringen / vnd was die not-  
turfft ist / daneben mündtlich handeln vnd fürbrin-  
gen / Vollen wir in massen hiebeuorn / von den Ad-  
uocaten verordnet / den Parteien frey gesteldt sein  
lassen / sich in oder ausserhalb dieser Fürstenthumb  
vmb taugliche Procuratoren zuberwerben / vnd in  
iren sachen / für vnsern Landgerichte zugebrauchen  
die auch ires Ampts halbē / so wol als die Aduoca-  
ten mit besondern eiden vnd pflichten nicht beladen  
werden sollen / vnd sollen die Procuratores in iren  
mündtlichen fürtragen vñ Recessen / sich alles weit-  
leüfftigen geschwehes enthalten / vñ allein mit kur-  
zen worten anzeigen / was sie einbringen vnd dar-  
neben bitten vñ suchen / oder worumb sie sonst anre-  
gung thun / Aber aller geschicht erkzelung *disputation*  
vnd



vnd weithleüfftigen berichts / sollen sie sich genzlich  
eüßern vnd enthalten / bey vormeidung der straffe /  
nach ermessung des Gerichts / Was aber solchs  
falles / es sey bericht / geschicht erkellung disputa-  
tion / rechtliche allegata vnd informationes / sollen  
die Parteien / was ihre rechtliche notturfft sein mag /  
schriftlich zu vbergeben / schuldig sein / Solche  
Schriften auch allezeit Intituliren lassen / damit  
so viele desto bessere richtigkeit gehalten / vnd dem  
Gericht die zwifachte mühe vnd arbeit neben vor-  
lust der zeit nicht affgedrungen werde / Begebe es  
sich auch / das des Procuratorn Principal selbst für  
Gerichte nicht zur stette wehre / vnd der Anwaldt  
oder Procurator sich für ihnen zu Recht wolte ein-  
lassen / sol er anderer gestaldt nicht dazu vorstattet  
werden / er bringe den im Gericht ein / einen form-  
lichen gewaldt oder Procuratorium Mandatum /  
Welchs den mit seinen wesentlichen stücken / nach  
ordnung der rechten begriffen vnd gesteltdt sein soll /  
Vnd sollen demnach die Parteien hiemit darauff  
vorwarnet sein / wan sie selbst im Gericht nicht er-  
scheinen können / sondern durch ihre Anwaldt sich  
einlassen vnd handelen wollen / das sie mit form-  
lichen gewaldt / vnd Mandaten so die gewonliche  
Glausule in sich halten vnd zu Recht bestehen mü-  
gen / dieselben vorsehen / damit ihre Procuratores  
in Ge



in Gericht zugelassen werden mügen/ Jedoch ob et  
ner erschiene / der mit gnugsamen Mandato nicht  
vorsehen/ vnd aber erbietens were *de rato* zu cauiren,  
der sol auff den selben Termin zuhandlen vorstatet  
werden/ vnd sol in den Volmachten der vnterscheidt  
gehalten werden / Wo eine Communitet oder vors  
samblunge im Rechten zuhandlen / das dieselben  
nicht einen Procuratorn/ sondern einen *Sindicum*  
*Constituiren*. Do auch Vormündere oder Pflegere  
ihrer Mündlin halber / im Recht zuhandlen het  
ten/ vnd selbst nicht erscheinen konten/ das dieselben  
einen *Afforem Constituiren*, vnd denselben mit einem  
förmlichen Actorio vorsehen/ Damit die Mandat  
ten vnd Volmachten / von den jегentheilen als vn  
förmlich / vnd vntauglich nicht werden angefochs  
ten.

Von den Kriegeschen Vormündern/  
*Curatores ad litem* genennet.

*TITVLVS SEPTIMVS.*

**W**ir ordnen vnd setzen auch / do et  
wan vnmündige Personen/ Fräwen/ Jung  
fräwen / oder wahnwitzige Leute / die erer  
sinn vnd verstandes nicht ræchtig / im Rechten  
hand



Handlen sollten / Weil solche Leüt für sich selbst zu  
Recht nicht stehen können / das denselben / wo sie  
keine Vormünder oder Curatores haben / durch  
das Gericht Kriegische Vormündere vnd Cura-  
tores ad Litem verordnet werden sollen / Dieselbi-  
gen sollen schuldig sein / sich mit den sachen zube-  
laden / vnd der Parteien / derentwegen sie vorordnet /  
getreulich für zustehen / vnd das Recht ausfü-  
hren / Auch derenthalben einen Eidt zuschweren /  
dessen form hernach gesagt / Es were dan der ver-  
ordnete Kriegische Vormünder / des ansehens vnd  
vortragens / das ihm vom Gericht solcher Eidt  
erlassen würde.

### Von den Gerichts Botten.

#### TITVLVS OCTAVVS.

**A**ls auch mehrmals hiebevör gespü-  
ret / das in vorkündigunge der Ladungen / vnd  
anderer Prozesse / merckliche vnrichtigkeit für-  
gefallen / Dadurch auch das Gericht / molestirt  
vnd verwirret / solchem hinfurtan für zukommen /  
Wollen wir das zwen besonder Botten angenom-  
men werden / welcher einer allezeit auff vnser s mit-  
tels den Regierenden Herren vnd desselben Sankt-  
lei / Der ander aber / auff den Gerichts Notarien  
war



warten solle / dieselbige Boten sollen alle Proces/  
so ausgehen werden auff deren Partei / welche die  
Proces ausgebracht / darlage vnd Botenlohn exequi-  
quiren / vnd den Parteien vorkündigen / Bere es  
dan sache / das in einer ladung oder andern Proces  
mehr als eine Person benennet / Sol es der Botte  
mit der execution / der gestalt halten / das ihme aus  
des Regierendes Fürsten Canklei / neben dem Ori-  
ginal der Ladunge vnd anderer Proces / So man-  
liche Copie dauon als manliche Person / darinnen  
benennet / auffgegeben werden sol / Vnd sol der Bot-  
te sich an einem jedern insonderheit begeben / ime das  
Original zeigen vnd vorlesen / vnd mit einer Copie  
collationiren / Darnach sol er demselben die Copie  
lassen / vnd das Original wieder zu sich nemen / vnd  
folgens den andern Personen / in den Processen be-  
stimmet / einer nach dem andern gleichförmige vor-  
kündigunge thun / die Originalia aber sol er bey sich  
behalten / sich damit an den gericht's Notarium be-  
geben / vnd demselben eigentliche relation thun / auff  
was tag vnd stette / er vnterschiedlich solche Proces  
exequiret habe / vnd was im jedes orts bey der execu-  
tion begegnet / solche Relation sol der gericht's No-  
tarius / mit fleis in seinem Prothocol vorzeichnen  
lassen / damit er wan es nötig / dem Gericht grüntli-  
che anzeig vñ bericht dauon zuthunde wissen müge /

H ij

Wür



Würden aber in einer Citation / eckliche Vormün-  
der geladen / ist es vormüge vöriger abschiede gnug-  
sam das die Ladung / allein einen von den Vormün-  
dern werde vorkündiget / Welcher den schuldig sein  
sol / den andern seinen mit Vormündern solche La-  
dunge zu notificiren / Vnd sol der Botte solcher exe-  
cution / dem Notario Relation thun / Vere aber  
die Ladunge oder ander Process / nur eine Person  
belangendt / sol er derselbigen das Original lassen /  
vnd Gopei die ihme in des Regierenden Fürsten  
Canzlei neben dem Original / sol auffgegeben wer-  
den / behalten / Vnd wan er / wie obstehet / dem Be-  
richts Notario seiner Execution / Relation thun  
wirt / ihme solche Gopei behandeln / Es sol auch  
der Berichts Notarius die Execution der Process /  
so wol auff die Originalia vnd Gopeien / so ime der  
Botte behandelt / als in sein Prothocol vorzeich-  
nen / damit dieselbigen ad Acta geleget vnd zu vor-  
fallender notturfst / behandeln sein mügen / Truge  
es sich auch zu / das der Botte den jennigen / deme  
er die Process vorkündigen solte / nicht kunte selbst  
antreffen / Ist es gnugsam / das er jemandts von  
seinem Hausgesinde / dieselbige Citation oder an-  
dere Prozesse / in seiner Behausung / alldar er am  
meisten pflegt anwesent zu sein / oberlieffere / Volo-  
te aber dieselbige niemandts annemen / mag er sie  
von



von sich legen/in ein Finster oder Haußthür stecken / vnd darvon gehen / vnd sol dessen / dem Gerichts Notario eigentliche Relation thun / Würde auch jemandts / den Botten seiner beyhabenden Processus vorkündigung halber / mit wordt oder wercken zur vngedür vberfahren vnd abweisen / das sol der Botte dem Gerichts Notario warhafftlich / wie es sich begeben / referiren / Welcher das selbige bey der Execution solchs Processus zeichnen solle / damit derwegen die gedür / zu erhaltung des Gerichts Reuerenz / fürgenommen werden müge / Es sol auch solcher Botte / wan er bestellet wirt / in sondere Eidt vnd pflicht genommen werden / Wie hernach volget.

**Volget der Eidt des Gerichts  
Notarij.**

**TITVLVS NONVS.**

**D**er Gerichts Notarius sol vns vnd dem Gerichte / zu Gott vnd auff das heilige Euangelium schweren / sein Ambt vnd beueßlich mit schreiben vnd lesen / getreuwes fleißes obzu sein / der Parteien fürtrege vnd Gerichts Acta / des gleichen alle Brieffe vnd Schrifften / vnd abschriften

H    iij    ten



ten getreulich zu Prothocolliren / auff zuschreiben  
vnd zuuorwaren / Brkunden / Briue / vnd an-  
ders / so Berichtlich eingebracht bey dem Berichte  
zubehalten vnd zu bewaren / Dieselben oder Abs-  
schrifften dauon ohn erkentnusse des Berichts nie-  
mandts zugeben / noch sonst was heimlich were zu  
eröffnen vnd lesen zulassen / Alle heimlichkeit des  
Raths vnd Berichts genzlich zuuorschweigen / kei-  
ner Partei wieder die ander warnunge zuthun /  
noch zuraten / auch von den Parteien in Recht han-  
genden sachen / oder so seines wissens baldt Rechts  
hengig werden / oder andern von seinet wegen / Kei-  
nerley geschenck oder gaben zunemen / noch ihme zu  
nuß nemen zulassen / in was schein das geschehen  
möchte / vnd sonst / alles zuthun vnd zulassen / das  
einem getrewen Berichts Notario gebürt / getrew-  
lich vnd ohn gefehrde.

Der Curatorn ad litem oder Krie-  
gischen Vormünder Eidt.

*TITVLVS DECIMVS.*

**D**ie Curatorn ad litem / sollen einen  
Eidt zu Gott vnd auff das heilig Euangelio  
um schweren / das sie alles vnd jedes / so inen  
dem



Dem sie zu Curatoren der sachen gegeben seintz gutt  
vnd nützlich ist/nach irem besten vorstandtnus/ge-  
treulich vnd mit fleis handeln / fürbringen vnd  
oben / sich der warheit ohn falsch vnd gefehr ge-  
brauchen/Was ihnen vnnütz vnd schedlich ist vor-  
meiden/ vnd alles das in den sachen/ zu ihren han-  
den kommet / dem gedachten N. gentslich zustellen  
wollen/ Vnd sonst alles/das thun vnd lassen/was  
getrewen Curatoren zusehet.

### Der Gerichts Botten Eidt.

#### TITVLVS XI.

**D**er Gerichts Botte sol zu Gott vnd seinem  
heiligen Euangelio schweren / seinem Bot-  
ten Ampt vnd beuehlich / treulich vnd mit  
fleis aus zuwarten/die Gerichts briefe/so ime in  
vnsern Gantzeien / oder vom Gerichts Notarien/  
den Parteien zuuorkündigen/auffgegeben vñ beuo-  
len werden/treulich vnd fleissig den jennigen/an die  
sie stehen/an ihre eigene Person/da er die antreffen  
mäge oder in jr gewöntlich behausung/oder wie es  
ime beuolen wirt zu oberantworten vnd zuuorkün-  
digen / vnd allezeit dem Gerichts Notario / solcher  
oberantwortung vnd vorkündunge gleubliche rela-  
tion



tion zu thun/Tag vnd Malstede anzuzeigen/auff  
das es bey die Acta vorzeichnet werden müge/Vnd  
sonst alles anders zuthunde/das einem redlichem  
getreuwen Votten zugehöret/ohn alle gefehrde.

Von den armen Parteien vnd  
derenselbigen Eidt.

TITVLVS XII.

**S**ich fünffziger zeit Parteien für  
vnserm Landtgericht angeben würden/das  
sie rechtfertige sachen hetten/vnd aber ihrer  
Armudt halben/dieselben nicht konten ausführen/  
Wollen wir vnd das Gericht/solchen armen Par-  
teien/damit sie ihres vnurmügens halber/nicht  
Rechtloß gelassen werden/einen aus den Procu-  
ratorn Ambtshalber zu ordnen/denselben auch be-  
fehlen vnd aufferleggen/der armen Partei ohn be-  
lonunge/in ihrer sachen zuraten vnd zudienen/bis  
zu endtlichem austrage/In gleichem auch sollen  
solcher armen Parteien notturfftige Proces vnd  
Brieff aus vnser Chanclei gefolget werden/Sie  
sollen aber zusörderst einen Eidt zu Gott vnd auff  
das heilige Euangelium schweren/das sie also arm  
sein/an fahrenden vnd liggendem Hab vnd gütern  
oder



oder schulden / nicht vormügen / die Gangley vmb  
notturfftige Brieff / noch die Aduocaten vnd Pro-  
curatorn zobelohnen / Das sie auch vmb leistung  
willen / dießes Eides ihres guts oder Hab nichts  
voreüßert / oder andern vbergeben haben / Vnd so  
sie im Rechten obliegen oder sunst zu vormügen  
kommen / als dan jedem / nach seiner gebür / erbar-  
liche entrichtunge thun wollen / Alles ohn gefehr-  
de.

## Der Landgerichts Ordnung dritte Theil.

Von den sachen die durch Appellation  
an vnser Landgericht erwachsen.

*TITVLVS PRIMVS.*

**D** jemandts durch Vrtheil vnd  
Recht sich beschwert zu sein vormeinen  
würde / dem sol frey stehen / an vnser Land-  
gericht zu Appelliren / so fern die sache  
fünffzig Gulden Lübscher Iwerunge oder darüber  
ertragen thette / So aber die sache so viel nicht auff  
sich



sich trüge/ sonder vnter fünffzig Gulden geschahet  
würde/ Sol kein Appellation von dem Niedergerichte  
richten/ an vnserm Landtgerichte angenommen/  
Sondern an den Richter a quo ad erequendum res  
mittirt werden/ Es sollen auch solchem Appellanten/  
aus vnsern Gantzeien keine Ladunge oder andere  
Proces gefolget/ Sondern wen er darumb  
Suppliciren wirt/ ihme dieselbigen abgeschlagen  
werden/ In den sachen aber/ vber fünffzig Gulden/  
vnd darin die Rechte/ vnd dieser vnser Landtgerichts  
Ordnunge/ die Appellation zulassen/ sol der  
Appellant alsbaldt bey gethaner Appellation/  
von dem Richter a quo/ Apostolos reuerentiales/  
oder abscheidts Brieffe bitten/die ihme auch gefolget  
werden sollen/ Würde er aber/ außerhalb des  
Gerichts/ für Notarien vnd Zeügen Appelliren/  
Sol er von dem Notario ein Instrument seiner  
Appellation/ an statt Apostolorum Testimonialium/  
nemen/ vnd seine Appellation der gestaldt  
Prosequiren/ Das er innerhalb sechs Wochen/  
den negefte a tempore interpositae Appellationis/  
an den Herren vnserz mittels/ bey welchen auff  
die zeit die Regierung sein wirt/ Supplicere/seine  
Apostolos Reuerentiales oder Testimoniales/  
damit er die bestendigkeit/der Appellation in ihren  
formalien zubeweisen vbergebe/ Vnd vmb Ladung



ding wieder seinen jegentheil / auch Compulsor  
rial / an vöriger Instanz Richtere / ihme mit zus  
theilen anhalte / die ihme auff solche seine bitte ge  
reicht / vnd durch den geschworen Gerichts Bot  
ten / wie hie beuorn / von dem Gerichts Botten ge  
setzt / exequirt vnd seinem jegentheile vorkündiget  
werden sollen / Wan nun solchs geschehen / vnd der  
Gerichts Botte seine vorkündigunge / dem Ge  
richts Notario Relation gethan / Sol der Appella  
lant auff den Termin in der Citation bestimmt /  
sein Appellation Libel / zusamt der Ladunge exes  
cution / auch die Acten vöriger Instanz einbrin  
gen / vnd dem Gerichts Notario zustellen / Vnd sol  
alsdan / der Gerichts Notarius die vorschlossenen  
Acta eröffnen / vnd von allem solchem einbringen /  
Abschrift dem Appellaten zuschicken / Darauff sol  
der Appellat schuldig sein / innerhalb den negsten  
sechs Wochen / seine Executiones *contra deuolutionem*.  
Auch wieder die formalia vnd materialia / Appella  
tiones einzubringen / Vnd sol also volgendts von  
jederm theile von sechs Wochen zu sechs Wochen  
noch mit zwei Sakschriften vorsehen / vnd zur  
Vrtheil beschlossen werden / vnd in solcher Appella  
tion sache sol nicht neues eingebracht / Son  
dern die Acta Prioris Instantie erstehen / vnd dar  
auff die Vrtheil / daruon Appellirt / bestetigt / oder

I ij

Refor



Reformirt werden / Es were den das der Appel-  
lant / *Instrumenta de nouo reperta* Produciren / vnd  
bey seinem Eide erhalten wolte / das er von densel-  
ben zuuorn keine wissenschaft gehabt / Vnd also in  
erster Instanz / dieselbige nicht hette Produciren  
können / Welches falles ihme zugelassen werden  
sol / *non deducta* zu deduciren vnd *non probata* noch-  
mals zuberweisen.

Wan nun / wie berürt / von den Parten / zur  
urtheil beschlossen / so sollen die *Acta* / durch den Ge-  
richts Notarium dem negstuolgenden Landtgerich-  
te oberantwortet werden / Welches darauff spre-  
chen vnd erkennen sol / was recht ist / Solchs aber  
sol zuuor stehen sein / von endturtheil / vnd den bey-  
urtheilen / so die krafft vnd wirckligkeit einer endt-  
urtheil auff sich tragen / Würden aber die Kethe  
in der beysamenkunfft des negsten Quartals befin-  
den / das die erkentennisse / darauff die Parten sub-  
mittirt / nur ein bloße *Interlocutoria* were / Sollen  
sie rechtlichen bescheidt zueröffnen macht haben /  
Auff welchen bescheidt die Parteien / ferner zur ent-  
urtheil zuuorfahren haben mügen / Vnd sollen die  
Parteien / die auff ihr eingebrachte *Producta* be-  
scheidts gewertig sein / auff dieselbe zeit / ohne für-  
gehende Ladunge / erscheinen / vnd solches bescheides  
erwarten.

Von



Von Ladungen/ Compulsorialen/  
Mandaten vnd andern Processen.

TITVLVS SECVNDVS.

**W**er Ladungen vnd Compulsorialn/  
ausbringen vnd erlangen wil / sol vermüge  
des Flenßburgischen abscheids / solchs bey  
vnsern mittels Regierenden Herren suchen/ vnd ein  
Supplication vbergeben / Darinnen die vrsachen  
seiner fürderunge / dermassen klerlich vnd deutlich  
gesagt vnd vormeldet werden / Das die Citation  
daraus genommen/ vnd also gestellet / damit der Ci-  
tirt gnußamen bericht / worumb er fürgeladen/  
empfangen / vnd sich der antwort aus vnwissenheit  
desto weiniger zuentschuldigen haben müge / Vnd  
ob wol bißhero gebreüchlich gewesen/ das die Par-  
teien/ mit dreien/ vnterschiedtlichen Ladungen/ von  
vierzehnen tagen zu vierzehnen tagen / darunter die  
lezte Peremptoria gewesen / Citirt worden / dar-  
durch offtermahls / zwischen den Parteien miß-  
uorstandtliche disputationes eingefallen / Wollen  
wir das solchem für zukommen / dem Beklagten  
hinfuro nur eine Ladunge vorkündiget werden sol/  
darin er / wie sonst in allen andern Gerichten ge-  
breüchlich/ zum ersten andern vnd dritten mal/ Per-

3 iij

remptos



remptorie gesteuendt vnd geladen werde / Es soll  
aber die zeit / in der Ladunge bestimmt / nicht vn-  
ter sechs Wochen sein / Wir ordnen vnd wollen  
auch / das in allen Citationen / den Parten zu fruer  
Tagzeit zuerscheinen / werde auffgelegt / Auch sol  
in allen Ladungen / die Clausula begriffen werden /  
das der / oder die geladene der sachen / zu allen Ter-  
minen vnd Berichtstagen / bis nach entlichem be-  
schluss vnd Vrtheil auswarten sollen / Es sollen  
auch alle Ladungen vnd andere Prozesse hinfuro/  
wie auch hieueorn beschehen / vnter vnser aller  
dreier Herrn Namen vnd Titul / vnd vnser Mits-  
tels Regierendes Herren Secret ausgehen / Wür-  
de auch befunden / das in Appellation sachen / der  
Richter a quo vngeachtet / der Interponirten Ap-  
pellation / mit execution seiner ausgesprochen vr-  
theil vorfahren wolte / Soll deme / der Appellirt  
hat / frey stehen / inhibition zubitten / vnd dieselbige  
dem Richter / a quo durch einen Gerichts Boten /  
vorkündigen zulassen.

Vnd alsdann offtermahls vmb Mandata  
Supplicirt vnd angehalten wirt / sol hinfuro die  
bescheidenheit gehalten werden / Das alle Man-  
data / die den Parteien von Rechtswegen mitge-  
theilet werden mügen / die Clausulam Justificato-  
riam / *Si preces veritate nitantur* . in sich halten / auch  
zu eno



zu ende in simplicem Citationem Resoluit werden  
sollen / Nemblich das der jennige / wieder den solch  
Mandat erlangt / auff einem / in dem Mandato be-  
nandten Termin erscheinen / dardue vnd beweise /  
das er dem ausgegangenem Mandato Parirt /  
oder aber in mangel desen / sehe vnd höre / sich in die  
Peen des Mandati / mit vrtheil vnd Recht zuspre-  
chen / vnd zuerkleren / oder aber vrsache für zubrin-  
gen / Vorum solchs nicht geschehen sol / gefolget  
werden / Vnd wirt jeder zeit / der Regierende Herr /  
die vbergebene Supplication / durch seine Rethen  
berathschlagen lassen / Ob dem Supplicanten das  
gebetene Mandat mit zutheilen / oder abzuschla-  
gen / vnd wie nach gestalten sachen / dasselbe / wen es  
erkennt / zuurpeenen sey.

Do nun solche Partei des Mandati sich be-  
schwert empfindet / vnd Rechtmeßige vrsachen zuha-  
ben vormeint / solchem Mandato nicht folge zuthun /  
Sol dieselbige Partei auff den angesetzten Termin /  
dieselbigen fürbringen / darauff hat sein jegentheil / in  
Rechtlicher frist / Nemblich sechs Wochen / seine not-  
turfft schriftlich einzubringen / vnd sol volgendts je-  
des theil / von sechs Wochen zu sechs Wochen vorfa-  
ren / vnd mit zweien Satzschristen zur vrtheil besch-  
liessen / würde nun durch vrtheil vnd recht erkent / das  
die fürgebrachten vrsachen vnerheblich / vnd sich der  
jennige /



jennige/ wieder den solch Mandat/ ausgegangen/  
in die Peen/ dem Mandat einuerleibet/ durch sei-  
nen ungehorsam vorwircket/ So sol er solche Poen  
zuerleggen schuldig sein/ vnd durch die mittel/ wie  
hernach vorordnet/ auff die Execution/ wieder ihn  
Procedirt vnd vorfaren werden/ Vnd sollen in al-  
len Mandaten/ eine ausdrücklich gelt Poen/ nach  
dem die sachen gros wichtig oder gering/ halb dem  
theil/ so das Mandat ausgebracht/ vnd den ande-  
ren halben theil dem Gerichts Kasten zu inferiren  
gesagt werden/ Bürden aber Mandata gebetten/  
in den fellen/ darin die zu Recht/ ohne die Justifica-  
tori Clausul mitgetheilt werden mügen/ Sol es  
gehalten werden/ wie des heiligen Reichs Ord-  
nung/ von solchen Mandaten mitbringt vnd dispo-  
nirt.

## Von Sequestration vnd Aresten.

### TITVLVS TERTIVS.

Nach dem die Sequestration vnd Ar-  
resta offtermals ausserhalb der felle/ darin-  
ne sie die Rechte zugelassen/ angelegt/ vnd  
also in missgebrauch gezogen werden/ Sintemat  
die



die Sequestrationes vnd Arresta Regulariter im  
Rechten vorbotten/ vnd allein in eptlichen besondern  
fellen/ zu Recht erleubt sein/ Sezen vnd ordnen  
wir/ das hernach kein Sequestrationes/ noch Ar-  
resta nachgegeben vnd angelegt werden sollen/ Es  
geschehe dann in einem solchem falle/ in dem die  
Recht specialiter einen Kummer vnd Hemmung  
nachgeben vnd zulassen/ Auch sol die Sequestratio  
oder Arrest anderst nicht folgen mügen/ den mit  
fürgehender schleüniger vorhör vnd Cognition/  
vnd darauff folgenden Rechtlichem *decreto*. Sonst  
sollen die Sequestrationes vnd Arrest vntrefftig  
gehalten werden.

### Von Pfandungen vnd Gefangenen.

#### TITVLVS QVARTVS.

Nachdem auch aus dem/ das einer  
den andern Pfendet/ ihnen oder die seinen  
fenget/ mannigfeltige hendlung vnd vnruhe  
zwischen den Vnderthanen entstehen vnd erfolgen/  
Solchem zu bezeugen sezen vnd ordnen wir/ das  
hinfuro in solchem fall/ do einer in vnsern Fürsten-  
thumben gefessen/ durch sich selbst/ oder die seinen  
einen



einen andern / vnserer Vnderthanen / oder die sei-  
nen pfanden oder fangen würde / Vorumb oder  
was sachen willen (Allein Malefiz sachen ausge-  
nommen) das beschee / Das alsdan / auff anre-  
gung des jennigen / der / oder des Vnderthanen /  
also gepfandet vnd gefangen / Mandat ohn die Ju-  
stification Clausul von dem Regierenden Herren  
vnserz mittels / wie fürberürt / erkandt werden sol-  
len / ohne vorzug / auch ohn einig gegenrede / die  
pfandung wieder zugeben / vnd die Gefangene auff  
alte gewöhnliche Brpfeide / doch anderst nicht / den  
auff wiederstellen / Im fall solchs mit Rechte er-  
kandt würde / ledig zulassen / mit angehengter La-  
dunge / in einer bestimbten zeit / vnserm Landtge-  
richt / oder außserhalb / der zeit des Landtgerichts /  
dem Gerichts Notarien kundtschafft vnd beweis  
einzubringen / vnd zuübergeben / Das er solchem  
Mandat gehorsamlig gelebet / vnd dan weiter sei-  
ne gerechtigkeit der Pfendunge oder fahungs hal-  
ber / im Rechten / wie sich gebürt / fürzubringen /  
vnd darzuthun / Oder aber zusehen vnd hören / sich  
in Peen des ausgegangenen Mandats / seines vn-  
gehorsams halber / mit vrtheil zuerkennen vnd zu-  
erkennen / Vnd sol darauff an vnserm Landtge-  
richt / die sache der Pfandung oder fahens halber /  
auch von wegen vorwirckter Peen / im fall / do dem  
Man



Mandat nicht gelebet würde/auff das aller schlech-  
tigste/ mit Recht entscheiden werden/Vnd im fall/  
do sich erfunden/das der Klagentheil seiner Klage/  
nicht fuege noch Recht hette/vnd das sahendt oder  
Pfendent / von dem Beklagten billig beschehen  
were / so sol ihme die Pfandung oder Gefangen/  
die er auff vnser gebott hinaus gegeben / oder led-  
dig gelassen / zusamt auffgelauffenem kosten vnd  
schaden widerumb eingewortet / vnd die Ge-  
fangen sich widerumb einzustellen / angehalten  
werden/Doch beiden theilen ihre gerechtigkeit/ der  
Hauptsachen halber / an gebürlichen örten vnd  
enden / weiter mit Recht auszuführen fürbehalten  
sein.

### Von der Klage.

#### TITVLVS QVINTVS.

**D**er Kleger wenn er sein jegentheil/  
wie sichs gebüret / darzu Citiren lassen/  
mag in offenem Landtgericht seine Klas-  
se Schriftlich vbergeben / sampt Reproduction  
der ausgegangenen Ladunge / vnd deren selb-  
gen vorkündigunge / Wo aber der Termin  
K ij in



in der Ladunge bestimmet / nicht eben in die zeit des  
Landtgerichts / Sondern zuuorn oder hernacher  
einsiel / sol er in Termino / dem vorordentem Be-  
richts Notario / solche seine Klage vnd Reprodu-  
ction zustellen / welcher sie / als vorberürt / dem Be-  
klagten bey dem Gerichts Botten / zuschicken sol /  
Vnd do die sachen etwas wichtig / mag der Kleger  
sein Libel Articulirt einbringen / Aber in geringen  
sachen darinne summarie Procedirt werden mag /  
sol der Kleger alleine summariam petitionem ober-  
geben / Vnd wollen hiemit / dem Advocaten auff-  
legt vnd beuolen haben / das diese beyderßig / in Ar-  
ticulirten Libellen / vnd summarischen Petitionen /  
das factum klerlich vnd vorstendiglich erzelen / da-  
mit keine Ineptitudo oder vntaugligkeit / oder vn-  
gewisheit / vnd dunkelheit / bey solchem Libel zube-  
finden / daraus der sachen Richtere sich eigentlich  
nicht vornemen kondten / Vnd sollen / do es anders  
befunden würde / die Libelli nicht zugelassen / son-  
dern ihrer vntaugligkeit vnd obscuritet halber / vor-  
worffen werden.

Von der Kriegsbeuestigung / vnd  
dem Eide für gefahrde Calumniae  
genennet.

Han



# TITVLVS SEXTVS.

**A**n dem Beflagten/die Klage zugekommen/ist er schuldig innerhalb sechs Wochen / den negstuolgenden darauff zu andtworten / Darumb sol er/ vormüge der Rechte vnd Flenszburgischen abscheidts / Do er einige Excepciones declinatorias oder dilatorias hette/ dieselbigen zugleich/vnd auff ein mal fürbringen vnd deduciren/ vnd gleichwol allezeit in Euentum den Krieg Rechtens beuestigen / Do aber solchs nicht geschehe/ sollen die Parteien darumb in gebürliche straffe genommen werden/ damit die sachen mit denen/ die beklagte Parteien zubestehen/ misstrawen haben/ gefehrlich nicht vorkogen werden / Do aber der beklagte kein declinatorias oder dilatorias hette einzutwenden/ sol er *pure & simpliciter litem confestiren* . vnd darauff den Eidt für gefehrde / *Iuramentum calumnie* genent/ wie der wordtlich hernacher gesetzet selbs Persönlich / oder do er durch Ehehafft zuerscheinen vorhindert / durch seinen Anwaldt in seine eigene/ vnd des Principalen Sele schweren/ Jedoch sol der Anwaldt solchen Eidt zuleisten *speciale Mandatum* fürbringen/ Welches geschehen sol/ entweder in offenem Landtgerichte/ oder zu den Quartalen/ Wan wir vnser Kethe zusammen schicken werden/

K    iij                    den



den negsten darnach / wen der Beklagter seine Ex-  
ceptiones vnd *Litis contestationem*. Wo solchs also in  
der zeit einfiele in wehrendem Landtgericht Produ-  
cirt / oder wen er solche seine Rechtliche notturfft  
als obgesagt / dem Beriches Notario vbergeben/  
Vnd ist der Kleger schuldig solchen Eidt so wol als  
der Beklagter zu erstatten / vnd als die Parteien  
einander solchen Eidt Remittiren vnd erlassen müs-  
sen / Wollen wir doch / wodurch das Landtgericht  
vormercket würde / das etwas gefehrlichs fúrge-  
habt / das Landtgericht *ex officio* der Parteien / bey  
welcher solche gefehrde vormutet wirt / den Eidt fúr  
bößheit / *Malitia* genennet / auffserlegen müge / Vnd  
ob es sich begeben / das einich theil / den Eidt fúr ge-  
fehrde zuschweren sich vorweigern würde / Do  
solchs vom Kleger geschicht / sol der Beklagte / von  
der angestalten Klage / leddig erkennen vnd absol-  
uirt werden / Würde sich aber der Beklagte / solchen  
Eidt zuleisten vorwiedern / Sol er dadurch sich dera-  
massen vorwircket haben / als ob er sich zu der Klag-  
ge ausdrücklich bekennet hette.

Form des Eidts fúr gefehrde.

TITVLVS SEPTIMVS.

Der



**D**er Kleger oder Appellant/ vnd ihre  
Procuratores sollen schweren einen Eidt/ zu  
Gott vnd auff das heilige Euangelium/ das  
sie glauben vnd nicht anders wissen eine gute sache  
zu haben/ auch keinen gefehrlichen schub auffzug oder  
beybringen der sachen suchen oder begeren/ vnd so  
offt sie im Rechten gefragt werden/ die warheit  
nicht vorhalten/ sonder ehrbarlich vnd aufrichtig  
lich anzeigen vnd aussagen/ Auch der sachen halb/  
niemandts anders dan dem jenigen/ so das Recht  
zulest/ ichtes geben/ oder vorheissen wollen/ damit  
sie die vrtheil erhalten mügen/ Alles getreulich  
vnd ohn gefehrlich.

Der Antworter oder Appellat/ vnd derselbi-  
gen Anwalde sollen schweren/ einen Eidt zu Gott  
vnd auff das heilige Euangelium/ das sie glauben  
vnd nicht anders wissen/ eine gute sache zu haben/  
sich gegen den Kleger oder Appellanten zubeschir-  
men/ auch keinen gefehrlichen schub/ auffzug oder  
beybringung der sachen suchen oder begeren/ vnd so  
sie im Rechten gefragt werden/ die warheit nicht  
verhalten/ Sondern ehrbarlich vnd aufrichtiglich  
anzeigen vnd aussagen/ auch der sachen halb/ Nie-  
mandt anders/ dan den jennigen so das recht zulest  
ichtes geben oder vorheischen wollen/ damit sie die  
vrtheil erhalten mügen/ getreulich vnd ohn ge-  
fehrde.

Form



Form des Eides Bößheit  
zuuormeyden.

TITVLVS OCTAVVS.

**D**er Principal selbs sol einen Eidt zu  
Gott vnd auff das heilig Euangelium sch  
weren / das er das jennige / so er fürbringet  
vnd begehrt / nicht aus gefehrde oder böser meinun  
ge / noch zuuorlengerung der sachen / sondern allein  
zur notturfft thue / Were aber der Principal nicht  
selbs zujegen / sol sein Anwaldt in seiner Partei /  
vnd sein eigene Seele obgesetzeten Eidt schweren /  
das er das jenige / welchs er fürbringe oder begere /  
nicht aus gefehrde oder böser meinunge / noch zu  
uorlengerunge der sachen / Sondern allein zur not  
turfft thue / vnd das er solchs also zuthun / von sei  
ner Partei vnterrichtunge vnd gewalt empfangen  
habe.

Von Contumacien / vnd vn  
gehorsam.

Wan



TITVLVS NONVS.

**W**An auff ausgegangene vnd vor-  
kündigte Ladunge/der Kleger oder Beklag-  
ter selbst/ oder durch ihren geuolmechtigtem  
Anwaldt/ nicht würden erscheinen / oder auch auff  
die eingekommene Klage/oder andere Rechts Pro-  
ducten / seine andtwort vnd andere Rechtliche not-  
turfft / wie sich der Ordnung nach gebürt / nicht  
würde fürbringen / Hett der erscheinende theil sei-  
nen vngheorsam zubeschuldigen/ im gleichen auch/  
do der Beklagte aussen bleiben würde/ sol dem Kle-  
ger frey stehen/ des Andtworters vngheorsam zu  
beklagen / Darauff sol derselbige / dessen vngheor-  
sam also beschuldiget wirt/ Citirt vnd geladen wer-  
den / innerhalb den negst sechs Wochen zuerschei-  
nen/ vnd seine notturfft vnd Ehehafft fürzubringen  
vnd zubeweisen / Dauon sol dem andern theil Ab-  
schrift zugeschicket werden / seine Rechtliche not-  
turfft dargegen einzutwenden/ Do nun vnser Landt  
gericht oder vnser Kethe in ihrer zusamen kunfft/  
auff den Quartalen / die angezogene nott vnd vor-  
hinderung / erheblich befinden / als das dieselbige  
Partei deren vngheorsamb beschuldigt wirt / mit  
kündlicher Leibs schwachheit behafftet / oder durch  
vns / von wegen des gemeinen nukes / aussershalb

¶

¶



Landes vorschicket gewesen / oder das sonst ihm  
andere Ehehafften zugestanden / die inen im Rech-  
ten fürtragen vnd entschuldigen können / sol er des-  
sen zugeniessen haben / vnd ohne endtgeldt in  
der sachen nachmals zu Procediren vorstattet wer-  
den / Befunde es sich aber das die angezogene vr-  
sach vnd entschuldigung solcher ausgebliebenen  
Partei / zu Recht vnerheblich weren / Oder auch  
das dieselbige Partei in ihrem vngehorsam behar-  
rete / vnd zu ihrer entschuldigung nichts vordrech-  
te / do solcher vngehorsamb bey dem Kleger ist / sol  
er ex superabundanti / durch Monitorial befelli-  
get werden / innerhalb den negst sechs Wochen dem  
gehorsamen theil / die expensas Termin / Jedoch  
auff die Richterliche messigung / zu refundiren / vnd  
in der sachen zuuorfahren / würde nun demselben  
nicht volge geschehen / sol der Beklagte / von der an-  
gestellten klage Absoluiret vnd los gesprochen wer-  
den / Were aber der vngehorsamb bey dem Beklag-  
ten / sol es gleicher gestalt / mit beweisung der nott  
vnd Ehehafft / vnd volgendes mit dem Monitorial  
gehalten werden / als von dem Kleger vorberürt /  
Würde er dan in seinem vngehorsamb beharren /  
sol der Kleger seine Rechtliche notturfft / womit er  
die klage zu beweisen habe / fürbringen / Darauff  
soll im Rechten endlich erkennet vnd gesprochen  
wer



werden / was recht ist / vnd solches ist zuuorstehen  
auff den vnghehorsamb der vor vnd nach der Litis  
contestacion begangen wirt / Auch do eine Partei  
ihre Sakschafft vnd Rechtliche notturfft zu rech-  
ter zeit nicht würde einbringen / sonst ob der Be-  
klagte sich vorweigerte vnd seümig würde den krieg  
zubeuestigen / sol dem Kleger an den Beklagten ein  
Monitorial innerhalb sechs wochen Litem zu con-  
testiren / werden mitgetheilt / Do den solchs nicht  
geschehe / sol in contumaciam der Krieg rechtens  
für beuestiget werden angenommen.

Von Reconuention vnd Ge-  
genklagen.

TITVLVS DECIMVS.

Nachdem vnser Fürstenthumb Hol-  
stein auff Sechsischem Rechte / wie vorbe-  
rürt / gewidmet / Vnd aber die Sächsische  
Rechte die Reconuention vnd wiederklage nicht zu-  
lassen / Sehen vnd ordnen wir / Wo einer für vn-  
serm Landtgericht künfftig beklagt wirt / so mag er  
den Kleger nicht wieder besprechen / Er sey dan zu-  
uorn durch vrtheil vnd Recht mit ihme entscheiden /

¶ ij

Es



Es were dan / das der Beklagte / nachdem ihn der  
Kleger zu Recht geladen / hinwieder Citation ge-  
gen ihm erlangte / ihm auch in gebürlicher zeit/  
Nemblich sechs Wochen für dem Rechtstage die-  
selbigen vorkündigen lassen / Solches falles mag  
vormüge des Schleswigischen abscheidts der Be-  
klagte den Kleger wieder beklagen / Vnd sollen bei-  
de die Conuention vnd Reconuention sachen zu  
gleich / vnd *pari passu* befürdert vnd ausgefüret wer-  
den.

### Von den zerstörlichen Aufszügen/

*Peremptoria Exceptiones* genandt / Vnd form  
der Eide / *Dandorum & Respon-*  
*dendorum.*

### TITVLVS XI.

Nach gethaner Kriegsbeuestigung /  
Sol alsbaldt bey der Litis Contestation der  
Kleger / ob er *Libellum articulatum* vbergeben  
wolte / De Artikel *Loco positionum* vormittelt des  
Eides / *dandorum* / repetiren vnd bitten beklagten  
anzuhalten / Das er / wie sich zu Rechte gebüret/  
mittel Eides *Respondendorum* / darauß antwur-  
te / Vnd sol alsdan der Beklagte schuldig sein / in  
Rechte



Rechtlicher frist seine Responsiones mit angehaff-  
ten articulirten Exceptionibus vnd defensionibus/  
was er deren zuhaben vormeineth / einzubringen/  
vnd solche Artickel *Loco positionum* zu repetiren/ Dar  
auff sol der Kleger in negstuolgender Rechtlicher  
frist antworten / vnd ob er Elisiuos wieder solche  
Exceptiones vnd Defensiones hette zuübergeben/  
dieselbige anhengig den Responsionibus fürbrin-  
gen/ Vere es dan / das Beklagter Elisiuos Elisi-  
uorum eingeben wolte / solches sol in der folgenden  
Rechtlichen frist geschehen / der Kleger auch schül-  
dig sein / in gleicher frist seine Responsiones / was er  
gestendig / oder nicht / vnd war gleube / oder nicht /  
zu produciren / Was den ein theil dem andern nicht  
gestehen wil / zu dessen beweisunge sol der Produ-  
cent zugelassen werden / vnd sollen allerwege die Ar-  
ticul *respectiue loco positionum* mittel Eides dandorum  
wiederholet / auch vom andern theil / mittel solches  
Eides / darauff antwurdt gegeben werden / Vnd  
sollen solche Eide geleistet vnd erstattet werden in  
der form / das der Principal selbst in seine Seele / so  
er gegenwertig / vnd seines abwesens / der Anwaldt  
in seine des Principaln Seele schweren / das seine  
oder seines Principaln Articul so viel die sein / oder  
seines Principaln eigene geschichte betreffen / wahr  
sein / Was deren aber frembde geschichte betreffen  
thut /



thut / das er die glaub wahr sein / aber der Eide  
Respondendorum sol also geleistet werden / das der  
Principal oder sein Anwaldt in des Principalen  
Seele schwere / das er des andern theils Articull/  
so viel derselben sein / eigene that oder geschicht be-  
treffend / wahr sey oder nicht / Vnd so viel deren  
frembde thate oder geschichte belangend / das er  
glaube die war sein oder nicht / antwordten wolles/  
oder geantwordtet habe / Doch sollen die jennigen  
Articul / darauß man vormüße beschriebener Rech-  
te zu antwordten / nicht schuldig / damit nicht ge-  
meint sondern ausgeschlossen sein / Es sollen aber  
die Anwalde / wan sie solche vnd andere Eide in irer  
Principalen Seelen schweren / dazu sondern gnugs-  
amen gewaldt / auch eigentliche vnd notturfftige  
vnterrichtung von iren Principalen haben / Wür-  
de sich auch jemandts vorweigern / auff die vberge-  
benen vnd wiederholte Articull zuantwordten / sol-  
len die Articull auff anhaltung der Partei / die sie  
vbergeben oder aber *ex officio pro confessatis* werden an-  
genommen / Vnd ob zwischen den Parteien streidt  
entstände / ob sufficienter vnd gebürlich respondirt  
oder nicht / Sollen beide theil / jedes mit einer Satz-  
schrift submittiren / darauß rechtliche bescheide ge-  
geben werden sollen / Vnd wo einem weitere ant-  
wort auffgelegt würde / sol derselbe *sub pena confessati*  
in



in negster Rechtlicher frist gebürliche vnd gnußsa-  
me Responsiones einzubringen schuldig sein.

Von Beweisung durch  
Zeügen.

TITVLVS XII.

Nachdem recht vnd billig / was die  
Partz in iren Responsionibus auff die Ar-  
tikel gegen einander nicht gestendig sein wol-  
len / Das demselben / so die Articull fürgebracht /  
zugelassen werde / was vorneinet wirt zubeweisen /  
Darumb sol derselbe Producent / seine vbergebene  
vnd Locopositionum wiederholte Articull an statt  
der Probatorial Articull wiederholen / vnd gedub-  
belt ins Gericht / oder außserhalb der zeit des Lant-  
gerichts / dem Gerichts Notario vbergeben / auch  
die namen der Zeügen dabey vorzeichnen / vnd vmb  
Commission bitten / die ihme dan erkennen / vnd in  
gebürlicher form mitgetheilt werden sollen / We-  
ren aber keine Articull vbergeben / sondern alleine  
summarische Petitiones vnd Exceptiones vorhero  
Producirt worden / sol der Zeügensfürer / was er  
beweisen wil / so ihme vom gegentheil nicht gestan-  
den / in beweiß Artikel vorfassen / vnd die Namen  
der



der Zeügen dabey vorzeichnen / Darauff sollen die  
Commissarien in sechs wochen nach ihnen vorkün-  
digter Commission / die Zeügen auff einen benen-  
ten Tag vnd Malsstede Citiren / auch das Examen  
des Zeügenführers gegentheil *ad videndum produci &  
iurare testes*. Auch ob er wolle Fragstücke vbergeben /  
auch dem Examine einen Notarien zuadiungiren /  
ankündigen / Würden nun einer oder mehr von den  
Zeügen aussenbleiben / vnd Zeügnus in den sachen  
zugeben sich vortwiedern / Den oder denselbigen sol-  
len die Commissarien bey einer zimblichen Geldt-  
peen dazu zu zwingen vnd anzuhalten haben / Vnd  
ob der Zeüge in seinem vngehorsam beharrete / ha-  
ben die Commissarien solchen zwang bey der Peen  
Dupli oder Tripli / nach gestalten sachen zuscherf-  
fen / Würde auch bey den Commissarien der vn-  
fleis befunden / soll vnser Landtgericht denselben  
auff eine zimbliche Geldtpeen zustraffen vnd zuge-  
horsamer vorrichtung seines auffgelegten beueh-  
lichs anzuhalten haben.

### Von Fragstücken.

### TITVLVS XIII.

Ob



**S** Die Partei/darwieder Zeugnus ge-  
füret wirt / auff die beweiss Articull / Frag-  
stücke vbergeben würde / Sollen die Advoca-  
ten dazu verdacht sein / das sie keine andere Inter-  
rogatoria vbergeben / dann was der sachen merita  
betreffen vnd anrühren mag / Sonst sollen sie sich  
aller andern vberflüssigen vnd vnnötiger weitläuff-  
tigkeit enthalten / Würden aber solche Fragstücke  
vbergeben / die vberflüssig vnd vnnötig / die sollen  
von den Commissarien ausgelassen vnd vbergan-  
gen werden.

### Von der Gezeügen Eidt.

TITVLVS XIII.

**D**ie Gezeügen sollen geloben vnd ei-  
nen Eidt zu Gott vnd auff das heilig Euan-  
gelium schweren / das sie in der gangen sache  
en zwischen N. vnd N. wollen für beide Parteien/  
keiner zu lieb noch zu leidt / die warheit sagen / so  
ihnen dauon wissent / darumb sie gefragt werden /  
Vnd das nicht vnterlassen vmb Gabe / Geschenck /  
Nuz / Genieffes / Bludtuerwandtnus / Freündt-  
schafft / furcht noch anders / wie Menschen sinn er-  
dencken müchten / alles getreulich vnd vngesefhrlich.

¶

Wels



Welcher gestalt nach Beeidigung der  
Gezeugen / das Examen für genommen  
werden vnd geschehen sol.

TITVLVS XV.

**W**An die Zeugen für gestellt werden / vnd des  
Zeugensführers gegen theil wieder der selben  
Personen Exceptiones fürwenden wolte /  
worumb sie zur zeugnusse nicht zu zulassen / Sol  
er dieselben Exceptiones zuuor vnd ehe die Ge  
zeugen schweren einbringen / oder aber sich bedin  
gen ihre Person vnd aussagen nach der verhör vnd  
eröffnung ihrer kundtschafft / wie recht / anzu  
fechten / Oder aber der jennige / wieder welchen der  
zeugen verhör für genommen / auff beschehen für  
heischen / wie obsteht / vnghehorsamlich aussen blei  
ben würde / Mügen die Zeugen nichts desto weini  
ger angenommen / beeidigt vnd abgehört werden /  
Vnd wan dan die Zeugen / wie obberürt / geschwo  
ren / sol ein jeder in sonderheit in abwesen der Par  
teien vnd andern Zeugen durch die Commissarien  
in beysein eines Notarien / auff einen jeden Articul /  
des gleichen auff die Fragstücke / ob einige durch den  
wieder theil eingegeben würden / so fern die zu der  
sachen dienlich / mit fleiß gefragt vnd verhört  
werd



werden/ Wan aber der jegentheil kein Fragstück  
eingelegt/ sol nichts desto weniger durch die Com-  
missarien der Bezeugen/ auff gemeine Fragstücke  
vorhöret/ vnd so er einigen Artikel/ fürnemblich in  
sellen vnd handlungen/ daran den Parteien sons-  
ders gelegen/ glauben oder war sagen würden/ Br-  
sach seines wissens oder glaubens/ auch zeit/ Als  
stadt vnd andere vmbstende der sachen befragt/ vnd  
nach der vorhör dem Zeügen auferlegt werden sei-  
ne aussage vor derselben eröffnung im rechten/ we-  
der den Parteien noch sonst jemandts anders zuofo-  
senbaren/ Vnd soll der Notarius die Attestationes  
getrewlich vnd fleissig aufschreiben/ vnd in getre-  
wer gewarsamb behalten/ bis sie durch die Com-  
missarien von ihme gefordert/ vnd dem Berichts  
Notario vberschickt werden/ Ben dem sie neben an-  
dern Acten so lange vorwahrlich enthalten werden  
sollen/ bis sie Publicirt vnd den Parteien allent-  
halben Abschrift darvon erkandt wirt.

Von den Zeügen die ausserhalb vn-  
sers Fürstenthumbs gesessen.

TITVLVS XVI.

M ij

Bo



**W**auch jemanths Zeügen zuuorhö-  
ren fürhabens were/ die vnserm vngemittel-  
tem vnd semplichem Gerichtszwang nicht  
vnterworffen/ derselbige mag vmb Compassbrieffe  
bey dem Landtgerichte / wann dasselbige gehalten  
wirt/ oder außserhalb der zeit des Landgerichts/ bey  
vnserß mittels Regierenden Herren / ihme an die  
Richter / vnter denen die Bezeügen geseßen sein/  
dieselbige auff eingebrachte Artickel zuuorhören/  
anhalten / Darauff sollen ihme solche Compass  
oder Bittbrieffe mitgetheilt werden / auch die Ar-  
ticull sampt den Fragstücken / so deren einige ober-  
geben/ den Richtern derselbigen frembden angegeb-  
nen Zeügen/ vorschlossen zugeschickt werden / Mit  
begehr / das sie zu befürderunge des Rechts vnd  
der warheit zu steur / die angegebene Bezeügen / so  
ihren Gerichtszwang vnterworffen/ für sich recht-  
lich erfördern/ dieselbigen beeidigen/ vnd wie recht/  
vorhören/ ihre aussage mit fleiß beschreiben lassen/  
vnd vnserß mittels Regierenden Fürsten / vnter  
ihrem Insiegel vorschlossen/ zuschicken wollen.

Von zeit der Zeügenfürunge.

TITVLVS XVII.

Die







niet / vbergeben / wolte fürstellen vnd vorhören las-  
sen / sol er schweren / das er die jennige Bezeügen / so  
er von neuen zuuerhören bittet / zuuorn nicht ge-  
wußt oder gehalten mügen / Do auch der Zeügens-  
fürer nicht selbst / sondern sein Anwaldt solchen eidt  
an stadt seines Principals schweren wolte / sol der  
Anwaldt zu der behueff ein *Speciale Mandatum* / sol-  
chen eidt zuleisten / von seinem Principals einzubrin-  
gen schuldig sein / vnd ohne solchen sonderbaren ge-  
waldt zu dem Eide nicht vorstattet werden / vnd sol-  
len alle wege in den berürten vier Dilationen sechs  
wochen für eine jegliche Dilation gegeben werden /  
Wollen wir in massen hieueorn von den *Advoca-*  
*ten* vorordnet / den Parteien frey gestaltdt sein las-  
sen / sich ein oder ausserhalb dieser Fürstenthumb  
vmb taugliche *Procuratores* zubewerben / vnd in  
ihren sachen für vnserm Landtgericht zugebrauch-  
en / die auch ihres Ampts halber / so wol als die *Ad-*  
*uocaten* mit besondern Eiden vnd Pflichten nicht  
beladen werden sollen / Vnd sollen die *Procurato-*  
*res* in ihren mündtlichen vortragen vnd *Recessen* /  
sich alles weitläufftigen geschweßes enthalten / vnd  
allein mit kurzen wordten anzeigen / was sie ein-  
bringen / vnd darneben bitten vnd suchen / oder wor-  
umb sie sonst anregung thun / Aber aller geschicht  
erzelunge / Disputation vnd weitläufftigen be-  
richts /



richts / sollen sie sich genzlich eüssen vnd enthal-  
ten / bey vermeidunge der straffe nach ermessigung  
des Gerichts / Was aber solches falls / es sey be-  
richt / geschicht erzehlung / Disputation / rechtliche  
Allegata vnd Informationes / sollen die Parteien/  
was ihre rechtliche notturfst sein mag / schriftlich  
zuübergeben schuldig sein / Solche Schrift auch  
allezeit intituliren lassen / damit so viel desto bessere  
richtigkeiten gehalten / vnd dem Gerichte die zwei-  
fache mühe vnd arbeit neben vorlust der zeit nicht  
auffgedrungen werden / Begebe es sich auch / das  
der Procuratorn Principal selbs für Gerichte  
nicht zur stede were / vnd der Anwaldt oder Pro-  
curator sich für ihnen zu Rechte wolte einlassen/  
sol er anderer gestaltd darzu nicht vorstattet wer-  
den / Er bringe dan in Gerichte ein einformlichen  
gewaltd vnd Procuratorium Mandatum / wel-  
ches dan mit seinen wesentlichen stücken / nach ord-  
nung der Rechten / begriffen vnd gestelt sein soll/  
Vnd sollen demnach die Parteien hiemit darauff  
vortwarnet sein / wan sie selbs im Gerichte nicht er-  
scheinen können / sondern durch ihre Anwalde sich  
einlassen vnd handeln wollen / das sie mit formli-  
cher gewaltd vnd Mandaten / so die gewöhnliche  
Clausulen in sich halten vnd zu Recht bestehen müs-  
sen / Dieselben vorsehen.

Jedoch



Jedoch ob einer erscheine/der mit gnugsamen  
 Mandaten nicht vorsehen / vnd aber erbietens we  
 re / *de rato* zu *cauiren*. der sol auff denselben Termin  
 zuhandlen vorstattet werden / vnd sol in der Bulla  
 macht / der vnterscheidt gehalten werden / Wo ein  
 *Communitet* oder vorsamlunge in rechten zuhandlen/  
 das dieselben nicht einen Procuratoren / Sondern  
 einen *Syndicum constituiren*. Der Zeügenfürer sol auch  
 schuldig sein/ die zerunge vnd den vnkosten / so auff  
 die Commissarien vnd die Zeügen gehen wirt / zu  
 erleggen/ vnd zubekalen/ zuuor vnd ehe die gezeügn  
 nus eröffnet werden / Im fall aber zwischen den  
 Zeügenfürern vnd den Commissarien vnd Zeügen  
 streidt fürfallen würde/ als solte vbermessige vnnö  
 tige zerunge vnd vnkosten auffgewendt sein/ sol vn  
 ser Landtgericht oder vnser Kethe auff den Quar  
 taltagen solche vnkosten vnd zerungen zumessigen  
 haben.

### Von Gezeügnus vnd fundtschafft die

*ad perpetuam rei memoriam* auffgenom  
 men wirt.

TITVLVS XVIII.

Wle



**W**iewol gemeine beschriebene Rech-  
te / *regulariter* für der Kriegsbeuestigung / die  
Zeügen vorhör nicht zulassen / Seindt doch  
etliche sonderbare felle zu rechte ausgenommen / in  
welchen zu ewiger der sachen gedechtnus / Zeügen  
vorhöret werden mügen / Als nemblich / wann die  
Zeügen mit sorglicher schwachheit vnd hoheim alter  
beladen / Item ob sie an ein andern abgelegenen ort  
zuziehen oder sonst ferner zureisen wegfertig / oder  
in schweren sterbenden leüfften weren / also / das zu  
besorgen / die Zeügen entwerden vnd dardurch die  
kundschaft der warheit erleschen vnd vorkommen  
mochten / In solchen fellen wollen wir hiemit nach-  
gegeben haben / das die Zeügen für der *Litis contesta-*  
*tion ad perpetuam rei memoriam* auffgenommen vnd  
vorhöret werden mügen / Doch sol solche vorhör be-  
scheiden auff vörgehende Ladunge des jegentheils /  
vnd ob derselbige etwas darwieder fürbringen wirt /  
vormittelt summarischer ausfürunge vnd beschei-  
nunge der vrsachen / die der Zeügensfürer fürbrin-  
gen thut / worumb ihme für der Kriegsbeuestigung  
solche Zeügen vorhör zugelassen werden solle / Aber  
vnerfordertes jegentheils / vnd summarien gehörter  
notturfft / zusamt bescheinunge der angezogenen  
vrsachen / solches *Examinis* zu ewiger gedechtnus /  
N sol



sol solche zeugnuss nicht für krefftig noch bestendig  
im Rechten gehalten werden mügen.

Von Beweisunge durch Brieff-  
liche Vrkunden.

TITVLVS XIX

**D**er Kleger oder Andtwordter seine Klage oder Exceptiones durch Instrumenta/ Brieff vnd Siegel / Handschrift / Galbücher / Register / oder andere Brieffliche vrkunden beweisen wolten / oder auch zu hülff der Zeügen aussagen / einleggen / Sezen vnd ordnen wir / das sie es thun mügen / vnd sollen in zeit vnd Dilation / wie vorgemeldet / Es mügen auch solche Brieffliche vrkunden hernacher bis zu beschlus der sachen eingebracht werden / Doch so fern der einbringende theil mit seinem Eidt beteuhren vnd erhalten mag / das er solche Brieffe gefehrlicher weise / oder sein wiedertheil dadurch in weiter kosten zufüren / nicht hinterhalten habe / Vnd wann also Brieffe / Register vnd andere Vrkunden / daran den Parteien gelegen / in das Gericht fürgebracht werden / damit solche Brieffe / Acta vnd Schrifften nicht vorlegt vnd verloren werden / auch die Parteien derselben / an andern örten im fall der notturfft gebrauchen mügen / Wollen wir das die Parteien /  
wieder



noch vord  
ch Bri  
XIX  
worder j  
uch j  
pand  
r Bri  
zu h  
und ord  
m zeit  
auch  
abgesch  
fern der  
währen  
schlicher  
einer  
man al  
en / dar  
angebr  
d Sch  
auf die  
aller  
as die

wieder welche Brieffe oder schrifften eingebracht/  
dieselbige besichtigen / vnd ihre einreden / ob sie dar  
wieder sichtbarliche argwahnigkeit oder mangel  
der Siegel / Schrift oder dergleichen hetten / die  
selben für vnserm Landtgericht oder für vnsern Res  
then / auff den Quartalen fürwenden mügen vnd  
sollen / Vnd sollen solche Brieue vnd Schrifften/  
dem beweisenden theil auff sein begehrt / wieder zuge  
settel werden / doch das ein glaubwürdige Copie  
durch des Landtgerichts Notarien *auscultirt* vnd vns  
terschrieben / bey den Acten behalten / vñ dem gegen  
theil auch ein Copie vbergeben werde / So auch ei  
ne Partei im Rechten anzeigt / das bey seinem gegen  
theil / Vrkunden / Brieffe / Bücher / Register oder  
Schrifften sein / vnd beehrte die in gerichte zubrin  
gen vnd zuediren / Wo dan solche vrkunden / Brieffe  
Bücher oder Register ihrer beider gemein / vnd also  
*Communia Instrumenta* sein / So ist die wieder Partei  
pflichtig / die in gerichte zubringen / dieselben besichti  
gen vnd vorlesen vnd hören zulassen / Doch sol hier  
inne diese bescheidenheit gehalten werden / so die Bü  
cher / Brieue oder dergleichen weitläuffte Schrifften  
weren / die auch anders vnd geheime dinge inhielten /  
das alsdan / mit gebürlichem fleis die Artickel / so ge  
mein sein / von Erbarri personen / sonderlich darzu ge  
ordnet / ausser dem Driginal gezogen werden / Wel  
chem Extract / so viel wie dem Driginal glauben ge  
geben werden sol.

N ii Von



Von Beweisung durch Augenschein.

TITVLVS XX.

**B**eweisunge durch Augenscheinliche besichtigung / sollen vnd mügen auch nach beschlus der sachen / wo solches für gethanem beschlus begeret / oder do es von den Parteien gleich nicht begehret / Von vnserm Landtgericht oder vnsern Rethen / in den Quartalen / Ambtshalben zugelassen vnd auffgenommen werden / Jedoch das dem widertheil solches / wie recht / zufürderst vorkündigt werde.

Von dem Eide in Supplementum /  
so zu ergenzung vorgeleister kundts  
schafft geschworen wirt.

TITVLVS XXI.

**W**Ann jemandt sein fürbringen / vnd *Intention* durch den geführten beweiß nicht vullenkommen noch gnugsamblich / sondern allein *sempiternè* erwiesen hette / Wirt billig der Eide *in Supplementum* zu erfüllunge der vnuullenkommen beweiß



beweisunge der Parteien ertheilet/ vnd siehet zu vns  
sers Landtgerichts vnd der Kethe ermesen/ vnd bes  
cheidenheit / Ob vnd wie / auch welchen Parteien  
solcher Eidt auffzulegen sey / Darumb sollen die  
sachen / mit allen ihren vmbstenden / anzeigungen  
vnd vormutungen/ sonders zweiuels erwogen wer  
den / in was ansehendt / Ehr vnd dapfferkeit jeder  
Partei sey / welche auch der sachen am besten wiss  
senschafft haben / vnd was jeder theil für dem an  
dern erwiesen / auch derhalben bessere vormutunge  
für sich haben/ alsden nach demselben aus erzelten/  
auch andern dergleichen bewegnussen/ nach erkent  
nisse des Gerichts / Solcher Eidt / in eigener Pers  
son/oder auff dem fall des Principal erhebliche vor  
hinderunge durch seinen darzu *in specie* geuollmech  
tigten Anwaldt zuerstatten / sol auffgelegt wer  
den.

Von dem Eide/ *DECISORIUM LITIS*  
genennet/ dardurch die ganze sache entschei  
den vnd auffgehoben wirt.

*TITVLVS XXII.*

N iii

DD



**D**ie Parteien gnugsame Bewei-  
sunge durch ihre Zeügen oder Schriftliche  
Vrkunden / dardurch ihre Klagen oder Ex-  
ceptiones gründtlich ausgefüret / der bewiesen we-  
re / nicht vorbringen würde / daraus das Bericht /  
was endtlich zuerkennen vnd auszusprechen sein  
müchte / zuuornemen haben möchte / Eßen ordnen  
vnd wollen wir / das es mit den entscheidentlichen  
Eiden hinfuro gehalten werden sol / wie es für dieser  
zeit vnd von altershero / in dem Fürstenthumb Hol-  
stein ein gebrauch vnd gewonheit gewesen ist.

Von eröffnung der Zeügen Aussage  
vnd was darnach zuhandlen.

TITVLVS XXIII.

**W**An die Zeügen / wie obstehet / vorhö-  
ret / vnd ihre kundtschafft vnd andere bewei-  
sunge im Rechten eingebracht werden / sol-  
len dieselben auff ansuchen der Parteien eröffnet  
vnd Publicirt / vnd den Parteien auff ihr begeren /  
Abschrift dauon gegeben werden / Vnd sol alsdan  
die Partei / wieder welchen die Zeügen gefüret / oder  
andere Beweissunge geschehen / in den negsten sechs  
Woche / alle ihre inrede vnd Exceptiones wieder  
der



der zeügen Personen vnd aussagen/ auch gegen ein-  
gelegte Instrumenta vnd Brieffliche Urkunden/  
vnd Schrifften zugleich / vnd in einer Schrifft im  
Landtgerichte oder hernacher dem Gerichts Nota-  
rio vbergeben / daruon sol dem Zeügensfürer / oder  
der sonst beweisunge füret/ Abschrift werden zuge-  
schickt / in negster Rechtlichen frist seine Probation  
schrifft / vnd was er des jegentheils Exceptiones zu  
wiederleggen haben mag / zu Produciren / Vnd sol  
darauff einem jedern / nicht mehr / dann noch eine  
Satzschrifft einzubringen erleubt sein / damit soll  
ein jeder zum vrrtheil beschliessen / Vnd im fall der  
eine oder ander theil in bemelter frist nicht beschlies-  
sen würde / sol die sache auff seinem vnghehorsamb  
für beschlossen werden angenommen / Vnd sol dies  
se vorgeschriebener Rechtlicher Proces gehalten  
vnd erfolgt werden / nicht alleine in den rechtfertig-  
ungen erster Instantz vnd *simplicis querele* / Son-  
dern auch in den sachen/ die durch Appellation/ an  
vnsere Landtgerichte erwachsen.

**Von Publication vnd eröffnung  
der Endturtheil.**

TITVLVS XXIIII.

Wan



**W**An in einer sachen beschlossen / vnd  
vnsere Kethe in irer zusammenkunft in den  
Quartalen befinden werden / das auff die  
eingekommene Acta ein Endturtheil oder eine In-  
terlocutoria / so einer endturtheil wirklichkeit vnd  
krafft auff sich treget / gesprochen werden mus / sol-  
len sie dem Gerichts Notario beuehlen / solche Acta  
auff negstem Landtgerichte fürzubringen vnd zu-  
übergeben / Die sollen alsdann im Rath vorlesen /  
vnd ein vrtheil darauff begriffen werden / welches  
volgendts aus der begriffenen Schrift den Par-  
teien durch den Gerichts Notarien Publicirt vnd  
abgelesen werden soll / Würde es sich auch bege-  
ben / das der Regierende Herr vnsers mittels zu-  
samt den beyßigenden Kethen befinden würden /  
das die sachen wichtig / darunter die Perplexitet  
oder andere vrsachen sich hielten / Worumb das  
Landtgerichte bewogen würden / die Acta auff eine  
vnuordechtige Juristen Facultet zuschicken / vnd  
daselbst eines rechtlichen Spruchs sich zuerholen /  
Solches mag wol geschehen / auff beider Parteien  
darlage vnd vnkosten / vnd sollen demnach die Par-  
ten zuuor vnd ehe die vrtheil eröffnet wirt / ein jeder  
zu seinem antheile den vnkosten erlegen vnd beza-  
len / Worauff die Publication der vrtheil volgen  
sol / vnd es sol damit im Fürstenthumb Holstein  
also



also gehalten / Aber im Herzogthumb Schles-  
weig / bey vorsehung des Lobuches gelassen wer-  
den.

## Von Erpensen vnd Gerichts- kosten.

### TITVLVS XXV.

**W**ir setzen ordnen vnd wollen / Das  
die Parteien nicht mutwillig vnd mit vor-  
satz vnbefugte rechtfertigunge wieder ein-  
ander erregen / vnd ihr gegentheil fürsehtlich auff  
schaden vnd vnkosten bringen / Darumb soll vnser  
Landtgericht daran sein / das solchem vnrechtmessi-  
gem fürnehmen nicht werde zugesehen / Würden sie  
aber aus den Actis erspüren vnd vormercken / das  
ein Part dem andern *Litem temere mouere* hette Solo-  
len sie demselben mutwilligen theil zu straff / vnd  
andern Parten zum beyspiel das jennige thuen vnd  
ergehen lassen / Was sich von Rechts vnd billigkeit  
wegen gebühren wil.

## Von der Execution vnd vullnstreckun- ge an vnserm Landtgerichte gesproche- ner Urtheill.

Q

DD



# TITVLVS XXVI.

**D** jemandts von vrtheil vnd Recht an vnserm Langericht ergangen / innerhalb zehen tagen nicht Appelliren würde / So hat dar durch solche vrtheil ihre krafft vnd die wirgligkeit / *rei indicata* erreicht / vnd mag derselbigen Partei nach vorfliessunge solcher *Fatalien*, einiger Appellation sich zu vnterstehen / nicht gebüeren / Sondern es hat der obsiegender theil bey dem Regierenden Herrn vnserz mittels / vmb Executoriales anzufuchen / die ihme dan gefolget vnd der vortheilten Partei nach gestaldt der sachen / bey einer ansehnlichen Geldt Peenen gebotten werden sol / der gesprochenen vrtheil innerhalb den negsten sechs wochen / zugehorsamen / vnd volge zuthun / Auch innerhalb solcher zeit schein vnd beweiß für zubringen / das der vrtheil gehorsamet vnd genug gethan sey / Würde dan solches nicht geschehen / sol dem obsiegendem theil Ladunge wieder den Condemnirten mitgetheilet werden / dardurch er zu dem negsten Landtgericht Citirt vnd fúrgeladen werde / zu sehen vnd zu hören sich in die Peen der Executorialn seines ungehorsams halber zuerkleren vnd zuurteilen / Oder aber rechtmessige vrsachen / worumb solchs nicht geschehen sol / für zubringen /



71.  
gen / vnd darauff rechtlicher erkendtnus zugewar-  
ten / Do dann der fürgeladener nicht erscheinen/  
noch einige erhebliche vrsachen / zu seiner entschuld-  
gung fürbringen würde / Sol er solches seines vn-  
gehorsams halber / in die Geldtstraffe / den Execus-  
torialn einuorleibt / mit vrtheil vnd recht erkleret /  
vnd seinem gegentheil auff gebürlich ansuchen / *Ar-*  
*ctiores Executoriales* , bey straff des Bannes vnd *Pro-*  
*scription* , aus vnsern Fürstenthumben / vnd derselbis  
gen angehörigen Landen auferlegt vnd beuohlen  
werden / Nachmals in den negst folgenden sechs  
Wochen der vrtheil gnug zuthun / auch schein vnd  
beweis / das solches also geschehen / im Landtgerich-  
te fürzubringen / Oder do es ausserhalb der zeit des  
Landtgerichts wehre / solche beweisunge dem Ge-  
richts Notarien zuübergaben / Würde dan die Par-  
tei vber solches alles auff ihren vngheorsam behar-  
ren / sol auff anhalten des gegentheils / wieder ihnen  
Ladunge ausgehen / auff negstfolgent Landtgericht  
zuerscheinen / zu sehen vnd zu hören / seines vngheor-  
sams halber in die Peen *Arctiorum Executorialium* , sich  
mit vrtheil vnd Recht zu erkleren vnd zusprechen /  
oder aber im rechten gegründte vrsachen fürzubrin-  
gen / worumb solches nicht geschehen solte / Würde  
dan die vortheilte Partei alsdann erscheinen / vnd  
seinem vormeinen nach / rechtmessige erhebliche vrs-  
achen

D ii



sachen fürbringen / Solches sol ihm werden zuges-  
lassen / jedoch das sein widertheil dagegen auch ge-  
höret werde / Vnd sol das Landtgericht vormittels  
summarischer *Cognition* darob zuerkennen macht ha-  
ben / Ob die eingewandte vrsachen *relevantes* sein /  
oder nicht / Würden dan solche vrsachen für vner-  
heblich vnd im rechten vnbestendig erkennet / sol der  
vngehorsame zugleich / vnd darneben in den Landts-  
banne / vnd zur *Proscription* aus diesem Fürstenthum  
vnd Landen vortheliet werden / Welches dan auch  
also gesprochen vnd gehalten werden sol / auff dem  
fall der vngehorsame / auff den negsten gesakten  
Termin genßlich aussenbleiben / vnd ghar keine vrs-  
sachen zu seiner entschuldigung fürbringen lassen  
würde / damit der schuldige gehorsam der *Iustitien*  
vnd Rechtens gehandthabet / vnd die Vorechter  
desselben andern zum Abscheulichem beyspiel / die  
straffe ihres vngehorsams empfinden mögen.

Wehr dan also in die straffe des Bannes vnd  
der *Proscription* erkleret wirt / der wirt zu gleich ge-  
setzt aus den frieden in vnfrieden / vnd sein Leib /  
Hab vnd güter menniglichen erlaubet / daran auch  
keiner freueln kan / Es sol aber für allen dingen dem  
theile / so die vrtheil gewonnen / aus desselben *Con-*  
*demnirten* Gütern / zu deme / was er mit Recht vnd  
Vrtheil gewonnen / vorholffen werden / von allen  
dreien



dreien Herrn / vormüege der vörigen Abscheide/  
Würde aber hernacher derselbe *Condemnirte* sich mit  
seinem iegentheil vortragen / vnd vns seines vnges  
horsambs halber / denn er vns als seinen Landes  
fürsten erzeiget / gebürlichen wandel vnd abtrage  
thun / vnd vmb Absolution ansuchen vnd bitten/  
Vollen wir ihne / wie sichs von Rechts wegen ge  
büret / zu der Absolution kommen lassen / Würde  
auch einer vber Jahr vnd Tag in dem Landtbanne  
vorharren / oder auch das einer in dem Bann mit  
Tode abgienge / sol es mit seinen Erben / Erb vnd  
Lehengütern / nach ausweisung des heiligen  
Reichs Ordnungen / auch der Sechsischen  
vnd gemein Lehen Rechten gehal  
ten werden.

D iij

Der



# Der Landtgerichts Ordnung vierdter Theil.

Von welchen vrtheilln an vnsern  
Landtgerichte ergangen / Appellirt  
werden müge.

## TITVLVS PRIMVS.

**§§** An entlich vrtheil vnd sentenz er-  
gangen / deren sich jemandt beschwert be-  
dünckt / oder andere Rechtliche beschwe-  
runge / daruon man sich / vormüge der rechten be-  
ruffen vnd Appelliren mag / iemants zugesügt wer-  
den / vnd die Heuptsache Fünffhundert Holtgüls  
den / vnd nicht darunter berürendt ist / das auch sol-  
che sachen keine wissentliche schuldt / die mit klaren  
Siegeln vnd Brieuen bescheinet weren / noch auch  
*Iniurien* sachen belangte / Dem wollen wir inhalts  
vnserß bey der ißz Regierenden Key: Mayt: er-  
langten Keyserlichen Priuilegiums / so dieser Ordo-  
nunge angehangt ist / an die Röm: Key: Mayt:  
oder ihre Mayt: Hammergerichte im heiligen  
Reich / auff nachfolgende maß vnd form zu Appels-  
liren



liren zulassen / vnd gestatten / Nemblich / das der  
Appellant zuuorn vnd ehe er seine Appellation zu  
Prosequiren fürnimpt / gelobe vnd schwere / das er  
genzlich glaube vnd darfür halte / das ihm Ap-  
pelliren noth sey / Vnd das er solche Appellation  
nicht freuentlich / noch zu auffhalt vnd vorleng-  
runge der sachen thue / Es soll auch alsbaldt der  
Appellant dem Appellaten Caution vnd sicherheit  
machen / so er im Rechten vorlustig würde / den  
kosten vnd schaden auff rechtliche messigung abzu-  
tragen / Vnd im fall der Appellant mit liggenden  
gütern oder Bürgen solche Caution / wie gemelt /  
nicht thun künfte / Alsdan sol er *ad iuratorium cautio-*  
*nem* vnd mit dem Eide sicherunge zuthun zugelassen  
werden / doch das er zuuorn ein Eidt schwere / das  
er nicht so viel an liggenden gütern habe / auch nach  
gebürlichen angewandten fleisse / keinen Bürgen  
bekommen mügen / Im gleichen sol es auch in den  
Stedten in den Fürstenthumb Holstein auch ge-  
halten werden / wen die Parteien von Rath vnd  
Bürgermeistern Appelliren für die Stedte.

**Form des Eides welchen der Ap-  
pellant zuschweren schuldig.**

Es



TITVLVS SECVNDVS.

**E**s soll der Eidt / daruon hiebeuorn  
Anmeldung geschehen / dem Appellirenden theil  
in der folgenden Form fürgelesen werden / vnd  
er denselben zuschweren schuldig sein.

Ihr werden schweren einen Eidt zu Gott vnd  
auff sein heiliges Euangelium / das ihr genzlich  
glauben vnd darfür halten / das euch Appellirens  
noth sey / vnd das ihr solche Appellation nicht fre-  
uentlich nach zu auffhalt oder vorlengerunge der  
sachen thun / Das ihr auch alle ewere güter / so ihr  
im Fürstenthumb besitzen / hiemit oblegirt haben /  
oder im mangel derselben sonst gnugsame *Caution*  
oder vorsicherung mit Bürgen oder Pfanden / für  
Prosequirunge deren eingeworffenen Appellation /  
thun wollen / auff dem fall ihr im Rechten vorlustig  
werden / kosten oder schaden / nach Rechtlicher er-  
messigunge / mit sampt der sachen zuuorgnügen /  
vnd zuentrichten / alles getreulich vnd ungefehrlich /  
Vnd ob ein Procurator oder Anwaldt den obberür-  
ten Eidt an statt seines Principals schweren wol-  
te / sol der nicht zugelassen werden / er habe dan von  
seinem Principaln einen ausdrücklichen gewaldt /  
*Mandatum speciale*. solchen Eidt zuleisten / Vnd wo  
er also gnugsamen gewaldt einlegen wirt / sol sol-  
cher



ther Eidt durch ihn nicht allein in seines Princips  
pals / sondern auch seine des Procuratorn selbst  
eigene Seele vullenzogen werden.

Von handthabunge dieser vnser  
Landtgerichts Ordnung.

TITVLVS TERTIVS.

**S**olches alles / wie hieueorn von Ti-  
tull zu Titulln vnd von Articull zu Articulln  
gemeldet vnd angeheiget ist / *Statuiren* . ordnen  
vnd setzen / Wir König Friedrich / der Herzog Jo-  
hans der Elter / vnd Herzog Adolff Beuettern  
vnd Gebrüdere in der besten bestendigsten Form/  
weiss vnd masse / Als wir in krafft vnser Landts  
Fürstlichen Regalien vnd Freyheiten / auch von  
Rechts vnd gewonheit wegen thun sollen / können  
oder mügen.

Beuehlen auch hierauff ernstlich / meinen vnd  
wollen / das solche vnser Landtgerichts Ordnung  
stedt vest / vnd vnuorwürglich gehalten / der selbigen  
durch aus gelebet vnd nachgekommen werden soll /  
Die wir auch gebürlich selbst halten wollen / doch  
vorbehaltlich / das wir vnser Erben / vnd nachkom-  
men dieselbige jeder zeit nach gelegenheit durch wei-

P

tern



tern zeitigen Rath vorendern vormehren vnd vor-  
bessern mügen / ohne beschwerunge der Parteien/  
vnd jedermenniglich vnvorleht an seinem Rech-  
ten / Vnd dennoch inhalts vnd vormüge dieser vn-  
ser Ordnung einẽ jedern vnsern Vnderthanen/  
auch frembden / auff sein gebürlich ansuchen / in sei-  
nem obliegen vnd beschwerungen / wie obberürt/  
in gute oder recht / gnediglich vnd ohne vorweiges-  
runge kan vnd sol geholffen vnd bey recht gehandt  
habet werden / So wollen wir auch hiemit ernst-  
lich gebietende / das hinfürder niemands vnsern  
Vnderthanen durch selb oder eigene gewalt sich  
vnternehmen oder einigerley weise anmassen solle/  
aufferhalb Rechtlicher erkandtnus vnd wieder die-  
se vnser Ordnung vnd sakinge / an jemandts ge-  
waltiglich sich zuuorgreiffen / oder jemandt an sei-  
nem Leibe / Hab vnd Gütern zubescheidigen / ihne  
daraus zudringen / vnd dero zu spoliiren vnd zu-  
entsetzen / oder sich mit Hude / Weide / Mastung/  
Holzhawen / oder andern gerechtigkeiten / die er im  
besitz nicht hergebracht / zu dem andern gewaltig-  
lich einzudringen / oder jemandt an seiner geruig-  
lichen Possession *vel quasi* seiner gerechtigkeit zuper-  
turbiren / zubehindern vnd zubeunruigen / Denn  
sich solche vnd der gleichen eigene gewaltige hand-  
lunge vnd zundtunge nicht geziemen / auch vns /  
aus



aus Fürstlicher Obergkeit keines weges zugestaten oder zgedulden gebüret / wie wir auch zuthun nicht gemeinet sein.

Derhalben wir auch hiermit in sonderheit alle vnd jede vnserer Vnderthanen vnd Verwandten darfür gnediglich wollen gewarnet / auch ernstlich begehret haben / Ein jeder wolle in betrachtunge vnd ansehunge der billigkeit hinfürter sich thadtlicher handlung zunötigung vnd eindringens zu dem andern genzlich enthalten / vnd zu gebürlicher straffe keine ursache geben / Dan wir einen jedern von vnsern Vnderthanen / der sich friedlichs gehorsambs / als wir / vns zu einem jedern vorsehen wollen / erzeigen vnd vorhalten wirt / viel lieber in gnedigstem vnd gnedigem beuehlich haben / vnd als die von Gott geordnete Obergkeit / demselbigen gnad vnd alles gutes erzeigen wollen.

Jedoch sol diese Landgerichts Ordnung vnd was in der selbigē Context allenthalben disponirt vns König Friedrichen vnd dem Reich Dennemarcken / an der hoheit vnd Lehen wahr des Fürstenthumbs Schlesiweig vnd des Landes Fehmern / wie auch neben irer König. Mayt. vns Herzogen Johansen dem Eltern / vnd Herzog Adolffen zu Schlesiweig

P ij

Holo



Holstein / etc. an vnserm daran hergebrachten be-  
sitß vnd gerechtigkeit / Vnd dann den Stedten vnd  
vnsern samptlichen getreuwten Vnderthanen in vn-  
sern Fürstenthumben / an iren Priuilegien vnd frey-  
heiten / so von vns *Confirmirt* vnd bestetigt / ganz vn-  
uorfenglich vnd vnschedtlich sein / Vnd sollen sol-  
che irrungen / als sich zwischen vns Geuettern vnd  
Brüdern / ißo gedachter beiden Lehenstücke halber /  
erhalten / auff masse / wie dieselbe in dem / den 17.  
Monats tag Julij des 1569. Jahrs zu Odense  
auffgerichteten vortrage vorabscheidet / für den dar-  
zu benandten Vnterhandlungs Schur vnd Für-  
sten / in gute oder recht / auffgetragen  
vnd entscheiden werden / ohne  
gefehrde.

Vnser



CONSTITVTION.  
Inser von Gottes gna-  
den Friederichen des andern zu Denne-  
marcken/ Norwegen / der Wenden vnd Gotten Rü-  
ningen / Vnd von denselben gnaden Johansen des  
Eltern vnd Adolffen/ Geuettern vnd Brüdern/ Er-  
ben zu Norwegen / Herzogen zu Schleßweig/  
Holstein / Stormarn vnd der Dithmar-  
schen/ Grauen zu Oldenburg vnd  
Delmenhorst.

Von wegen der Freywlichen gerecht-  
keiten der Huuenbandt genennet / was  
darunter gehöre.

**N**ach dem wir befinden / das sich  
auff etlichen vnsern für dieser zeit / gehal-  
tenen Landrechtstagen viel irrungen vnd  
zweispaldt zwischen vnsern Vnderthanen  
denen vom Adel / von wegen der Freywlichen gerecht-  
igkeiten/ vnd Huuenbandes/ was nach absterben ei-  
nes vom Adel darzu gehöre / zugetragen / Also das  
die vom Adel sich bedüncken lassen / das hierunter  
viel eingezogen werden wollen/ Welches etwan nach  
P iii gemei-



gemeinem Landrechte vnd alten dieser vnser Lande  
gebrauch vnd herkommen / mit in das Erbe gehö-  
re / dadurch also die Erben in ihren angefallen / vnd  
Erbegerechtigkeiten mergklich verkürzet werden  
kunt / Wann wir nun vns desselbigen in gnaden  
erinnert / auch darüber von vnseren Vnderthanen/  
denen vom Adel vmb eine gewisse *determination* vns  
terthenigst vnd vntertheniglichen belangt würden /  
So haben wir bey verfassung dieser vnser Gerichts  
Ordnung / für nutz vnd nothwendig angesehen/  
demselbigen zweuel / auch seine gebürliche richtige  
Ordnung vnd mass zugeben / Sehen demnach vnd  
ordnen / das es in künfftigen sellen / zwischen vnsern  
Vnderthanen denen vom Adel / mit den Frewillichen  
gerechtigkeiten vnd Huuenbände / volgender gestalt  
sol gehalten / auch auff vnsern Landt Rechtstagen  
also darnach gesprochen vnd geurtheilt werden /  
Nemblich / Wan ein Edelman vor stirbet / so sol sein  
verlassene Witthwe / nach seinem Tode (so ferne sie  
ihren Witthwen standt binnen Jars nicht verrückt)  
Jahr vnd Tag in seinem vollen gute besizen blei-  
ben / vnd alle auffkünfft vnd hebungen desselbigen  
Jars daraus haben / Doch was sattig Barlandt  
ist / dasselbige sol sie mit der Winter oder Sommer  
Sath / nach des fals zeit vnd gelegenheit / von dem  
gemeinen gutt / wieder bestellen vnd Besehen / vnd  
das



das gutt auch die Holzung nicht verwüsten noch  
verharwen lassen/ Sondern nur die notturfft so zur  
Feürung gebrauchen / vnd weiters daruon nichts  
verkauffen / Im gleichen fall sol es auch mit den  
Zeichen gehalten werden/ das sie solche nur zu irer  
notturfft der Kuchen gebrauchen vnd sonst nicht  
gar ablassen außfischen vnd verkauffen / Darzu  
sol sie nemen alle Hauszgerath/ so nicht Nagel oder  
Erdtfast ist/ Item Wollen vnd Linewant/ alles ge-  
schlagen Silber vnd Golt zum halben theile so ihr  
Man vnd sie/ in stehender Ehe mit einander gezeüget  
vnd machen haben lassen/ Im gleichen alle fahrende  
Habe/ Ochsen/ Kühe/ Pferde/ Schaffe/ Schweine/  
Gense halb/ Was vbrig aber von Hauszgerate/ Golt  
Silber/ Bücher/ Klenodien/ Tapezerien vñ Decken/  
so sie nicht zusammen gezeüget / vnd dem Man von  
seinen Eltern vnd Freünden angeerbet vnd gegeben/  
dasselbige alles sol den kindern vnd Erben allein blei-  
ben/ vnd die Fraywen darinnen nicht erben/ Wie auch  
in gleichen an den reifigen Pferden/ Harnisch/ Wa-  
pen vnd Wehren/ Büchsen/ Geschütz/ Puluer/ Bü-  
cher/ vnd was hizu gehöret/ solches volgt billich den  
Erben/ Wie auch allbar gelt so auff Brieff vnd Sie-  
gel gewesen / damit sol die Witthwe nicht zuschaffen  
haben/ das ander höret ihr halb so dar befunden/ des  
Mannes Ketten vnd Klenodien behalten die Erben/  
Dars



Dargegen behalt die Frau alle ihre Guldene Ketten / Gilden vnd Silber Beschmeide vnd Kleinodien / Die Morgengabe so der Man ihr geben gehört der Frauen / Darzu nimpt sie ihr Heyrathgutt / so sie dem Manne zugebracht / mit der jegen vermachung oder zugabe des Mannes / es sey Gelt oder Erbguth / so ihr zum Leibgeding vorschrieben vnd vermacht ist / Desgleichen alle Ketten / Kleinodien Kisten vnd Kisten wahr / so ihr von ihrem Vater vnd Freunden gegeben vnd angeerbet ist / Das selbige alles gehöret einer Frauen vom Adel nach ihres Mannes todte / zu ihrer Frewilligen gerechtigkeit vnd Huwenbände / vnd sol solches ihr volgen / Darmit sich nun ein jeder darnach zuachten wisse / haben wir diese vnser *Constitution* auch wollen Publiciren / vnd zu ende dieser vnser Landrechtens Ordnung / anfügen lassen.

Privat



# Privilegium der Stedte im Fürstenthumb Holstein.

**W**ir Friedrich der ander von Gots  
gnaden zu Dennemarcken / Norwegen/  
der Wenden vnd Gotten König / Vnd  
wir Johans vnd Adolff von desselben gnaden / Er-  
ben zu Norwegen / Alle Herzogen zu Schlesiweig/  
Holstein / Stormarn vnd der Dithmarschen/  
Brauen zu Oldenburg vnd Delmenhorst etc. Be-  
uettern vnd Brüdere / Bekennen vnd thun kundt  
hiemit für jedermenniglichen / Nachdem die Ersa-  
men vnserer Vnderthanen vnd lieben Getreüwen  
Bürgermeister / Rath vnd gemeine vnserer Sted-  
te / Kiel / Tzehoe / Rendsburg vnd Oldesloe / aus  
begnadunge vnserer Vorfahren am Fürstenthumb  
Holstein / sich Lübischen Rechtens biss anhero ge-  
braucht / darnach geurtheilt vnd gerichtet / Auch  
von den vrtheilen / so von dem Rathe einer ißlichen  
der vier benannten Stedte gesprochen an die an-  
dern drei Stedte / als der andern instantz Richter  
Appellirt / vnd aber befunden worden / das bey den-  
selben eckliche vnrichtigkeit eingerissen / als das sich  
die



die streitige Parteyen / wie sie vber recht beschwert /  
vnd zu vnrechtmessiger Burgschafft bey ihnen der  
Stedte gesprochen vrtheil zu bleiben gedrungen  
worden / höchlichen beklagt / vnd derwegen die Re-  
the mehrgedacher vier Stedte auff die gemeinen  
Landrechts Tage Citiren lassen / allda sie mit  
schwerer vnkosten vorseumusse vnd anderer mehr  
vielteltiger vngelegenheit liegen musten / Vorumb  
die Abgesandten der vier Stedte / Kiel / Ikehoe /  
Kendeszburg vnd Oldesloe bey vns vnterthenigst  
vñ vntertheniglich auff ihigen gemeinen Rechtssta-  
ge alhier in vnser Stadt Schleszweig angesucht vñ  
gebeten / sie ermelte vier Stedte zu vnstresslicher er-  
haltung ihrer Priuilegien vnd freyheit vormittelt  
gebürlicher vnd rechtmessiger vorordnungen gne-  
digst vnd gnediglichen zusehen / Das wir dem-  
nach in ansehunge solcher zimlichen bitte / auch zu  
erhaltung gebürlicher Ordnung des Rechts /  
abschaffung eingerissene missbreüche vnd vnrich-  
tigkeiten / nach vorgehabtem Rath vnd gehörten  
bedencken vnser aller seits Stadthalter vnd Rethen  
folgende begnadungen vnd Ordnungen ermelten vn-  
sern Stedten / Kiel / Ikehoe / Kendeszburg vnd Ol-  
desloe gegeben / Geben vnd vorleihen ihnen diesel-  
bigen hiemit / vnd wollen das hinfuro in nachge-  
schriebenen vier fellen von der vier bemelten Stedte  
vrtheiln /



urtheiln nicht sol weiter Prouocirt / sondern was  
durch die vier Stedte erkandt / darben sol es gelaß  
sen / vnd die urtheil / wie solches gebürt / exequirt  
werden / Als nemlichen für das erste in sachen / die  
nicht zweyhundert Mark Lübsch belangen / son  
der vnter zweyhundert Mark auff sich haben /  
Zum andern / in öffentlichen vnd bekandlichen  
schulden / die mit Siegel vnd Briuen / auch mit  
klaren Handschriefften liquidirt vnd dargethan  
werden mügen / Vnd für das dritte in *iniuriis* sache  
en / wan auff schmachrede vnd scheltwordt geklagt  
wirt / Vnd zum vierden / in den sachen / welche die  
Gebewde innerhalb den vier Stedten betreffen  
thun / Vnd ob jemandts in solchen sachen an vns /  
vnser Erben vnd nachkommen sich beruffen wür  
de / so sollen die vier Stedte derselbigen Appella  
tion zu *deferren* nicht schuldig sein / Sondern wir  
vnd vnser Erben vnd nachkommen am Fürsten  
thumb wollen auff fürgebrachten schein / das wie  
der diese vnser begnadunge geappellirt worden / die  
sache für die Stedte remittiren / vnd die Appella  
tion nicht annemen / noch den Appellanten steuunge  
oder Citation mittheilen / Was aber andere sachen  
belanget / die vnter den vier obbeschriebenen Artis  
culn nicht begriffen / sol den Parten / so sich alls be  
schwert von der Stedte urtheiln / an vns vnd vnser

Q ij

nach



nachkommen beruffen werden / volgender gestaldt  
vnd mass zu Appelliren zugelassen sein / Erstlich  
das der Appellant vorborge oder mit hindergeleg-  
ten gnugsamen Pfanden vorsicherunge thun solle /  
Do er der Appellation vorlustig würde / das er  
Fünffzig Marck Lübsch den vier Stedten erleggen  
vnd abtreten wolle / Vnd ob er der Appellant Bür-  
gen nicht fundte bekommen / oder auch keine gnugsam-  
me Pfandt zu hinterleggen hette / Sol er die *iura-*  
*toriam cautionem* bestellen / im fall er der Appellation  
vorlustig erkandt / solche Fünffzig Marck den vier  
Stedten zubezalende / Zum andern / das er auch  
den Appellanten / jedoch auff rechtliche messigun-  
ge / die Expens vnd Gerichtskosten wolle bezalen  
vnd widerstatten / Zum dritten sol er schweren den  
Eidt für gefehrde / das er nicht Appellire / den recht-  
lichen austrage gefehrlichen damit auff zuhalten /  
Sondern glaube das er eine rechtfertige sache ha-  
be / vnd auff seine gethane Appellation bessers rech-  
tens sich zuuerholen verhoffet / Vnd sollen / wan  
solches geschehen / die mehr gedachten Stedte / so  
das vrtheil / dauon Appellirt worden / gesprochen /  
dem Appellanten auff sein ansuchen einen Ab-  
schiedtsbrieff vnter ihren Siegeln geben lassen /  
darinnen der Wortliche inhalt der ergangenen vr-  
theil / zusampt darauff erfolgter Appellation be-  
stalten



halten vorstandes vnd geleisten Eides für gefehr-  
de/ alles/ wie obsteht/ kundtschafft vnd gezeigen/  
begriffen sein/ Vnd darauff den Appellanten vor-  
lassen/ seine Appellation anhengig zumachen/ Es  
sol aber die Appellation geschehen/ als baldt nach  
gesprochenem vrtheil mündtlich vnd berürter ver-  
standt/ vnd Eidt darauff wirklich erfolgen/ Vnd  
sol mit vorgesagten Abscheidts Briue der Appel-  
lant innerhalb sechs Wochen dreien tagen schuldig  
sein/ an eine vnserer König Friedrichen/ Herkogen  
Johansen oder Herkogen Adolffen Ganklei/ die  
ihme am negsten gelegen/ sich zubegeben vnd densel-  
ben seinen Abscheidts Brieff für zubringen/ Dar-  
auff sol ihm Ladunge/ auch wie es nötig/ *Inhibition*  
vnd *Compulsoriales* werden mitgetheilet/ Vnd ob der  
Appellant ihm bestimbter zeit der sechs Wochen  
vnd dreier Tage/ solche seine Appellation mit aus-  
bringunge der Steuunge vnd Proces nicht würde  
anhengig machen/ so sol die Appellatio darumb  
für *desert* gehalten/ vnd die vrtheil daruon Appel-  
lirt/ exequirt vnd volnstreckt werden/ Vnd sollen in  
solchen Appellation sachen/ wie hieruor erkliche mäl  
geschehen/ die stedte/ welche als Richtere die vr-  
theil gesprochen/ nicht Citirt werden/ Sondern es  
sollen die Steuunge an die Appellaten ausgehen/  
Aber die Acta vnd für ihnen ergangene gerichtliche

N. iij

handt



Handlungen / sollen die Stedte in glaubwürdiger  
Form auff erlangte *Compulsoriales* vnd Gebottsbrie  
ue vnter ihren Siegeln vorschlossen / dem Appelo  
lantent heraus geben / Welches der Appellant vn  
eröffnet / wan in der Appellation erkandt wirt / auff  
den negst volgendt gemeinen Rechtstage gerichtli  
chen Producirn solle / Damit auch die nichtigkeit  
der Proces / auch aller vordacht fürkommen vnd  
vorhütet werden müge / Sollen ermelte Stedte  
durch ihren geschwornen Schreiber ein ordentlich  
Gerichtsbuch halten / vnd die fürgebrachte klagen /  
antworten / vnd ferner der Parteien notturfst bis  
zum beschlus getreülichen vñ vorstendiglichen auff  
schreiben lassen / Wan auch Briue / Siegel vnd  
schriftliche Brkunden fürgebracht werden / dauon  
sollen Gopeien / die mit den Originalien in Gericht  
collationirt / vnd durch den geschwornen Schreis  
ber unterschrieben sein / bey dem Gerichts Protho  
col bleiben / Wan auch Zeügen vorhöret / sollen die  
selben auff vorgehende Ladunge des andern theils /  
darwieder sie gefüret / werden auffgenommen / vor  
eidet / vnterschiedtlich gehöret / vnd eines jeden zeü  
gnus mit fleis beschrieben / Wil dan der ander theil  
solche Zeügnussen ansechten / oder vormeinert ein  
reden wider die Producirte Brkunden zu haben /  
Der



Derwegen sol er gehört / auch den Zeugenführer  
oder Producenten seine notturfst für zubringen  
mündtlichen zugelassen sein / Wo mit beide theile  
durch zwo oder drey Wechselfrede zum vrtheil be-  
schliessen sollen / die vrtheit / so dan auff solche Pro-  
cesss gesprochen / sollen schriftlich vorfasset / vnd  
den Parten zu vorhütunge alles miszuorstandes  
Publicirt vnd abgelesen werden / Vnd beuehlen  
darauff in mehr gedachten vnsern Stedten / die  
weil sie zuuolge ihrer habenden begnadunge / dar-  
bey wir sie gnediglich zu lassen vnd handt zu ha-  
ben geneigt / nach Lübischem Rechten sprechen sol-  
len / das die vier gemelten Stedte ein glaubwür-  
dig Exemplar des Lübischen Rechtens bey sich ha-  
ben / Vnd demselben in ihren Rechten vnd vrtheit  
sprechen / folgen sollen / Wann aber ein fall für  
Recht keme / der im Buchstaben solches Lübischem  
Rechtens nicht begriffen wehre / So sollen die  
Stedte vormüge vnd inhalt der Priuilegien des  
Fürstenthumbs Holstein volgen dem Sechsischen  
Rechten vnd darnach sprechen / vrtheilen vnd rich-  
ten / Wie dasselbe jeder zeit für Gott vnd vns vnd  
vnseren nachkommen am Fürstenthumb Holstein  
bekandtlichen sein vnd vorantworten wollen /  
Doch



Doch haben wir vns / vnserer allerseits Erben in  
krafft dieses fürbehalten / diese vnserer Begnadunge  
vnserer gefallens zuuorbessern / zuuormindern oder  
zuuorenderende / Brkündtlich haben wir Herkog  
Johans vnd Herkog Adolff / mit vnd im Namen  
der König. M. zu Dennemarcken vnserer freündt-  
lichen lieben Herrn Vetteren Brüdern vnd Gefat-  
tern / Alle als Herkogen zu Holstein diese vnserer be-  
Begnadunge mit vnseren angehengten Fürsilichen  
Secreten bekrefftigen lassen / Begeben in vnser  
Stadt Schlesweig / Mitwochens nach *omnium*  
*Sanctorum* Im Jare nach Christi vnserer Herrn  
vnd Seligmachers geburt / Fünffzehen  
hundert vnd im Acht vnd  
Sechzigsten.

Privi



**Privilegium Keyser**  
**Maximiliani des andern/ die Appella-**  
**tiones vom Holsteinischen Landtgerichte**  
**an das Keyserliche Cammergerichte**  
**betreffende.**

**W**IR Maximilian der ander von  
Gotts gnaden/erwelter Römischer Key-  
ser / zu allen zeiten mehrer des Reichs/ in  
Germanien/ zu Hungern/ Behaim/ Dalmatien/  
Croatien vnd Slaunonien / etc. König / Erzhers-  
zog zu Osterreich/ Herzog zu Burgundi/ zu Bra-  
bandt / zu Steyr / zu Karndten / zu Grain / zu  
Lützenburgk / zu Wirttemberg / Ober vnd Nieder  
Schlesien / Fürst zu Schwaben/ Marggrauen  
des heiligen Römischen Reichs zu Burgaw / zu  
Nehren / Ober vnd Nieder Lausniß / Gefürster  
Graff zu Habspurgk / zu Tyroll / zu Pfirdt / zu  
Rhburgk vnd zu Bork / etc. Landtgraff zu Elsas/  
Herr auff der Windischen Marck / zu Porttenow  
vnd zu Saluis / etc. Bekennen öffentlich mit die-  
sem Briue/ vnd thun kundt aller menniglich / Als  
vns der Durchleüchtig Fürst / Herr Friedrich der  
ander zu Dennemarcken/ Norwegen/ der Wenden  
R vnd



vnd Gotthen König etc. Herzog zu Schleswig/  
Holstein/Stormarn vñ der Dittmarschen/Gräff  
zu Oldenburg vnd Delmenhorst etc. Vnd den zu-  
gleich S. L. Vettern / die Hochgebornen Johans  
vnd Adolff / auch Herzogen zu Holstein / vnser bes-  
sonder vnd liebe Freündt / Oheimen vnd Fürsten/  
freündtlich vnd gehorsamlich fürbringen vnd zuer-  
kennen geben lassen / Ob wol in des heiligen Reichs  
Ordnungen / auch gemeinen beschriebenen Rechten  
ernstlich vorbotten / das auff wolgesprochene rechts-  
messige vrtheil die Parteien sich freuentlicher vnd  
muthwilliger Appellation nicht gebrauchen / vnd  
dardurch das Recht vnd die vnstreffliche vrtheil ge-  
fehrlicher weise auffhalten vnd vorhindern solten/  
So hette sich doch nu mehr viel Jahr im werck be-  
funden / das die Vnderthanen vnd Ingesessen ihrer  
Liebden Herzogthumbs Holstein / vnd der einuor-  
leibten Landen / so ihre Liebden von vns vnd dem heil-  
ligen Reich zu Lehen trugen / in iren vnbesugten sa-  
chen / wan darein ordentliche vrtheil vnd Recht er-  
gangen / zu vorhinderung der *Iustitien* , an vnser  
Kaiserlich Chammergericht im heiligen Reiche zu  
Appelliren sich vnderstünden / Dardurch die rechts-  
liche Cognition suspendirt / ihren S. L. die hende ge-  
schlossen / vnd den gewinnenden theilln ihr woller-  
langtes Recht / mit ihrer mercklichen beschwerde  
schao



schaden vnd nachtheil vorzogen vnd auffgehalten/  
auch etwan dieselben dardurch von geringer sachen  
wegen/ in eüserst vnuormügen gesetzt/ vnd ihre mit  
vrtheil vnd Recht in erster Instanz erhaltene sache  
en liegen zu lassen gedrungen worden/ Vnd vns  
darauff freündtlich / gehorsamb vnd demütiglich  
anlangen vnd bitten lassen/ das wir ihre Liebo  
den / vnd derselben Vnderthanen hierinne zu fürs  
sehen / freündtlich vnd gnediglich gerueheten/ Des  
haben wir angesehen solch obgenandter vnser bes  
sonderen vnd lieben Freündes Oheimen vnd Für  
sten / des Königs zu Dennemarcken / vnd der  
Herzogen zu Holstein freündtlich / demütich vnd  
zimblich bitte / vnd dan die freündtliche zuneigung  
ge vnd willen / Auch getreuwe nützliche dienste / so  
ihrer Liebden vorfahren / vnd sie selbst vnsern vor  
fahren Römischen Keysern vnd Königen / vns  
vnd dem heiligen Reich bißhero vielfeltiglich er  
wiesen vnd gethan haben / vnd ihre Liebden auch  
hinfuro wol erweisen vnd thuen mügen vnd sol  
len / Vnd sonderlich auch darbey betrachtet / den  
nachtheil vnd vorderben / so sonst den Parteien  
aus gahr geringen sachen zustehen / Also das auff  
solche Appellationen mehr vnkosten / dann die  
Heubetsachen werth sein / aufflauffen mag / Vnd  
darumb mit wolbedachten muth / guten Rath vnd  
rechten



rechten wissen / den gemelten vnsern besondern lie-  
ben Freündt / Oheimen vnd Fürsten dem Rünig zu  
Dennemarcken / als Herbogen zu Holstein / auch  
Herkogen Johansen vnd Adolffen zu Holstein / ge-  
uettern vnd Brüdern / diese besondere Freyheit ge-  
than / Thuen vnd geben iren Liebden / die auch hier  
mit von Römischer Kenserlichen macht vullkom-  
menheit wissentlich in krafft diß Brieues / Also das  
nun hinfuran in ewigzeit von keine bey oder entli-  
chen vrtheilen / Erßandtnussen oder Decreten / so in  
ihrer Liebden vnd deren nachkommen Herbogen zu  
Holstein Hoffgerichten / desselben Herkogthumbs  
Holstein vnd der einuorleibten Lande / ausgespro-  
chen vnd eröffnet werden / in sachen da die Klage  
vnd Heubtsache nicht ober Fünffhundert Gilden  
Reinisch in Goldt Hauptsumme / sonder dieselbige  
Summa oder darunter werth were / des gleichen  
auch in allen vnd jeden Schuldtsachen / aldar das  
*debitum* bekandtlich oder sonst scheinbar *liquidum*  
vnd richtig / Ob gleich solche schuldt weit ein meh-  
rers / als die angestalte Priuiligirte Summa der  
Fünffhundert Goltgilden antreffen / vnd dann in  
denen *iniuri* handlungen / in welchen der vorleumb-  
dungen / freuel / Schmehe oder Scheltwordt hal-  
ber / bürgerlich ( Sintemal in den jennigen *iniuri*en  
welche *Criminales* seindt / es ohne das seine richtige  
masse



masse hat/ vnd von denselben vormüge der Rechten  
nicht Appellirt werden kan) *ad estimationem* geklaget  
würde / vnd die billige *astimation* die obbestimpte  
Fünffhundert Goltgülden nicht vbertreffen/ von je-  
mandts / wehr der auch sey / an vnser oder vnserer  
nachkommen / am Reich Kenser oder Königlich  
Cammergericht im heiligen Reiche nicht Appellirt  
Supplicirt/ noch reducirt werden solle noch mag in  
keine masse/ sondern dieselben vrtheil erkandnussen  
vnd decret/ gang krefftig vnd mechtig sein/ stett blei-  
ben / vullenstreckt / vnd an genandter vnserer Für-  
sten Hoff vnd andern Gerichten ferner vullenfaren  
vnd Procedirt werden sol/ wie sich gebüret/ Für al-  
ler menniglich vnuorhindert/ vñ das darüber durch  
einen oder mehr von einen vrtheil/ die nicht ober 500  
Goltgülden / wie obstehet / betreffen / Oder eine  
schuldsachen/ da das *debitum* bekandtlich oder sonst  
scheinbar *liquidum* vnd richtig/ oder in den obspecifi-  
cirten *Iniuri* handlungen begriffen/ nicht Appellirt/  
Supplicirt noch reducirt werden solle noch mag in  
keine weise/ sondern dieselben vrtheil/ erkandnussen  
vnd decret sollen gang krefftig vñ mechtig sein/ stett  
bleiben / vullenstreckt / vnd an genandter vnserer  
Fürsten/ Hoff vnd andern Gerichten ferner vullen-  
faren vnd Procedirt werden / wie sich gebürt / für  
aller menniglichen vnuorhindert / Vnd ob darüber  
X iij durch



durch einen oder mehr von einiger vrtheil / die nicht  
über 500. Goltgülden / wie obstehet / betreffen / oder  
scheinbar *liquidum* vnd richtig / oder in den obspecifi-  
cirten *iniuri* handlungen Appellirt / Supplicirt oder  
reducirt / welcher gestalt oder von weme das besche-  
he / vnd dieselben Appellation / reduction oder Sup-  
plication eine oder mehr von vnserm oder vnserer  
nachkommen am Reich / aus vorgeffenheit angeno-  
men würden / So setzen / ordnen / vnd wollen wir /  
das solches der obgemelten begnadung vnd freyheit  
vnmachteilig vnd vnbruchlich / auch dieselbige Ap-  
pellation / reduction oder Supplicirung / Vnd was  
darauff gehandelt oder fürgenomen würde / ganz  
kraftlos / vntauglich vnd nichtig sein / Das wir  
auch alles vnd jedes / von obbestimbter vnserer Key-  
serlichen macht / vullenkommenheit vnd rechter wiss-  
sen / ißo alsdan vnd dan als ißo vntauglich erkens-  
nen / erkleren / auffheben / Cassiren vnd vornichten /  
in der allerbesten form vnd masse als wir es thuen  
mögen / Vnd die obbemelte vnserer besondere lieben  
Freündt / Ohm vnd Fürsten / König zu Denne-  
marck / vnd Herzogen zu Holstein / vnd ihrer Lieb-  
den nachkommen sich obberürter vnser freyheit vnd  
begnadung gebrauchen / vnd macht vnd gewalt  
haben mögen / Vnd sollen solche vrtheil / die also  
Fünffhundert Goltgülden oder darunter / wie ob-  
laut



laut / betreffen / zu vollenziehen vnd ferner wie sich  
nach rechtlicher Ordnung vnd loblichen Landtge-  
brauch gebürt / zuhandlen vnd zu vollinfahren / von  
aller menniglichen vnuorhindert / da auch gleich die  
Heubtsache ober Fünffhundert Goltgülden werth  
were / so soll doch einem jeden Appellanten / zuuor  
vnd eher seine Appellation *deferens* . auffgelegt wer-  
den / den Eidt *Calumnie* oder für gefehrde zuschwe-  
ren / das er glaube eine recht fertige sache zu haben /  
vnd nicht Appellire in gemuet vnd meinunge / die  
sachen durch sein Appellation auff zuhalten / Son-  
dern in hoffnung vnd zuuorsicht / besser recht zu er-  
langen / als die in erster Instanz gesprochen vrtheil  
mitbringen thette / Vnd dan auch solcher Appellans  
te schuldig sein / *Caution* vnd vorsicherunge zuthun.

Vnd gebieten darauff allen vnd jeden Shurfür-  
sten / Fürsten / Geistlichen vnd Weltlichen / Prelaten /  
Graffen / Freyen / Herrn / Rittern / Knechten / Heubts-  
leuten / Landtuogten / Bittthumben / Vogdten /  
Pflegeren / Vorwesern / Amptleuten / Landtrichtern /  
Schultheissen / Bürgemeistern / Richtern / Rathen /  
Bürgern / Gemeinen vnd sonst allen andern vnsern  
vnd des heiligen Reichs vnderthanen vnd getrewen /  
In was Wir den / Stande oder Wesen die sein / ernst-  
lich vnd vestiglich / mit diesem Bricue / vnd wollen /  
das sie die obgenandten König zu Dennemarcken /  
Herzogen Johansen vnd Herzog Adolffen / vnd iren  
nach



nachkommen/Herzogen zu Holstein an dieser vnser  
Keyserlichen freyheiten vnd gnade/darmit wir ihre  
Liebden/wie obsteht/vorsehen vnd begnadet haben  
nicht hindern noch irren/Sondern genzlich darbey  
bleiben / vnd deren geruiglichen gebrauch vnd ge-  
niessen lassen/Auch darwieder nicht thun/noch das  
jemandts anders zuthun gestatten in keine weise/  
als lieb einem jeden sey vnser vnd des Reichs schwe-  
re vngnade vnd straff / vnd darzu ein Peen / nemb-  
lich ein hundert Mark Lottigs Goldes/zunormei-  
den / Die ein jeder / so oft er freuentlich hierwieder  
thette/vns halb in vnser vnd des Reichs Cammer/  
vnd den andern halben theil mehrgemelten vnsern  
besondern lieben Freünde / Ohmen vnd Fürsten/  
Dem König zu Dennemarcken vnd Herzogen zu  
Holstein / oder ihrer Liebden nachkommen Herzo-  
gen zu Holstein vnablässig zu bezalen/vorfallen sein  
sollen / Mit vorkundt diß Brieffs besiegelt mit vn-  
serm Keyserlichen anhangenden Insiegel/Begeben  
in vnser vnd des Reichs Stadt Spenr den 6. Tag  
des Monadts Julij / nach Christi vnser lieben  
Herrn geburt / Fünffzehn hundert vnd im sieben-  
zigsten / vnserer Reiche des Römischen im achten/  
des Hungerischen im siebenden / vnd des Beheimis-  
schen im zwei vnd zwenzigsten Jahren.

MAXIMILIANVS.

Wir



**SS** **IX** Maximilian der ander von  
Gotts gnaden/erwelter Römischer Key-  
ser / zu allen zeiten mehrer des Reichs in  
Germanien/ zu Hungern/ Behaim/ Dalmatien/  
Croaticn vnd Eslauonien / etc. König / Erzhers-  
zog zu Osterreich/ Herzog zu Burgundi/ zu Bra-  
bandt / zu Steyr / zu Karndten / zu Crain / zu  
Litzelburgk / zu Wirttemberg / Ober vnd Nieder  
Schlesien / Fürst zu Schwaben/ Marggrauen/  
des heiligen Römischen Reichs zu Burgaw / zu  
Mehren / Ober vnd Nieder Lausniz / Befürster  
Graff zu Habspurk / zu Tyroll / zu Pfirtd / zu  
Kyburgk vnd zu Bork etc. Landtgraff zu Elsas/  
Herr auff der Windischen Marcke/ zu Porttenow  
vnd zu Saluis / etc. Bekennen offentlich mit die-  
sem Briue/ vnd thun kundt aller menniglich / Als  
vns der Durchleüchtig Fürst / Herr Friedrich der  
ander zu Dennemarcken/ Norwegen/der Wenden  
vnd Gotten König/ Herzog zu Schlesweig/ Holo-  
stein / Stormarn vnd der Dithmarschen/ Graffe  
zu Oldenburgk vnd Delmenhorst etc. Vnd zugleich  
S. L. Vettern / die Hochgebornen Johans vnd  
Adolff auch Herzogen zu Holstein etc. vnser beson-  
der vnd liebe freündt / Oheim vnd Fürsten freündt  
lich vnd gehorsamlich zu erkennen geben lassen/wie  
das Weilandt König Christian zu Dennemarcke/  
Schweden vnd Norwegen / Herzog zu Schles-  
weig



weig vnd Holstein etc. Von auch Weilandt Keyser  
Friedrichen dem dritten/ vnserm Vorfaren Bran-  
henn ein Priuilegium erlangt/ das niemant von den  
Vnderthanen vnd Einwonern des Fürstenthumbs  
Holstein für andere auslendische vnd frembde Ge-  
richte/ in erster Instantz gezogen werden solle/ Wie  
vns dan ihre L. dasselbige Priuilegium in Originali  
fürbringen lassen/ von wordt zu wordt also lautende.

Wir Friedrich von Gottes gnaden Römischer  
Keyser zu allen zeiten mehrer des Reichs/ zu Hun-  
gern/ Dalmatien/ Croatien/ etc. König/ Herzog  
zu Osterreich/ zu Steyr/ zu Karndten/ vnd Crain/  
Herr auff der Windischen Mark / vnd zu Portes-  
now/ Graff zu Hapsburg/ zu Tyrol vnd zu Pfirdt  
vnd zu Kyburg/ Marggraff zu Burgaw vñ Landt-  
graff zu Elsas / Bekennen öffentlich mit diesem  
Brieue vnd thun kundt allen den/ die ihn sehen/ le-  
sen oder hören lesen/ das vns der Durchleuchtigste  
Fürst Christian/ König zu Dennemarcken etc. vns-  
ser lieber Bruder fürbracht hat/ wiewol er einem je-  
den so spruch oder fürderunge zu seinē vnderthanen  
vnd den iren in dem Herzogthumb zu Holstein vnd  
andern Landen vnd gebieten/ so er von vns vnd dem  
heiligen Reich hat / gessen / zuhaben vormeinert/  
gebürlichs rechtens nie vorgewesen / sondern das  
einem jeden auff sein zimlich ersuchen fürderlich  
gestatt hette/ so würden doch nichts desto weiniger  
dieselben sein vnderthan vnd die iren mit frembden  
vnd



und auslendischen Gerichten fürgenommen und da-  
mit zu mercklichen schaden bracht / vnd hat vns dar-  
auff gebeten / die seinen in solchem / als Römischer  
Keyser / gnediglich zuuorsehen / Des haben wir an-  
gesehen solch des genandten vnsers lieben Bruders  
des Königs zu Dennemarcken zimlich bitte / vnd  
darumb mit wollbedachten muth / guthen zeitigen  
rath / vnsere vnd des Reichs Churfürsten / Fürsten /  
Graffen / Eölen vnd getreuen / so dazumal in merck-  
licher anzall bey vns gewesen sein / vnd aus rechtem  
wissen desselben vnsers lieben Bruders von Denne-  
marcken vorbestimbtten Fürstenthumen vnd Landen  
Einwonern / Vnderthanen vnd den ihren diese beson-  
dere anad gethan vnd freyheit gegeben.

Thun vnd geben auch die von Römischer Keiser-  
lichen macht vullenkommenheit vnd rechter wissen in  
krafft dieses Briues / also das nun hinfuro zu ewi-  
gen zeiten niemants wer der oder die werē die gemel-  
ten Vnderthanen vnd Einwonner der vorgeschrieben  
Fürstenthume vñ Lande an einem andern ende noch  
Gericht / dan an den enden / da sich das in denselben  
Fürstenthumen vñ Landen gebüret / fürnemē / beklas-  
gen / noch wieder sie oder jr gutt / gericht / geurteilt  
noch Procedirt werden solle / wo aber die gemelten  
Person an einichē andern enden vñ gericht fürgenos-  
men würden / wan sie dan durch den benandten vns-  
ern lieben Brudern von Dennemarckē oder obrist

S ij

Ambt



Umbtleit derselben Lande / den das zuthuende ge-  
bürt / abgefürdert / sollen sie von stundt an die ende /  
dahin ein jeder / nach laut dieser obgeschriebener vn-  
ser Keyserlichen freyheit gehörig / geweiſet / vñ wie-  
der sie vnd ihr gutt nicht gericht / geurtheilt noch  
Procedirt werden / Würde aber an einichen andern  
ende darüber ichtes wieder der obberürten Person  
ein oder mehr fürgenommen / gehandelt / gericht /  
geurtheilt oder Procedirt / Meinen / setzen vnd wol-  
len wir von obbestimbter Römischer Key: macht  
vnd vullenkommenheit / das solches krafftlos zu recht  
nichtig vnd vntuglich sen.

Vnd den vorgemelten Vnderthanen vnd Ein-  
wonern der gemelten Fürstenthumben vnd Landen  
den ihren oder iren gutt ganz keinen schaden / man-  
gel oder abgang bringen sol noch müge / Das wir  
auch iho alsdan / vñ dan also iho alles abthun vnd  
vornichten wiſſentlich in krafft dieses Briues / Es  
würde dan einem oder mehr das Recht an den ob-  
geschriebenen kündtlich vorsakt oder gefehrlich  
vorzozen / so mag er oder die das suchen an den en-  
den / da sich nach ihrer notturfft gebürt / Behal-  
ten vns auch / vnd dem heiligen Reiche vnser Ober-  
keit vnd Gerichtszwang / vnd besondere Appella-  
tion hierin beuohr.

Vnd gebieten darauff allen vnd jeglichen  
Churfürsten / Fürsten / Cristlichen vnd Weltlichen  
Graffen /



Graffen/Freyen/Hern/Rittern/Knechte/Heubt-  
leuten/Ampfleuten/Bizthumben/Bogdten/Pfles-  
gern/Vorwesern/Schultheissen/Bürgermeistern  
Richtern/Kethen/Bürgern vnd gemeinden/Vnd  
sonst allen andern vnsern vnd des Reichs Vnder-  
thanen vnd getrewen/in was wurden/stande oder  
wesen die sein/von obgemelter Röm. Key. Macht  
vullenkommenheit ernstlich vnd vestiglich/mit die-  
sem Brieue/das sie den ehrgeandten vnsern lies-  
ben Brudern/den König von Dennemarcken/sein  
nachkommen vnd die iren an solchen vorgeschrieben  
vnsern Keyserlichen gnaden vnd freyheiten/nicht  
hindern noch irren/sondern sie deren ruiglich vnd  
ohne einige irrung gebrauchen/geniessen vnd genz-  
lich darbey bleiben lassen/als lieb ihn allen vnd jeg-  
lichen sey vnser vnd des Reichs schwere vngnade  
vnd vorliesung einer peen/Nemlich hundert marck  
Lottigs Goldes zuuormeyden/die ein iglicher/so  
offt er freuentlich hinweg der thette/vorfallen sein  
sol/halb in vnser vnd des reichs Cammer/vnd den  
andern halben theil dem obgenandten vnserm lies-  
ben Brudern dem König von Dennemarcken vnd  
seinen nachkommen/vnablezlich zubezalen/Mit  
orkundt dieses brieues mit vnserm Key. May. an-  
hangenden Insiegel besiegelt/Geben zu Rottens-  
burg auff der Zauber am 13. Tag des Monats Fe-  
bruarij/nach Christi geburt vierzehnhundert vnd

S ij

im



im vier vnd siebenzigsten / vnserer Reiche / des Römischen im vier vnd dreizigsten / des Kaysertumbs im zwei vnd zwanzigsten / Vnd des Hungerischen im Fünffzehenden Jahren.

Vnd vns darauß freündtlich gehorsamb vnd demütiglich belangen vnd bitten lassen / das wir iren L. solch obgeschriebenen Weilandt Kaysen Friedrichs Priuilegium / als Römischer Kaysen zu confirmiren vnd zubesettigen freündtlich vnd gnediglich geruhen / Des haben wir angesehen solch obgemandter vnserer besondern vñ lieben freündts / Obeymen vnd Fürsten des Königs zu Dennemarchen / vnd der Herzogen zu Holstein / freündtlich demütiglich vnd zimlich bitte vnd dan die freündtliche zuneigung vnd willen / auch getrewe / anneme vnd nützliche dienste / so ihrer L. vorsehen / vnd sie selbst vnsern löblichen vorsehen Römischen Kaysen vnd Königen / vns vnd dem heiligen Reich bisshero vielfeltiglich erwiesen vnd gethan haben / vnd ihre L. L. auch hinfuro wol erweisen / vnd thuen mügen vnd sollen / vnd darumb mit wolbedachten muth / gutem rath vnd rechter wissen obinseirten Weilandt Kaysen Friedrichs Briue in allen vnd jeglichen seinen worten / puncten / Clausulen / Articulen / inhalt / meinungen vnd begreiffungen / als Römischer Kaysen gnediglich *confirmirt* vnd besettigt / *Confirmiren* vnd besettigen denn auch hiemit von Römischer Key:  
Macht



Nacht wissentlich in krafft dieses Briuees / was  
wir daran von rechts vnd billigkeit wegen zu con-  
firmiren vnd zu bestaden haben / Confirmiren vnd  
bestatten sollen vnd mügen / vnd meinen / setzen vnd  
wollen / das obinserirter Weilandt Keyser Fried-  
richs Brieff in allen vnd jeglichen seinen worten /  
puncten / Clausulen vnd Articulen / inhaltungen /  
meinungen / vnd begreiffungen / krefftig vnd mecht-  
tig sein / stett vest vnd vnuorbrechlich gehalten vnd  
vullenzogen werden / Vnd mehrgemelte vnser lie-  
be Freündt / Ohmen vnd Fürsten sich desselben / so  
viel ihre L. L. dessen inhaben vnd gebrauchen / als  
les seines einhalts ferner gebrauchen vnd geniessen  
vnd genzlich darbey bleiben sollen / von aller men-  
niglichen vnuorhindert / Doch vns vnd dem  
heiligen Reich an vnsern vnd sonst menniglich  
an seinem Rechten vnd Gerechtigkeiten vnuor-  
griffen vnd vnschedtlich / Vnd gebieten darauff  
allen vnd jeden / Churfürsten / Fürsten / Geistlichen  
vnd Weltlichen / Prelaten / Grauen / Freyen /  
Herrn / Rittern / Knechten / Haubtleuten / Ambts-  
leuten / Landtuogdten / Vixthumben / Vogdten /  
Pflegeren / Vorwesern / Ambtleuten / Schultheis-  
sen / Bürgermeistern / Richtern / Rathen / Bür-  
gern / Gemeinden / vnd sonderlich allen vnd je-  
dern Hoffrichtern / Landrichtern / Frengra-  
uen / Stuelherrn / Freyschossen / Zentrichtern /  
West



Westphalischen vnd andern Richten / Vnd sonst  
allen andern vnsern vnd des Reichs Vnderthanen  
vnd getrewen / was wurden Standes oder Wesens  
die sein / ernstlich vnd bestiglich / mit diesem Brieff /  
vnd wollen / das sie gemelte vnser lieben Freündt /  
Ohmen vñ Fürsten / dem König zu Dennemarcken  
vnd der Herzogen zu Holstein an obinserirten Bei-  
landt Keyser Friedrichs Brieff vnd dieser vnser *Con-*  
*firmation* vnd bestettigung nicht irren noch hindern /  
sondern sie derselben geruiglich gebrauchen vnd ge-  
niessen lassen / vnd hierwieder nicht thun / noch das  
jemandts zu thun gestatten / in keine weise / als lieb  
einem jeden sey vnser vnd des Reichs schwere vn-  
gnade vnd straffe / vnd darzu die peen in obgeschrie-  
benem Keyser Friedrichen Priuilegio begriffen / zu-  
uormeyden / Das meinen wir ernstlich / Mit vr-  
kundt dieses Brieues besiegelt mit vnserm Keyser-  
lichen anhangenden Insiegel / Geben in vnser vnd  
des heiligen Reichs Stadt Speyr / den 10. Tag  
des Monats Julij nach Christi vnser lieben Herrn  
vnd Seligmachers geburt / Fünffzehnhundert vnd  
im siebenzigsten / vnserer Reiche des Römischen im  
achten / des Hungerischen im siebenden / vnd des  
Behaimischen im zwei vnd zwenz-  
zigsten Jahr.

MAXIMILIANVS.



## Errata.

- E** 1. fac. 1. versu 9. lege vorordnung.  
**E** 2. versa pag. versu 6. lege vor desselben / *ibidem* versu 24. Omitte vnd / lege von derselbigen.  
**D** 1. fac. 1. versu 2. *includuntur hac verba parenthesi* in massen wir dan solchs in den Appellation sachen aus den Embtern halten wollen.  
**D** 3. fac. 1. vers. 7. *Verba Priuilegij vsq; ad hac* sol solche erkenntniss 12. *Parenthesi includuntur.*  
**D** 4. vers. pag. vers. 17. lege Zeichgreuen.  
**E** 3. fac. 1. vers. 1. lege den die regierung / *ibidem* versa pag. vers. 17. lege vns befohlenen.  
**S** 4. vers. pag. 5. vers. lege für das Holsteinsche / *ibidem* vers. 17. lege gewertig zusein.  
**B** 2. fac. 1. vers. 6. lege von dem Notarien.  
**I** 2. fac. 1. vers. 18. lege seine *exceptiones contra denunciationem.*  
**R** 1. vers. pag. 6. vers. lege oder gefangen.  
**R** 4. fac. 1. vers. 13. lege vngesefhrlich / *ibidem* vers. 20. lege vnd so offte.  
**E** 1. vers. pag. vers. 14. lege *expensas termini.*  
**E** 4. fac. vers. lin. 10. lege den oder dieselben.  
**M** 1. fac. 1. vers. 21. lege geneiss / has / bludtuerwandt nus / *ibidem* vers. pag. vers. 13. lege ob aber der jennige.  
**D** 1. vers. pag. vers. 2. lege Landtgericht.  
**D** 4. vers. pag. vers. 11. lege obligirt.  
**P** 2. vers. pag. vers. 2. lege Stenden.  
**P** 2. fac. 1. vers. 23. lege Rünig. W.  
**D** 4. vers. pag. lin. 6. lege Rünig. W.  
**S** 2. vers. pag. lin. 20. lege *pro vorsakt/ vorsagt.*



Bedrucket zu Ham-  
burg durch Nicola-  
um Wegener.

M. D. LXXIII.





Psalm. 103.

Der H E R R schaffet Gerechtigkeit vnd Ge-  
richte/ allen die vnrecht leiden.





101. anlaſet

W D ons thegheſchone Wifſche 7070 2 2. m C  
an der ſchone vige malle v. 17

ſen  
Nul  
form  
ſura  
ſura  
ſpo  
liter  
ſpo  
Vom  
Cont  
Kij  
ſura  
Re  
ſiſ  
ſiſ



fin. Petisoriū Litis. N. 3. A.

Part: 2. Tit. 2. f. a.